

古今原始序

嘗讀宋李昉廣記凡五百卷類
出諸史百家之所記載固足以
資多聞然誕而不經者半之罔
有關於理亂之故竊以是病昉
也夫古今之書備矣作原始者



何原始者紀歷代之典制必自
其造端而言之也造端於善則
為福始造端於不善則為禍先
后世察其所以始所以先而曰
起自某某孰有不樂於為福而
敢於為禍者此則原始之所由

作而前史之所未聞可以闡理
亂矣豈博而寡要如昉所倫哉
嗟呼蠶室下而史記成東征歌
而中說出守白不進則著大元
秘閣既謝廼脩綱目何者古之
君子不遇於時然後大肆其力

於文章是故文以窮工言以困
大尠有身履要地而早成完書
者也桂野公自少魁畿甸迨通
籍即留侍

鑾掖為名給舍以至今中丞凡二
十年其間條陳天下之利病與

撫輯一方之民彛可謂罔有暇
日矣而猶能手不停披目不輟
覽以拆衷古今之要為是書如
此豈待窮而文工困而言大者
耶其過人誠遠矣余謫戍且六
年每荷戈少暇亦欲取往冊之

疑似者附以已見尚碌碌焉未
能一竟理會今公以全集來命
序是余之所欲為而未能者公
其先為之矣紀之於端豈亦竊
附之意乎

嘉靖癸亥春正月馬平鶴樓張

翀
譔

古今原始敘

况生曰作事者其必有初乎夫
懿聖創制往哲畫法雖意態軌
度人人殊臧否理亂隨之各有
肇端故囿習而龔成者編氓之
守也掇華而遺根者曲士之見

也自非造大雅之堂窺制作之
蘊烏能究極今古洞見其初也
中丞柱野趙公博雅精擇游心
太始閱於著述要歸大道爲海
內文儒之宗嘗悲末學溺於靡
麗爲工而忘其初又疾夫作法

者類藉口慕古而罔所辨也作
原始原始者推始作也一事自
爲一始上自天皇下至當代大
自六經微至百家窮蒐博采字
宙內事無論鉅細必載厥始附
以已說匪徒以資探索亦從古

得失之林所以自鏡也染翰之
士得是書覽觀豈直曰發錦囊
登武庫如衣裳之有冠冕水木
之有本源其於適道幾矣昔楊
子雲草太元桓譚謂必傳後左
太冲著三都賦洛陽紙價頓高
彼談天元雕龍賦靡適世用然
猶爾爾以予觀原始度越楊左
矣殺青甫竟愛而傳者必廣又
何待久而後重於世邪

嘉靖壬戌十二月朔

賜進士中憲大夫貴州按察司

提學副使高安况叔祺謹撰

古今原由述意

原如去何謂始作也古人因時立制以開物成務不能無作、皆聖共事也始有不得不作者有可以無作而作者如耒耜焉而畊機杼焉而織宮室焉而居干戈焉而衛此其功與天函地負者將也安知其後弓矢造文緯、澗峻宇離墻之飾盈野成川之塼哉作者如此宮猶若是况

其官乎故昔人有言曰勿為禍先勿
為福始夫禍先誠不可為矣福始
延而不可為此其意遠矣是以孔子
作春秋於初稅畝作丘甲皆謹書
之所以示誡也其自爾而曰述而不作
信而好古祀不絕作也不述作也作非
自三代以下毋多論以建言一事之
之唐虞惟百夏商侯之周則三百
六十下逮秦漢自佐史以至於丞相

十三萬之百八十五人可謂備矣其治
反不若前之蓋以官逾多而事逾繁
也乘其後者不知補偏救敝益復
更張以求隸前之所為斷天下之
樞而盡散之其實官不可隸之也
矣此五原如所由作也所載皆一事自
為一如後所踵襲而行者其末也官
善有不善亦自可攷境寫

素請王咸各相國趙錢書

古今原始後序

方生讀古今原始廢然而嘆嗟
乎事之不能不代有始也人之
不能不代而始事也吾惡知所
尾閭哉吾聞善始者始道不始
事始乎道治始也始乎事敝始

也上古聖人因時立制鑿燧浮
竅木建棟宇鑄首山金則九牧
墳埴要不過搏抔天地節五部
以宜民性乃其後至乎雕橑畫
鷁阿房昆明土涸膏金折廉慨
古者始太息于斗衡符璽之為

盜資必剖折焚破而後快以古
之權輿于道而猶若是矧事始
以師始其所底止吾惡乎知之
大道茫茫蓋無始矣無始故無
終無終故無敝易曰乾知大始
彼其因彙貸化確然示易貞元

自禪功成不尸則始而未嘗有
始也其始無始其終亦無終故
萬物資焉日新不已古聖人法
乾馭世迫而起酌而應無為而
成豈與今人可以無始而始者
同日語乎噫此古今世道之所

由升降也世運之冥移天與人
共造天為造人為因人為造天
亦為因三代而後其綦盛者其
造事十九而臧其綦晉也十九
而紕不然薄愆或以開釁片善
或以貽休作者何心揆其終殆

操右券而責何也倘所謂損益
盛衰之始耶嗟乎縷成幕隙成
坎燼火燎原濫觴注海吾畏其
卒安得不怖其初漆器胡諫儀
狄胡踈象箸胡以唏古人非懼
首事懼徧于道而防其漸耳趙
中丞之慮遠矣哉是書出不獨
談天謝閔博物遜淹固知後世
必有子雲矣

萬曆己亥春仲桐國方學漸書

目錄

一卷

天皇氏 地皇氏 人皇氏 辰放氏

有巢氏 無懷氏 燧人氏 軒轅氏


赫胥氏 葛天氏 朱襄氏 陰康氏

伏羲氏 女希氏 伊耆氏 古皇氏

神農氏 有熊氏

二卷

金天氏 高陽氏 高辛氏 陶唐氏



有虞氏

三卷

夏禹

啓

太康

少康

履癸

四卷

商湯

太甲

太戊

仲丁

盤庚

陽甲

祖乙

武丁

帝乙

紂

五卷

周文王

武王

成王

穆王

孝王

夷王

厲王

宣王

幽王

平王

莊王

僖王

襄王

定王

景王

靈王

敬王

元王

貞定王

威烈王

顯王

赧王

六卷

秦始皇

二世

七卷上

漢高祖 惠帝 文帝 景帝

武帝 昭帝 宣帝 元帝

成帝 哀帝 平帝

七卷下

世祖光武 明帝 章帝 和帝

殤帝 安帝 順帝 質帝

桓帝 靈帝 帝協

八卷

三國 晉武帝 惠帝 元帝

成帝 明帝

九卷

南北朝

十卷

唐高祖 太宗 高宗 中宗

睿宗 玄宗 肅宗 代宗

德宗 憲宗 穆宗 敬宗

文宗 武宗 宣宗 懿宗

僖宗 昭宗 昭宣

國家圖書館, NATIONAL CENTRAL LIBRARY, TAIWAN, R.O.C.

十一卷

五季

十二卷

宋太祖

太宗

真宗

仁宗

英宗

神宗

哲宗

徽宗

欽宗

高宗

孝宗

寧宗

度宗

十三卷

元世祖

仁宗

文宗

順帝

十四卷

明

古今原始目錄終

國家圖書館, NATIONAL CENTRAL LIBRARY, TAIWAN, R.O.C.



國家圖書館, NATIONAL CENTRAL LIBRARY, TAIWAN, R.O.C.



古今原始第一卷

天皇氏

初制干支之名

按十干曰闕逢旃蒙柔兆彊圉著雍屠維上
章重光玄默昭陽十二支曰困敦赤奮若攝
提格單閼執徐大荒落敷群協洽涖灘作噩
閹茂大淵獻天皇氏居天子之位乘天之初
開卽立十干以定歲又立十二支以定時歲

桐城趙鈇鼎卿著

時既定民始知天道之所向矣後改名十干
曰甲乙丙丁戊己庚辛壬癸改十二支曰子
丑寅卯辰巳午未申酉戌亥而義意淺矣或
曰用以紀日不以紀年也
地皇氏

天事

定三辰分晝夜以三十日為一月

按自此定月而朔望分矣

人皇氏

分山川為九區

地事

按疆域始于此

始有夫婦

人道從此立矣

辰放氏

教民搗木茹皮以禦風霜絢髮閨首以去靈雨

按自是始有衣皮之民不復衣薪矣

有巢氏

構木為巢

按巢居始此避鳥獸之害也

人事

人事

人事

政事

刻木結繩以爲政

按記事始此

無懷氏

禮事

無懷氏之民世用本平於是陞中泰山以宗天
禪云云以復墜

韓氏以爲自古封泰山禪梁甫者萬有餘家
仲尼觀之不能盡識管子亦曰古封泰山七
十二家夷吾所識十有二焉首有無懷氏今
古書亡矣不可備論此皆臆說也而許懋論

之盡矣其言曰舜柴岱宗是謂巡狩而鄭引
考經鉤命決云封于泰山考績燔燎禪于梁
甫刻石紀號此緯書之曲說七十二君燧人
之前世質民淳安得泥金檢玉結繩而治安
得鐫文告成妄亦甚矣若聖主不須封禪若
凡主不應封禪秦始皇嘗封泰山孫皓嘗封
國山皆由主上好名臣下阿旨非盛德事也
故文中子曰封禪非古也其秦漢之侈心乎
燧人氏

人事

鑽木取火教民烹飪

按五行之火至是始用於世夫空中之火麗木則明惟聖人能知之亦惟聖人能利用之其用在火烹以利民而不知焚山煮海鎔金銷石草木之殃從此始矣夫火以薪傳其用不窮而聖人於五時取五木不亦勞乎按周公四時變火以救時疾明火不數變時疾必興故晉時有以洛陽火度江者代代相續火色變青師曠食飯知爲勞薪以此推之新火舊

地事

火理應有異然後知聖人作法至深遠也今人作事鹵莽此何難行縱民間不能頓同而尚食內厨當作古法即毋論順時採惠亦師古之一端也

仰觀俯察而方名

方名即東西南北是也

器事

造火竈

竈始于此

食事

燔肉曰炙爨肉而燔之曰炮

物事

此肉食之始人自是無腹疾矣

注物虫鳥獸之名

正名百物始此

事

為髻

用髻始於此實錄曰舜加首飾文王又加翠
翹步搖此首飾之漸也

禮事

制尊卑之禮

禮始于遂皇

政事

立傳教臺

禮事

按教令始此

制男子三十而娶女子二十而歸

始有婚姻之期

立四佐命明繇政乎陞級畢流辨乎方色成博
受乎古諸隕齒錄乎延嬉

按至是始有君臣而後之佐相始此

軒轅氏

見轉風之遂不已於是作乘車招輪璞較橫木
為軒直木為轅故號曰軒轅氏

器事

此車之始也

赫胥氏

造梳以木爲之二十四齒

此櫛髮之始也後緣此爲筮總名之曰櫛而冠筭兆于此矣

葛天氏

三人持牛尾投足以歌八曲一曰載民二曰玄鳥三曰育草木四曰奮五穀五曰敬天常六曰徹帝功七曰依地德八曰總禽獸之極

此歌曲之始也

朱襄氏

見諸陽不成百物解散乃令士達作五絃之瑟以來陰氣以定羣生名曰來陰

按瑟始於此絲音作矣

陰康氏

元氣肇分災沴未彌民多重腿之疾思以通利關節始制舞

舞自康氏始也古以宣氣導和昭德紀功而

器事

事

事

事

後之曳長裾飄大袖者謂之可哉

大昊伏羲氏

庖犧氏風姓

按姓始於此後稱黃帝吹律定姓則又因生賜姓之始也風俗傳云張王趙李為黃帝賜姓

天出文章河出馬圖於是觀象效法兆三畫著八卦

按易之教始此此所謂先天之易也

地事

作都于陳

按建都始此

天事

視五星之文分野之度

立周天曆度始此

禮事

封土為社

此社之始也

樂事

其樂名曰扶來

按樂音始於此非始於咸池也

藝事

作九九之數以合天道天下化之

數學始此

作甲歷

按六甲十二辰始此自甲歷作而天道以周歲運可紀日月可齊晝夜可通東西南北可辨人始知所以用天矣

制嫁娶以儷皮爲禮

按婚禮始此

以龍紀官

按官名始此後或以雲紀或以火紀或以鳥

紀或以事立皆原於此而君臣上下之事立矣

結網罟以教佃漁

按山澤漁獵之利始此特禽獸逼人故聖人教民以佃平地多水故教民以漁因物爲養也而莊子曰弓弩畢弋機變之知多鳥亂於上削格羅落罟罾之知多獸亂於下鈎餌網罟罟罟之知多魚亂於水則又指是爲病物罪未流者也然不知古人有義意焉所以爲

天事

禮事

人事

器事

田除害也故天子諸侯無事則歲三田無事而不田曰不敬田不以禮曰暴天物故不合園不掩群不卵不胎不斫天不覆巢豈若後之禽荒忘返者哉然其流必至是甚矣混沌之不可鑿也

案事

灼土爲埴

此埴麓之始也

案事

作簫十二管

或云舜作十管長尺二寸參差其形以象鳳

翼

案

設九庖之官

此庖人之始也

政事

立仲起司陸陽侯司海

志災異察虛實故設神以司之

會

養犧牲以充庖厨

按陳殷曰牛羊豕曰牲至是則野產而家畜也後世庖厨始此然古猶有制焉末日暴殄是以君子遠庖厨惡其殺也伏羲因此又曰

庖犧氏自養之而自食之人無逐獸之擾物亦因人以生兩利之矣然君子寧為孤犢不願為犧此心云何用物者宜慎諸

造琴

按琴音始此夫琴者禁也以禁止邪心瑟者閑也以懲忿窒慾古人之取義遠矣下逮謠俗迺有緣綺鳳凰者流謂之何哉

女希氏

始作笙簧

按笙簧始此

笙張雲幕而枚占神明

此帷幕之始也

女媧之女以荆釵及竹為簪

此簪釵之始也

隨作竽

隨希氏之臣也始有竽

伊耆氏

為蕢桴土鼓葦籥

樂事

樂事

樂事

樂事

樂事

樂事

神事
鼓籥所由作也

作蜡祭

按蜡祭始此蜡臘之別名也臘接也新故相接故臘以報百神蜡之爲祭所以報本反始息老送終也主先嗇始爲稼穡者也曰司嗇修明稼穡之政者也曰農傳世業以授於我者也曰郵表畷者畫疆分理以爲準者也曰猫虎者能除鼠豕以害吾稼者也曰坊者昔爲隄防以禦水患者也曰水庸者昔爲畝澮

溝洫以備旱者也曰昆蟲者能除昆蟲而有功於我者此皆爲田農設也古之一夫盡力田里生蒙其利沒享其祭後世一切反此而先王神道設教之意替矣先農之祭寔起于此

神事
蜡祭文曰土反其宅水歸其壑昆蟲毋作草木歸其澤

按後世祭用祝文皆原於是

古皇氏

事

因木處而顛始編槿而廬緝藿而扉填塗茨翳以避獸禽之害

按廬居始此猶未有棟宇

炎帝神農氏

神農生於列山之石室生而九井出焉

始稱井此天井也所謂穴地而出水也又云

黃帝正名百物始穿井傳稱伯益作井龍登

玄雲神棲崑崙能愈多而德愈薄矣

作耒耜以教耕藝

事

按農事之興始此此聖人所以易佃漁也自粒食之源一開而民得安樂不與禽獸爭一且之命矣

事

作鉏鋤以墾草萊以教天下播種嗣瓜瓞之實而省殺生之敬

鉏鋤作始有諸飲食

事

立曆日正節氣審寒暑為早晚之節以治農功

曆日初創於此始分為八節

埏埴以為器

事

器事

此陶器所由始聖人以木器液金器腥人生於土而食於土故用陶器而人壽作斧斤

文事

此斧斤之始也而山林之害兆于此矣作穗書放時令

穗書始于此

蓍事

命司怪主卜巫陽主筮

設官主卜筮之始

天事

制請雨之法蓋南置水掩骼埋胔以待天澤

求雨之法其來遠矣

物事

宿沙氏煮海爲鹽

鹽之始也

神事

神農之世紀明堂有蓋而無四方

明堂始于此

藝事

嘗百草作方書

按醫藥始此夫草木與人異類也治病亦何取於是蓋物與人本一氣而生故草木之實可以養人則亦可以治人但人得其全草木

得其偏偏則其氣專一故取其專一者以補以攻皆有利益此聖人之所以爲神也後人能全其天年而無夭札孰知其自哉

造干戈以飾武

按干戈始于此用之以征諸侯之不廷者呂氏云蚩尤造五兵此其一也而兵從此興矣爲日中之市

按市商始此聖人設法合物以通有無本以濟人不求過利後以商賈主之而利源大開

于是輕去農畝聚居市肆巷列于所羅居百族街衢相望壑斷求獲率能目語額瞬談智於尺寸之間窺窬于分毫之末而賢者亦曰刺繡文不如倚市門此征商之所由起也是以古人必立司市之官以治教政刑量度禁令故價平民無競心後世惟知權稅無復古意爲許行者有物無二價之說蓋有激云

黃帝有熊氏

徵師諸侯誅蚩尤于涿鹿

按徵兵始此當淳古之時迺亦有蚩尤者毋怪乎後世誅戮相尋也

帝誓剪蚩尤乃齋三日以告上帝

此齋戒之始也

黃帝與蚩尤戰常有五色雲氣金枝玉葉止于帝上有花鵲之象故作華蓋

華蓋始於此

命風后為侍中

侍中官名始於此

葛天廬之山發而出金蚩尤制之以為劍鎧矛戟

此五兵之始也鎧亦曰甲亦曰介亦曰函皆堅重之名也函人作法萬世師之經云佳兵不祥者遠矣

立五行起五部

金木水火土之名所由始也

有李法命

此兵法之所始也李者法官之號總主刑罰

禮事

冠事

命

云事

地事

武事

征伐之事故稱其為李法

風后演握奇圖置虛實二壘力牧亦創營圖
此營壘所由始也

始立井田之法因以制兵故井分四道八家處
之其形井字間方九為立為陣法四為間地所
謂數起於五也虛其中大將主之環其四面諸
將連統此所謂終于八也及乎變化制勝紛紛
紜紜闖亂而法不亂渾渾沌沌形圓而勢不散
所謂散而成八復而為一

此陣法所由始

郊祀志黃帝接萬靈明庭

堂下至門謂之庭庭名始于此

南人乘白鹿來獻壺

此夷國來獻之始

帝與蚩尤戰涿鹿野蚩尤作大霧兵士皆迷於
是作指南車

指南車始於此

設靈臺立五官以敘五事命鬼臾區占星義和

占日尚儀占月車區占風闕苞授規正日月星辰之象

按星官之書始此爾雅所記十二次與二十八舍之度皆軒轅初之

命大撓占斗柄所建作甲子

按六甲枝幹相配以名日而定之以納音始此

立史官

按史官始此

創觀漏水

此漏刻之始也三代因以命官則挈壺民其職也後世或下漏或浮漏或浮刻或輪漏盛權衡制作不一皆始于此

立容成爲樂師

司樂設官始此

作軍樂凱歌

後回軍有樂即其意也

使祝融辨南方爲司徒

司徒之始也

使大封辨西方爲司馬

司馬之始也

后土辨北方爲李

李獄官也後世名曰大理本此此黃帝所謂
六相也

命容成作盖天及調歷

按盖天卽渾天儀也其術以天下半覆地上
半在地下渾渾然也法減于秦漢武時洛下

閔始經營之此璣衡之所由始

以風后配上台天老配中台五聖配下台爲三
公

以三分配三台始於此

造蹴鞠

按黃帝所造本兵勢也或云起於戰國鞠與
毬同古人蹋鞠以爲戲耳

蒼頡睹鳥跡作書契代結繩之政

按文籍始此世記曰黃帝命蒼頡造文字天

雨粟鬼夜哭信斯言也鬼神先畏之矣自秦
用八體漢興草書典籍彌繁官事荒蕪兼功
並用愛日惜力去古遠矣
命隸首定筭數以率其餘要其會而律度量衡
由是而成

此枰尺斗斛所由起也

命伶倫截竹制箛爲黃鐘之宮生六律六宮候
氣之應立宮商角徵羽之聲

按五聲六律之制始于此

冠事

於則作扉履

此履之始也草曰扉麻皮曰履履下植木曰
屨至宋元嘉始有鳳頭等履末流可勝嘆哉
帝張咸池之樂有炎氏爲之頌曰聽之不聞其
聲視之不見其形充滿天地苞裹六極
此頌之始也

冠事

命甯封爲陶正赤將爲木正以利器用

按此器械之始也自是而土木之用徧天下
矣夫撲散爲器其用不窮古人猶云大制不

冠事

割則亦傷之矣

采首山之銅鑄鼎

按鑄金始此

得奇獸名曰夔取皮以冒鼓

皮鼓始于此

使伶倫造磬

磬始于此

作旃

通帛爲之

冠事

作冕旒正衣裳

按冠冕衣裳之制始於此夫上古衣帽毛皮至是以布帛爲之先上以制衣後下以制裳故易曰黃帝垂衣裳而天下治當時九章至舜十二章而服制備矣

樂事

命工人垂造鐘一曰清鐘大音二曰赤鐘重心三曰黃鐘洒宮四曰景鐘昧其明五曰黑鐘隱其常

按金聲始此夫倭古之巧工也後周鼎著倭

武事

使翫其指何以明大巧之不可為也

命輝弦木為弧夷牟剡木為矢

按射始此古人以示威天下而亦以是論德

男子之事莫重於此故生而懸弧以示志

與炎帝戰以鵬鶚鷹為為旗幟

此旗幟之始也

武事

采百山之金鑄刀

此刀之始也

武事

制陣法出軍決有所攻伐作五采牙幢

武事

按五采者青牙引東赤南白西黑北黃中萬世不能易也

命岐伯作鼓吹鏡角靈鞞神鉦

按鼓吹始此鼓吹以驚衆鏡以止鼓角以立

號聲以當雷霆鉦以擬電聲皆軍中樂也

武事

命共鼓化狐剡木為舟剡木為楫以濟不通

按舟楫始此淮南子曰古人見竅水浮而作

舟楫而其利浮於輿馬矣

武事

作臺于西王母山

國家圖書館 NATIONAL CENTRAL LIBRARY TAIWAN R.O.C.

冠事

此臺所由始也古天子有三臺靈臺以觀天文時臺以觀四時施化圓臺以觀鳥獸魚鼈諸侯卑無靈臺但有時臺圓臺而已

內傳曰黃帝既與王母會于王屋乃鑄大鏡隨日用之

鏡始于此西王母之稱其來遠矣

拿

使太常爲廩者

後廩人倉氏皆原於此

冠事

作大輅以行四方

按輅制始此古者以肩背任其勞甚矣自是服牛乘馬任重致遠以利天下後少昊則加牛奚仲則加馬禹又建旌旗旂旒以別尊卑等級而車輅之制大備吾讀甄玄成之賦感焉其言乘車之樂如此後迺有人車者則又以人爲畜罪也甚已

帝遊幸天下有記里鼓

封堠始於此

帝聽鳳阿閣之下始造十二律

地事

地事

閣名始此

退居大庭之館齋心服形

初名館

作宮室以避寒暑

按宮室之制始此夫上棟下宇以待風雨其視穴居野處者何如不知適於木者此其漸矣真可一嘅

作合宮祀天地祀天圓立牲玉取蒼祀地方澤牲玉取黃

禮事

按祀天地始此員邱方澤之義自上古已有之

作明堂中有一殿四面無壁以茅蓋週水環宮垣爲複道上有樓從西南入

此樓之始也

著陰符經

始有經或云後所傳者偽書也

命俞跗雷公察明堂究血脉

始鍼灸

醫事

文事

軍事

軍事

軍事

藝事

容岐伯作內經定本草巫彭桐君處方餌

按岐伯黃帝大醫也夫古之人上窮下際察五氣立五運洞性命紀陰陽病與藥值唯用一物攻之今人以情度病多其物以幸有功譬獵不知兔廣絡原野冀其一獲術亦踈矣改醫莫先於切脉虛著方劑妄也

政事

范金為貨制金刀立五幣以制國用

按貨幣之制始此

地事

風后受圖割地播九州置十二國

九州地圖始於此

文事

黃帝內傳題錢鏗得於石室劉向校書得之

作傳之始

文事

作巾凡之銘曰毋弇弱毋俛德毋違同毋傲禮毋謀非德毋犯非義

作銘始此

文事

陟王屋而受丹經

稱丹經始此即太公所授武王者

文事

帝齋七日至翠嬀之川魚沂流而上汎白圖蘭

葉朱文以授帝與天老迎之舒視之名曰錄圖
此圖之始也

神事

黃帝問伯高曰吾欲陶天下以爲一家爲之有道乎曰上有丹砂者下有黃金上有慈石者下有銅金上有陵石者下有鉛錫赤銅上有赭者下有鐵此山之見榮者也謹封而祭之去山十里爲一壇使乘者下行者趨

此壇之始也

文事

帝使史甲作戒著盤孟書二十六篇

此著書所由始也後之訓戒始此

禮事

帝得玉一紐治爲墨海其上篆文曰帝鴻氏之
硯

硯自黃帝時已有之

食事

蒸穀爲飯烹穀爲粥

此粥飯之始也

地事

經土設井以塞爭端立步制畝以防不足

按井田之制始於此其制今不可復見矣昔
人有不幸晚生之嘆以此

立西陵氏之女螺祖為元妃

按立妃始此次妃嫫姆洎形魚氏雷氏為四妃

教民蠶

按絲繭之利始此自是足供衣服而天下無
皺疥之患矣然古人原蠶必禁衣帛限年有
制存焉後漸侈豔無度人生財用以綺縠盡
者十居三四而上之括於民間者尤為不經
反使論者傷之曰伐桑滅蚕民不凍死是其

言有足感人者噫

伯余初作衣絲麻索綾手經指絳後為機杼此
機杼之始也民始知織

鳳凰巢于閣麒麟巢于囿

按鳳凰麒麟始見于此囿園黃帝時已有之
重門擊柝以備不速客

擊柝起于此

黃帝採首山之銅鑄鼎于荆山之下鼎成有龍
垂胡鬣下迎帝乃昇天羣臣百僚悉持龍鬣從

帝而升攀帝弓及龍髯拔而弓墜羣臣不得從
仰望帝而悲號故後世以其處爲鼎湖名其弓
爲烏號焉

嗚呼此列仙之始也劉向稱帝之前有赤松
子寧封子馬師皇赤將子與其信有之否耶
若黃帝則古今爲稱首焉

地事
畫野分州得百里之國萬區命匠營國邑置左
右太監監于萬國
此封建之始也官以監名本此

冠事
命羣臣列圭玉于蒲蒲席上
始有席韓子曰禹爲蔣席積綠此彌侈矣

冠事
爲釜甑
古史考曰黃帝始爲釜甑而火食之道成矣

古今原始第一卷終

此書分十三類天
地人物禮樂刑政
文云卷終



國家圖書館, NATIONAL CENTRAL LIBRARY, TAIWAN R.O.C.

古今原始第二卷

少昊金天氏

帝王世紀曰帝名摯字青陽

據此則字始于金天氏

有九農正

農官始於此後無專官養道廢矣

始制浮磬

按石音始此

桐城趙氏



國家圖書館 NATIONAL CENTRAL LIBRARY, TAIWAN, R.O.C.

顓頊高陽氏

祀共工之子句龍為社烈山氏之子柱為稷

社者土地之主稷者五穀之長所以為萬民
求福拜功之道也句龍柱配記者耳

命五官木正曰句芒金正曰蓐收水正曰玄冥
土正曰句龍火正曰祝融

按五官始于此因五行而立也

造伏龍城

按城始於此

命南正重司天北正黎司地以屬神民

按分禮天地始此時九黎亂德民神雜揉家
為巫史無有要質互相侵瀆災害荐臻廼絕
地天通以正民俗噫淫祀害民其來久矣

以斗杓建寅之月為歷元是時五星會於營室
冰凍始泮蟄虫始發雞始三號天曰作時地曰
作昌人曰作樂鳥獸萬物莫不應和故顓帝為
歷宗也

按以孟春之月為元始此

設玉兆

卜筮先王所作未有玉兆瓦兆原兆之名至
顓帝始設顓帝玉兆象其玉帝堯瓦兆象其
瓦

乘結元之輦巡四海

稱輦始此

高辛氏

歷日月之生朔而迎送之

此朝日夕月所由起也

毛傳曰姜嫄從帝祠郊禡

祀高禡以求子求子始此後以高辛氏爲高
禡以其生子有嘉祥

帝堯陶唐氏

立羲氏和氏世掌天地之官

天官始於此

分命羲仲平秩東作羲叔平秩南訛和仲平秩
西成和叔平在朔易

按設官分理春夏秋冬始此重授時也

定春三百有六旬有六日以閏月定四時成歲
按置閏始此始以天爲天歲爲歲立差法以
盡變

有進善之旌

古人揚旌求士也

置敢諫之鼓

後用諫鼓始於此

堯有汚池理水停船此池

汚池堯之時已有之漢作昆明因其制而深

廣耳

立韜虛盈云帝堯王天下民有孝慈者受敬之
盡力農桑者慰勉之旌別淑德表其門閭

旌表門閭始此

堯之有天下粢糲之飯藜藿之美

美自堯時已用之

王韶之始興記堯山下有亭基十餘處曰堯故
亭

據此則亭堯時有之

建國凡五等曰公侯伯子男

封爵五等始于唐殷三等周復用五
堯居于衢室之中輯五瑞以見羣后

按五瑞公執桓圭侯執信圭伯執躬圭子執
穀璧男執蒲璧此秉圭之制上古已有之

分置公伯

五官之長曰伯官以伯名起於此

色尚白

後之帝王車旗服色各有所尚始此

墨子曰堯飯土盞

則簠簋始於唐

與羣臣沈璧于河乃作握河記

記之始

握河記堯封稷契皋陶賜姓號

始有封爵

元命苞云唐虞立五廟二昭二穆以始祖而五
宗廟之祀起于唐虞

博物志曰堯造圍碁以教丹朱

以此為教何也恐傳之者誤耳
設誹謗之木

後謂之表木即華表也

飲以衢尊

尊彛所由起

以親九族

宗戚始此

作橋

服虔曰堯作橋交午柱頭

堯治天下五十年遊於康衢兒童謠曰立我烝
民莫非爾極不識不知順天之則有老人擊壤
而歌曰吾日出而作日入而息鑿井而飲耕田
而食帝力何有於我哉

按童謠始此

命鯀治水

按治水始此

堯讓天下於許由許由耻之逃隱

隱士始聞于此

鮌築城以衛君造郭以守民

按在內曰城在外曰郭此都城造城郭之始也

禪位于舜

按禪位始此

帝舜有虞氏

舜尚見帝帝館甥于貳室

娶天子之女謂之尚始于此

類上帝禋六宗望山川徧群神

按初即位祀天地六宗山川群神始此

覲群后輯瑞班瑞

按初即位群侯來朝始此

五載一巡狩群后四朝

按巡狩朝覲之制始此

東巡守至于岱宗柴望秩于山川

祭泰山始于舜而後之封禪或原于此

群后四朝敷奏以言

此奏事之始

明試以功車服以庸

賜車服始此

五玉三帛二生一死贄

按贄禮始此

修五禮如五器

始稱五禮

肇十有二州

分天下爲十二州始此

封十二州山

按封山表鎮始此

作南風之詩

按詩之教始此

正月元日受終於文祖

廟號自唐虞已有之

舜爲天子黃龍負圖封兩瑞有璽文曰天皇符
璽

按璽古者尊卑共之或云起于三代

有虞氏養國老于上庠養庶老于下庠

上庠學也下庠小學也董仲舒曰五帝名太
學曰成均則虞庠近是也

封象于有庠使吏代治之而納貢稅象不得有
爲于其國

後諸侯王予以祿而不予以權寔原于此

觀古人之象日月星辰山龍華蟲作繪宗彛藻
火粉米黼黻絺繡

文繡之功唐虞已有之矣但古人用有制耳
自羲和後分爲八伯舜既卽位巡狩每至其方
各貢兩伯之樂伯夷爲陽伯樂舞侏儻歌曰招
陽羲仲之後爲羲伯樂舞襲哉歌曰南陽弃爲
夏伯樂舞漫哉歌曰祁慮羲叔之後爲羲伯樂
舞將陽歌曰朱華咎繇爲秋伯樂舞蔡俶歌曰
零落和仲之後爲和伯樂舞元鶴歌曰歸來垂

爲冬伯樂舞丹鳳歌曰齊樂

樂之有歌有舞自古有之

二十八載堯乃殂落百姓如喪考妣三年

按此則三年之喪古已有之

命禹爲司空

按司空之官始此

賜禹姒姓稷姬姓契子姓

賜姓始於此

命垂爲共工命益爲虞

按工虞之官始此後兼統于司空

命伯夷爲秩宗典禮

按宗伯始此

命后夔典樂教胄子

按重胄子始此古之爲教也以聲樂今之爲教也以訓詁古之教也從性情入今之教也從口耳入此人才所以不逮乎古也

命龍爲納言

按銀臺司之官始此

命皋陶爲士師

卽後之大理也三代法官之名夏曰大理也
皋陶造獄置法律

墨刑荆宮大辟五刑始於此

流共工于幽州放驩兜于崇山

流放之刑始此

金作贖刑

贖刑始見於此

鞭作官刑朴作教刑

此笞杖之始也

青災肆赦

始言赦謂赦其罪非後之詔赦也

五流有宅五宅三居

後之三流始于此

作鞞以尊祭服

上古蔽膝之法象冕服謂之鞞朝服謂之鞞
也鞞一曰芾夏后氏山殷火周龍章

舜游巖廊之上被袵衣而鼓五絃之琴畫日月

于太常

太常始於有虞

秦之先大費與禹平水土舜曰咨尔費贊禹功其錫尔阜游

阜游始此

樂之初擊祝作之樂之末戛敔以止之

此木音也

作瓦棺

此棺之始也

作崇牙

崇牙懸樂器者刻木爲之飾以采色夏曰龍龔殷周之周曰辟玉

作兩敷

敷宗廟盛黍稷之器夏之四璉殷之六瑚周之八簋皆是也

三載考績三考黜陟幽明

按三考九考之制始此

賞延于世

此世廢之始也

西王母獻玉琯作笙十三簧象鳳之身

說文謂舜始有

山海經曰稷之孫叔均始作牛耕

牛耕其來久矣非始於趙過也

唐太宗曰舜作漆器而諫者十七人

器之布漆自舜始

地平天成六府三事允治

稱府始此后有司土司木司水司草司器司

發典司六職謂天子之六府周則曰太府內

外玉泉府皆原于此

禹濬畎澮距川

此後遂人之職也

作室築牆茨屋令人皆有家室

此牆壁所由始也

作五明扇

按扇始此

帝庸作歌曰勅天之命惟時惟幾乃歌曰股肱

喜哉元首起哉百工熙哉臯陶拜手稽首颺言
曰念我率作興事慎乃憲欽哉屢省乃成欽哉
乃賡載歌曰元首明哉股肱良哉庶事康哉又
歌曰元首叢脞哉股肱惰哉萬事墮哉

按此爲賡歌之始

周成王問周公曰舜之冠何如曰古之人上有
帽而勾頷

帽古有之

封伯禹於有夏封四岳於有呂封契於商封棄

於邵

按分封始此

命伯禹徂征有苗誓師

按征苗始此虞時已誓師矣

官占惟先蔽志昆命于元龜

古人舉事必卜用龜始見于此

有虞四時之祭春曰禴夏曰禘秋曰嘗冬曰蒸
其祭尚氣

四時之祭始著于虞

庶頑諛說侯以明之

射侯以觀德始見於此

又曰書用識哉

紀錄功過始見於此

歸格于禴祖用特

始稱禴祖

明堂曰有虞氏以蜩俎

謂斷木爲四足無文飾也俎始于虞夏以巖

殷以楛周以房俎

有虞氏之旂

旂見于虞

泰有虞氏之尊

尊始于虞山壘夏后氏之尊著殷尊犧象周

尊虞氏尚陶泰瓦尊也著者無足而底著于

地也

有虞氏祭首

三代各祭其所勝夏祭心殷祭肝周祭肺

舜相堯二十有八載

唐虞時稱載

禹臯陶相與陳謨

此人臣獻言之始也

虞夏傳曰維十有五祀記者貳尸日月有常星辰有行四時順經萬姓允誠於予論樂配之天靈遷于賢聖莫不咸聽襲乎鼓之軒乎舞之精華以竭褰裳去之

據此則又稱祀祀與載古並用之乎此所謂慶雲之歌也因瑞作歌其來遠矣

高堂隆云虞夏喪以奇年畢則禘亦常在奇年偶年畢則禘亦常在偶年

按古者三年喪畢皆合先祖之神而享之以生有慶集之懽死應備合食之禮緣生以事死故有禘之享

禘黃帝而郊嚳

按禘郊之祀始見於此禘者宗廟之殷祭郊即園邱之祭以所在言之謂之郊以所祭言之謂之園邱言邱者本諸天地之性也祭法

所謂燔於泰壇即園邱也禘者王者禘其祖之所自出諸侯只及其太祖大夫有功始禘其高祖故曰不王不禘鄭康成謂祭昊天于園邱曰禘祀太一五帝於南郊曰郊而六天之祀叢雜甚矣夫祀天莫大於郊祀祖莫大於配天故郊之祭也人報本反始然必有文以示外心之勤有質以示內心之敬郊日必至未有不躬焉者自秦始有三歲一郊之制漢高惠二帝未嘗親郊文帝在位二十三年親郊雍時及渭陽五帝各一而已惟武宣以求仙成帝以求嗣三君視郊頗多而清心無求者則頌之祠官遣重臣修故事而已說者又謂古者齋居近儀衛省用度約故一歲偏祀而國不費人不勞今齋居遠儀衛繁用度廣賜予多故歲難二郊則又就簡便而失尊奉之嚴矣

鷄林子曰嗟乎吾嘗觀萬始未始之先以及乎萬始有始之後然後知聖人所以參

用天地開始萬物其功茂矣然亦私憾夫
天地之於人其全之反不禽獸昆蟲若也
夫禽獸昆蟲或命之羽命之毛命之鱗介
莫不物物備具得以自生自育安於無為
而爲之人者廼獨裸生而又攻以寒暑盪
以風雨困以饑寒迫以禽獸苦以疾病若
非聖人則人之類滅久矣噫此固天地之
所以全吾人也夫禽獸昆蟲予之偏惟人
予之全偏予者蔽故私其形全予者通故
私其神全形者愚愚則無為全神者智智
則有用無為者樸有用者巧以樸賦物以
巧賦人此天地意也而聖人始以巧競于
天下矣何則寒裘暑葛具始與天時競矣
上棟下宇具始與風雨競矣畢弋罟罟具
始與禽獸競矣網罟罟罟具始與魚鱉競
矣溝澮田里具始與土地競矣刀鋸具始
與山林競矣舟楫具始與江河競矣是以
雖無羽毛鱗介而禽獸昆蟲反爲人用故

曰得其道則造化在我固吾人所以善用
天地天地所以善用吾人非競也因之也
上以因天下以因地遠因物近因身天地
所不能全而欲人全之也是不得然而然
也是謂裁成輔相之道也夫既望之以裁
成輔相而又爲禍患災害傾覆使成者毀
完者裂華者敝盛者衰有無相尋殃祥相
仍若不可測何此又惡夫盡用其巧者也
夫盡用其巧者罪此又天地所以仁萬物
也故大智去智返本還樸以全其天也天
全者有爲而未始爲有用而未始用有始
而未始始者也噫吾安得無始者而與之
論道哉



國家圖書館, NATIONAL CENTRAL LIBRARY, TAIWAN, R.O.C.

五
十
七

古今原始第三卷

夏禹

定九州之賦如冀州上上錯徐州中中兗州厥賦貞作十有三載乃同之類

按禹以三壤成賦後田賦九則本於此

定九州之田如冀州中中兗申下徐上中之類
田分九等始此

辨九州之土冀土白壤兗土黑墳徐土赤埴墳

之類

土色見此

始制貢貢漆貢絲貢織文貢鹽貢絺貢海物貢
象貢鉛貢松貢恠石貢五色土貢翟貢桐貢浮
磬貢蠙珠貢魚貢金貢瑤琨貢篠簜貢齒草羽
毛貢木橘柚貢柶幹栝栢貢礪砥砮丹貢菌簠
楛貢菁茅貢大龜貢磬錯貢紵貢鏐鐵銀貢熊
羆狐狸貢織皮貢球琳琅玕

按制貢始此

冀州夾石碣石入于河兗浮汶達濟徐浮淮泗
達河楊沿江海達淮泗云云

此運道所始但不言漕耳

君臣皆佩玉

至周始有等天子白玉公侯山玄大夫水蒼
世子瑜玉士璫玟是也

始用寅正

按以寅爲歲首始此

作小正之書

即月令也孔子欲行夏時蓋取時之正與令之善耳

始作箴

箴者取規諷之義若箴之療疾墨子著書取虞書予違汝弼汝無面從退有後言稱夏箴之辭後用韻語末云敢告云云

禹治水時神龜負文列于背有數自一至九禹因而第之

此洪範九疇之始也

作世室

夏以太廟爲世室后稱世室以此始立甸服侯服綏服要服荒服每服五百里

按五服之制始此

彘狄作酒

按酒始此從此天下被麴蘖之毒矣禹一飲而遂絕之何以遽洞視萬古哉

禹導水通瀆刻石書名山之高

刻石始於夏

夏后氏以雞彝殷以斚周以黃目

彝始于夏

夏后氏以龍勺殷以疏勺周以蒲勺

勺亦始于夏

明堂曰爵夏后氏以琖殷以斚周以爵

爵始于夏以王爲之矣

明堂曰夏后以搗豆

豆起于夏

有五練之服

喪服起於夏古喪期無數

爲銘於篋簋曰告寡人以道者擊鼓以義者擊鐘以事者振鐸以憂者擊磬以獄者揮鞀

按銘始此

王制云夏制五等爵三等受地殷因之爵公侯伯子男凡五等諸侯之上大夫下大夫上士中士下士凡五等公侯方百里伯七十里子男五十里凡三等

爵祿之制三代多同殷合伯子男爲一周增

子男爵地與夏同

夏后氏金行初作簫莢言氣所交也

此祈禳之始殷以螺首周以桃梗皆此義

夏立尸而卒祭

按殷周坐尸夫祭之道孫爲王父尸所使爲尸者於祭者爲子行也父北面而事之所以明子事父之道

五經異義曰三王之代小祥以前主用桑者旣練易之遂藏于廟以爲祭主凡虞主用桑練主

夏后氏以松殷人以柏周人以栗

立主其起于三代之時乎三者神象也孝子旣葬心無所依所以虞而立主以事之

禹立井甸之法六十四井爲甸甸方八里居一成之中成方十里出兵車一乘以爲賦法

賦兵車於田始見于此

一井上上出九夫稅上中八夫上下七中上六中中五中下四下上三下中二下下出一夫稅有九等

夫稅九等始於夏

禹登茅山大會計理國之道更名其山曰會稽
此會計之始也

禹登會稽海神來朝有抹額

後軍容有抹額始於禹

作鞞

鼓之有柄者

月令仲春上下命樂正習舞釋菜

釋菜用卜取文明之意三代已有之

記曰夏后氏官百天子有三公九卿

以卿爲稱三代已有之

以歷山之金鑄幣

按錢幣始於此

作毋追長七寸高四寸制如覆杯前高廣後卑
銳

卽皮弁也

以天下傳子啓

按此後不復與賢矣與賢則亂故稱家天下

始於禹

夏啓

召六卿與有扈氏大戰于甘作甘誓

按六卿夏已有之君臣接戰此又一世變也
夏啓與有扈戰于甘誓師云用命賞于祖不用
命戮于社

祖謂遷主古者師行以遷主行載于齋車言
必有尊也

啓享諸侯於鈞臺

燕享以此

季秋月朔辰弗集于房瞽奏鼓嗇夫馳庶人走
書救日蝕始見于此
適人以木鐸徇于道路

木鐸之設始見于此

夏太康

太康畋于洛表后羿因民距之于河不復返國
代有夏政

按篡臣始此

夏后氏食卯鳳皇迺去

夏始食卯後迺鏤卯以闢其天傷多矣

寒浞使其子澆殺夏后相后緡方娠逃出自竇
歸于有仍

按弑亂始此

夏少康

靡自有禹氏收二斟之衆滅浞而立少康少康
滅澆于過后杼滅豷于戈復禹之績

按復國始此故中興書以少康為首此時天

下已申絕四十一年矣可懼哉

夏康恐禹墓之絕祠乃封其庶子于越號曰無
余隨陵陸而畊種逐禽鹿而給食不設宮室之
飾從民所居居于秦餘春秋祠禹墓于會稽

設人守陵始于此

夏履癸

始為傾宮瑤臺

按宮室臺池之盛始此

求四方美女積之移宮作爛漫之樂

此女樂之始也

令諸侯大夫之冠亦如士禮行之

按古者五十而後爵故無大夫冠禮有婚禮
諸侯之有冠禮夏之末造也

夏末制輦

輦人所輦也夏名輦曰金車殷曰夷車周
曰輜車人不知何代去其輪也

古今原始第三卷終

古今原始第四卷

商成湯

桐城趙鈇鼎卿著

伊尹耕于有莘之野而樂堯舜之道湯三使人聘之

按聘召處士始此

成湯放桀于南巢代夏政

按以臣伐君始此雖順天應人實萬世之口實也或曰易其君而更立賢者則何如曰必

有不可得而辭者

王歸自克夏至于亳誕告萬方作湯誥

按作誥始此

大旱七年湯使太史占之曰當以人禱廼請自當以身為犧牲禱于桑林之野以六事自責遂雨

按禱雨始此

殷公田籍而不稅

籍民力以治公田多寡取於此不稅民之所

自治所謂助法也

湯遭旱作土龍

土龍始於湯作以致雨也

十國以為連連有帥

稱帥始

伊尹曰十世之廟可以觀德

七廟之文始見于此

初作圓取禽獸以奉宗廟

按園圃始於此

改丑爲正朔易服色尚白

按有天下者必改朔易制度始此

築五庫藏五兵

此庫所由始也天有天庫藏庫之星故王者
立五庫古謂庫兵車所藏幣金帛所藏府圖
書所藏後皆曰庫

定朝會以畫

按以畫臨朝始此

建天官先六太曰太宰太宗太史太祝太士太

卜典司六典

以太命官殷制已有之

制官刑儆于有位

訓官始此

殷武箋云成湯之時氏羗遠方之國來獻來
見曰商王是吾常君

氏羗來獻始於此

伊尹爲草屨

卽今之麻鞋也秦以絲爲之凡娶婦之家

先下鞋取和諧之意後因之

立五官曰司徒司馬司空司士司寇典司五衆
司徒司馬司空司寇殷官也不始于周

立六工曰土工金工石工木工獸工草工典司司
六材

此商制也周皆屬之司空

制六府曰司土司木司水司草司器司貨典司
六職

司器角人也司貨非人也周皆屬司徒

制復與書銘自天子達於士其辭一也男子稱
名婦人書姓與伯仲

書制始見於殷

商太甲

惟元祀十有二月乙丑伊尹祠于先生奉嗣王
祇見厥祖侯甸群后咸在百官總己以聽于冢
宰

按天子亮陰冢宰攝政其制始此始有冢宰
之名

伊尹明言烈祖之成德以訓于王

始有訓

以伊尹爲保衡

即太保之官也

嗣王不惠于阿衡伊尹作書三篇陳戒于王

人臣上書之始

王徂桐宮居憂三年處仁遷義伊尹以冕服奉
嗣王復歸于亳

按免喪復辟始此

伊尹旣復政厥辟乃告歸

按大臣求退始此

商太戊

遠方重譯而至

自是有譯語

商仲丁

遷都于囂

按遷都始此

商盤庚

遷都于殷改號曰殷

商之稱殷始此自古無有改國號者此古今一見也

盤庚曰大享先王尔祖其從與享之

功臣配享商已行之矣

大禘者合毀廟之主與未毀廟之主皆合食于太祖五年再祭

此殷法也周三年一禘

高陽甲

始廢嫡立庶

按嫡庶爭立自此始

高宗祖乙

王宅憂亮陰三年

始見亮陰

夢帝賚良弼以象得傳說于版築

以夢用人見于此漢文廼以鄧通入夢抑天所爲乎

商武丁

章服多用翟羽

按蠻人編髮來朝者六國用所貢為章服故翟羽之用始此

商帝乙

命季歷為牧師

馬政始于此

命周公季伐翳徒之戎王賜之圭瓚鉅鬯為侯伯

周封伯得專征伐始此

立季子辛為王

按紂之立以母后也後世立子以嫡不以長始此夫立長則嫡庶易位亂道也故先王重嫡貴貴也曰受何以亡殷然則以賢乎曰立愛而楊廣亡隋曰然則當何如曰天與嫡則與嫡天與長則與長置重器可亡擇地乎有權焉有數焉非人也天也

商紂

始為象箸

紂為象箸
今編民且奉以朝夕傷

哉象以齒胎禍始見于此

以胥餘為太師

大師之名見此

紂欲作重刑迺先作六爨斗使火爨之

爨斗始於此

始為炮烙之刑

按刑至此極矣猶後有灸甕錫蛇鐵錐等刑

惟恐無以勝民老子曰民不畏死柰之何以

死懼之者哉

微子曰父師少師殷其弗或亂正四方

少師商已有之

紂為勸杯

杯始于紂

紂無道王子比干諫之不聽殺之

按殺諫臣始此

紂以紅藍花汁凝作脂以燕地所生者曰燕脂

作桃紅粧

入女

臘脂紂所

紂造鉛粉

女人始傅粉為飾

使師延為北里之舞靡靡之樂作空侯一曰坎
侯

空侯始見于此

古今原始第四卷終

古今原始第五卷

周

公劉度其原隰徹田為糧

周之徹法自此始其後周公因而修之耳

太王居邠狄人侵之去之岐山之下居焉

避亂遷國始此

古公生少子曰季歷歷生昌有聖焉古公曰我

世當有興者其在昌乎長子泰伯虞仲亡如荆

國家圖書館, NATIONAL CENTRAL LIBRARY, TAIWAN, R.O.C.

桐城趙鈞



蠻文身斷髮以讓季歷

讓國始見于此

文王忌日必哀

禮云君子有終身之憂忌日之謂也忌始于

周乎

文王爲世子朝于王季日三

始有世子之稱春秋稱王世子會于首止又稱晉太子申生則天子之子或稱世子或稱太子未有定也

周文王在岐用平土之法以爲治人之道地著爲本故建司馬法交尺爲步步百爲畝畝百爲夫夫三爲屋屋三爲井井十爲通通十爲成成十爲終終十爲同同方百里同十爲封封十爲畿畿方千里民受田上田夫百畝中田夫二百畝下田夫三百畝歲耕種者爲不易上田休一歲者爲一易中田休二歲者爲再易下田三歲更耕之自爰其處農民戶人已受田其家衆男爲餘夫亦以口受田如此士工商家受田五口

乃當農夫一人此謂平土可以爲法者也若山林藪澤原陵淳鹵之地各以肥磽多少爲差民年二十受田六十歸田七十以上上所養也十歲以下上所長也十一以上上所強也

此周之平土法也視二代爲最詳

文王伐崇鞮繫解

鞮自商時已有之至魏文帝吳妃始裁縫以綾爲之即今製也

親迎于渭造舟爲梁

舟梁即今之浮橋也文王始作而用之

文王以民力爲沼曰靈沼

沼始著於此

文王世子云古者庶子之官治而邦國有倫

庶子周之官也

文王世子天子視學大昕鼓召所以警衆也衆至然後天子至命有司行事興秩卽祭先師先聖

此視學之始先師先聖之稱其來久矣不知

何所指

文子世子云凡三王教世子必有但樂立太傅少傅以養之太傅在前少傅在後、則有保出則有師

通典曰太子師保二傅殷周已有

周武王

惟十有三年春大會于孟津

會師始此

武王伐商至孟津命蒼兕具舟楫

水戰周時有之而大用於吳楚

立七十一國封兄弟之國十五人姬姓之國四十八人列爵為公侯伯子男

按後之分封同姓寔肇於此

周受命封建宗盟始選其宗中之長而董正之曰宗正

宗正官名始此

表商容之間

旌表門閭至此始見

封比干之墓

按此爲封墓之始也

周公作九章算術

一方田二粟米三差分四少廣五均輸六方
程七傍要八盈不足九鈎股所謂九數也

作酒誥曰群飲盡執拘以歸于周予其殺

禁群飲始于周

封黃帝之後於蓊帝堯之後于祝帝舜之後於
陳夏后氏之後于杞殷之後於宋

封前代帝王之後始見于此

封尚父於齊都營邱封周公于魯都曲阜封召
公于燕皆留相周

諸侯內相不之國見於此

虢仲虢叔爲文王卿士勲在王室藏于盟府仲
封于東虢叔封于西虢

盟起於周

周公旦太公望啟制文王之謚遂以謚法

謚法起于此

祀于太廟始定事先之禮諱名立謚

祀先諱名始此

賤不誅貴幼不誅長惟天子稱天以誅之諸侯不得相誅

誅法亦起于周

柴望大告武成

祭有三曰告曰報曰祈此所謂告也後世告成始於此

箕子避地朝鮮其國俗未有聞也乃施八條之

約使人知禁

後之條約本於此

武王伐紂伯夷叔齊扣馬而諫既平殷亂天下宗周伯夷叔齊耻之採薇首陽不食周粟卒以餓死

死義者于此見之

王克商袒冕搢笏諸侯象大夫魚尾士以竹笏自三代已有之車服儀曰古也貴賤皆執笏即後之手板也

封微子于宋作微子之命

按冊封誥命始于此

追王太王王季上祀先公以天子之禮

後世追祀上封號始此

孟春躬耕籍田

始見籍田此甸師所職也

作明堂郊祀后稷以配天宗祀文王于明堂以配上帝

夫事天於郊而復事上帝於明堂何天與帝

一也事於郊尊之也故用壇事於明堂親之也故用室事天而配以后稷事帝而配以文王何周之興也始於后稷故尊之以配天而文王以功德始受天命故親之以配帝配天不以文何不敢忘稷也宗祀文王而必以配帝何蓋孝莫大於嚴親嚴親莫大於配天配天既以稷而獨遺文王非嚴親也故配文於明堂以配上帝兩崇之也是明上二者專爲文王設也有文王之親則可也夏商何以無可

以無而無者也後郊祀以祖宗配始此
稱正妃曰王后立六宮三夫人九嬪二十七世
婦八十一御妻以聽天下之內治

按妃曰王后曰夫人曰嬪曰世婦曰御妻之
號始于周

命上公九卿爲伯其國家宮室車旌衣服禮儀
皆以九爲節諸侯諸伯七命其國家宮室車旌
衣服禮儀皆以七爲節子男五命其國家宮室
車旌衣服禮儀皆以五爲節王之三公八命其

卿六命其大夫四命父其封也皆加一等其國
家宮室車旌衣服禮儀亦如之

按宮室車旌衣服禮儀之節始見于此
封紂子武庚爲殷侯使管叔蔡叔霍叔監殷

按立亡天下者之後僅見於此夫得其天下
而不絕其世號仁人之用心遠且厚矣豈以
天下爲悅哉自三叔監殷而後之監制之使
皆原於此所以防亂也

王有疾周公爲三壇同禫植璧秉珪告太王王

季文王以身代武王之死

此禱疾之始也

太公望作曲蓋

漢云鞞輓

自天子至下士凡六等諸侯國君十卿祿卿四大夫祿大夫倍上士上士倍中士中士倍下士下士與庶人在官者同

此祿秩之所由始也前此無所攷見

周成王

太公立九府圜法黃金方可爲重一斤錢圜渾方輕重以珠布帛廣二尺二寸爲幅長四丈爲足故貨寶於金利於刀流於泉布於布束於帛按周官有六府玉府內府外府泉府天府職內職幣職金皆掌財幣之官故云九府圜玉來自奄大降四國民命遷于洛邑

按遷民始此

立太師太傅太保爲三公少師少傅少保爲三

孤

按公孤之官始於此

立天官冢宰使帥其屬而掌邦治

按自後官職始專屬天官卿矣

內史掌八枋之灋凡命諸侯及孤卿大夫則策命之

始有內史官名即今之內制翰林之職也

命見乎此

用中士奠世繫

治世譜差序秩第即唐之玉謀也

宰夫掌百官府之徵令五曰府六曰史七曰胥八曰徒

按府史胥徒即今之吏員也所謂庶人在官者至秦始有試吏入仕之途若漢之丙吉龔勝之類是也

外史掌四方之志掌三皇五帝之書掌達書名于四方若以書使于四方則書其令

外史猶今之外制即舍人之職也四方始有志

御史掌邦國都鄙及萬民之治令以袂以冢宰凡治者受法令焉

御史官名始於此即柱下史也

司士下大夫二人中士六人下士十有二人掌群臣之版以德詔爵以功詔祿以能詔事以久奠食凡邦國三歲稽士任而進退其爵祿

此銓選之始也

司勳掌六卿地之法以等其功

即後之稽勳部也

馮相氏掌歲月辰日星位辨其敎以會天位

按馮相氏之名始于此

保章氏掌天星以志日月星辰之變動辨其吉凶以五雲辨吉凶水旱隆豐荒之祲象以十有二風察和命妖祥以星土辨九州封域

按保章官名始於此此星野之說也

小宰聽閭里以版圖

始見版圖

王為群姓立社曰太社自為立社曰王社

太社王社之別始見于周

諸侯爲百姓立社曰國社諸侯自爲立祀曰侯社

國社侯社始見于此

大夫以下成群立社曰置社

衆社所由始也

周官九命上公九命侯伯七命子男五命王之三公八命其卿六命其大夫四命其出封皆加一等

後官品用九本此

內府掌受九貢九賦九功之貨賄良兵良器以待邦之大用

自是有內府之藏

司會掌國之九府郊野縣都之百物財用凡在書契版圖者之貳以逆群吏之治而聽其會計會計之法莫詳于周

閹人掌守王宮之中門之禁凡內人公器賓客無帥則幾其出入以時啟閉凡外內命夫命婦

出入則爲之闕堂埽門庭大祭祀喪紀之事設門燎躔宮門寺人掌主之內人及女宮之戒令相道其出入之事而糾之佐世婦治禮事

按閤寺之官始此

宮伯掌王宮之士庶子國子之倅凡在版者

按周制宮伯掌王宮之士則是王朝宿衛之人皆公卿大夫士之子弟也

王爲庶姓立七祀曰司命曰中雷曰國門曰國行曰泰厲曰戶曰竈王自立七祀

七祀始見於周

諸侯爲國立五祀曰司命曰中雷曰國門曰國行曰公厲諸侯自爲立五祀大夫立三祀曰族厲曰行曰門適士立二祀曰門曰行庶人^士庶人立一祀或立戶或立竈

後五祀始于此

內豎掌內外之通令

內豎奄人未冠之稱

古者有庶子之官周名曰諸子職諸侯卿大夫之庶子掌其戒令與其教理有大事則率國子而致於太子唯所用之

此太子庶子之官所由名也秦因之

九嬪掌婦學之法以教九御婦德言容婦各帥屬而以時御敎王所

嬪婦人有法度之稱進御之法卑者宜先尊者宜後女御八十一人當九夕世婦二十七人當二夕九嬪九人當一夕二夫人當一夕

后當一夕凡十五日一徧惟其以四德之成者充其選故以時御敎而九御無險詖之行各帥其屬而九嬪有進賢之心此二南之風王化之本

女史掌王后之禮職掌內治之貳以詔后治內政

女史女奴曉書者後因之

立醫師疾醫瘍醫

按以醫設官始此

大司徒歲終則令教官正治而致事

注曰上其計簿簿書見于周

小司徒凡起役毋過家一人

田役至周始見

獸醫掌療獸病療獸瘍

獸醫始此

凌人掌冰政歲十有二月令斬冰三其凌

藏冰之制始見於此

鄉大夫三年則大比考其道德行藝

大比周制也

膳夫掌王人食飲膳羞

即後之大官署也

大司徒掌人民之數小司寇大比登民數自生齒以上登天府

此後之戶口也

大司徒制其畿疆而溝封之

即後之疆界也

井人掌金玉錫石之地而爲之厲禁以守之以

時取之

井之爲言礦也後之開礦始此

適東序釋奠于先老遂設三老五更之席位

三老五更各一人周制也

雞人夜嘑旦以詔百官凡國事爲期則告之時

設雞人始見于此

大樂正論造士之秀者以告于王而升諸司馬
曰進士

此蓋進士之始也

周公采文王之世風化所及民俗之詩被之箎

絃以爲房中之樂推之以及於鄉黨郡國

房中之樂所由始也

內宰中春詔后師外內命婦治蠶于北郊以爲
祭服

始見親蠶之禮按天子親耕籍于南郊以供

粢盛后親蚕于北郊以供祭服上以奉郊廟

下以化天下禮也魯語曰古者王后親織元

紘公侯之大夫加之以紘綖卿之內子皆爲

大帶命婦成祭服列士之妻加之以朝服自庶人以下皆衣其夫所謂率外內命婦以此詔之也

州長掌州之教治政令黨正掌黨之政令教治族師掌族之戒令政事閭胥掌閭之徵令比長掌比之治

按後之保甲里正始此

宰夫書其賢者與其良者以告于王

此貢舉之始也古者諸侯歲貢士其制不見於經傳至周始著其後廢置因革皆不可考大抵古重而今輕古緩而今速也

司諫掌糾萬民之德而勸之朋友以詔廢置以行赦宥

司諫官名見此始稱朋友

媒氏掌萬民之判凡男女自成名以上皆書年月日名焉

媒氏之名見此但日中春會男女奔者不禁則瀆禮甚矣

旄人掌教舞散樂等樂凡舞士屬焉
誅師掌教誅樂

按誅東方之樂先王用之所以昭王化也後之雜用夷樂亦未可盡非

鞀鞀氏掌四夷之樂與其聲歌

按旄人掌舞夷人之樂而鞀鞀氏以聲音節之皆用以彰聖德但古人惟用之門外若用之祭祀燕饗恐亂雅矣

立春官宗伯使帥其屬掌邦禮

宗伯始于此此後之禮曹也

周制大司樂云冬至日祀天於地上之圜邱夏至日禮地祇於澤中之方邱

祭用二至日始于周

以柴祀日月星辰日壇曰王宮月壇曰夜明

日月星辰之祀始見於此

以禋燎祀司中司命風師雨師

祀司中司命風雨始此

大宗伯以血祭祭五祀五嶽以貍沈祭山林川

澤

今五嶽山川之文見於此

仲秋之月祭靈星于國之東南

始祭歲星

周制建巳月大雩五方上帝其壇曰雩宗

始見雩祭之制

以凶禮哀邦國之憂以喪禮哀死亡以荒禮哀
凶札以弔禮哀禍哉以禴禮哀圍敗以恤禮哀
寇亂

凶禮始詳見於此

以賓禮親邦國春見曰宗秋見曰覲冬見曰遇
時見曰會殷見曰同時聘曰問殷頌曰視

朝覲會同之禮始詳見於此

以軍禮同邦國太師之禮用衆也大均之禮恤
衆也大田之禮簡衆也大役之禮任衆也大封
之禮合衆也

軍禮始詳見於此

周制冠禮筮日筮賓冠于阼醮於客位三加弥

尊己冠而字

冠而字周制也此諸侯大夫士之禮也

以嘉禮親萬民以飲食之禮親宗族兄弟以昏冠之禮親男女以賓射之禮親故舊朋友以饗燕之禮親四方賓客以脰膳之禮親兄弟之國以賀慶之禮親異姓之國

嘉禮始詳見於此

大宗伯以九命正邦國之位九命者一受職再受服三受位四受器五賜則六賜官七賜國八作牧九作伯

此九錫之所由始也在春秋說以車馬衣服樂器朱戶納階虎賁斧鉞弓矢鉅鬯謂之九錫後世不能改

以玉作六器以禮天地四方以蒼璧禮天以黃琮禮地以青圭禮東方以赤璋禮南方以白琥禮西方以玄璜禮北方皆有牲幣各放其器之色

薦玉見此

小宗伯掌建國之神位

神位始見於此

太史掌建邦之六典凡辦法者放焉

太史天子之日官也唐改為司天監

周制諸侯學曰類宮

類宮者侯國之學也

行夫掌邦國傳遞之小事

即後之乘傳遞報者

大行人掌大賓之禮大客之儀以視諸侯小行

人掌賓客之禮籍以待四方之使者

行人之官始于此

禮記大傳曰四世而總服之窮也五世袒免殺同姓也六世親屬竭矣其庶姓別於上而戚單於下婚姻可以通乎又曰繫之以姓而弗別綴之以食而弗殊雖百世而婚姻不通者周道然也

不娶宗族自周始

司儀掌九儀之賓客擯相之禮以詔儀容辭令

揖讓之節

司儀官名始此

甸祝掌四時之田表貉之祝號

古者天子諸侯無事則歲三田其禮不可攷
見至周始著

掌舍掌王之會同之舍

會同有舍見於此

環人掌送邦國之通賓以路節達四方舍則授
館

持節授館達四方始見於此

司燿掌行火之政令四時變國火以救時疾
火政始見于此

司裘掌王后之六服禕衣綸翟闕翟鞠衣展衣
祿衣素紗褊內外命婦之服鞠衣展衣素紗
婦人章服制度于周見之

幕人掌共中幕

中幕見此

內宗掌宗廟之祭祀佐王后薦玉豆祗豆籩

祭祀用遵豆見此

都宗人掌都祭之禮家宗人掌家祀之禮

宗人官名始于此但後之所司不同

周制諸侯五廟大夫三廟適士二廟官師一廟庶人祭於寢

諸侯大夫士廟制始此

追師掌王后之首服為副編次追衡笄為九嬪及外內命婦之首服以待祭祀賓客首飾制度于周見之

宗祧掌守先王公之廟祧其遺衣服藏焉

廟祧藏衣始見於此

中車掌公車之政令辨其用與其旗物而等敎之一曰玉輅以祀二曰金輅以賓以封同姓三曰象輅以朝以封異姓四曰革輅以即戎以封四衛五曰木輅以田以封蕃國

輅至是有五矣

太祝掌六祝之辭以事鬼神示其福祥求永真小祝掌小祭祀詛祝掌盟詛類造攻說檜崇之

祝號作盟詛之載辭司巫掌群巫之政令女祝掌王后之內祭祀凡內禱祠之事

祝巫之職始見于此

女巫掌歲時祓除釁浴

祓除始於周見之

冢胥掌

之國使掌傳王之言而諭

說焉以和親之

此後之鴻臚之官也秦曰典客漢曰鴻臚

牧人掌牧六牲以共祭祀之牲拴牛人掌養國

之公牛犬人掌犬牲羊人掌羊牲雞人掌共雞

牲

蕃牧犧牲之官所由設也

大僕掌正王之服位出入王之大命

大僕官名見于此

輿司馬

即後之駕部魏晉之代始稱駕部郎

立藏史典簡策

始有藏書之制

太師執同律以聽軍聲而詔吉凶

軍中占候也古以律而後日以繁矣

司甲掌戈盾弓矢

卽後之庫部魏始有庫部卽

立軍尉以討姦

後之太尉都尉中尉寔本于此

凡諸侯有四彝之功則獻捷于王王以警言于彝
中國則否諸侯不相遺俘

獻俘始于周見之

銜枚氏掌司颺

銜枚止喧周已有之

挈壺氏掌挈壺以令軍并挈轡以令舍挈盞以
令糧凡軍事縣壺以序聚櫛凡喪縣壺以代哭
者皆以水火守之分以日夜及冬則以大爨鼎
水而沸之而沃之

挈壺氏官名始見於此

方相氏掌蒙熊及黃金四日元衣朱裳執戈揚
盾帥百隸而時難以橐室毆疫大喪先匱及墓

入墉以戈擊四隅毆方良

方相氏始於此

虎賁氏掌先後王而趨以卒伍軍旅會同亦如之

按虎賁天子之親兵也即今錦衣以下十二衛專以扈從宿衛為職也

旅賁氏掌執戈盾夾王車而趨左八人右八人車止則持輪

按周官既有虎賁又有旅賁亦猶今制錦衣衛既有校尉又有將軍力士也

司弓矢掌六弓四弩八矢之法

弩三代時已有之

隸僕三行洗乘石掌蹕宮中之事

出警入蹕始見於此

春祭馬祖執駒夏祭先牧頒馬攻牧特秋祭馬社臧僕冬祭馬步獻馬講馭夫

馬祖之祭始於此

司隸掌五隸之法帥民搏盜賊役國中之辱事

為百官積任器

隸古有之後有司隸官名非其職也

以圜土聚教罷民凡害人者寘之圜土而施職事焉以明刑耻之其能改者反于中國不齒三年其不能改而出圜土者殺

圜土即後之牢獄也獄必圜者規主仁以仁心求人情也越獄者死舊典也

以八辟麗邦法附刑罰一曰議親二曰議故三曰議賢四曰議能五曰議功六曰議貴七曰議勤八曰議賓

八議之法始見於此

掌囚掌守盜賊凡囚者上罪梏拲而桎中罪桎梏下罪梏

桎梏始見於此

有三赦一曰幼弱二曰老眊三曰蠢愚

幼弱者即後之年十三以下未出幼者老眊即後之七十以上篤癡疾者蠢愚之議後未之聞焉乃知古人之赦非今之赦矣

司寤氏掌夜時以星分夜以詔夜士夜禁禦宵行者夜遊者

始有夜禁宵行與夜遊不同

司稽掌巡市

此巡市之始也

以荒政十有二聚萬民一曰散利二曰薄征三曰緩刑四曰弛力五曰舍禁六曰去幾七曰青禮八曰殺哀九曰蕃樂十曰多昏十一曰索鬼神十有二曰除盜賊

始見荒政

泉府掌以市之征布歛布之不售貨之滯於民用者以其賈買之物揭而書之以待不時而買者無者各從其抵都鄙從其主國人郊人從其有司然後子之凡賒者祭祀無過旬日喪紀無過三月凡民之貸者與其有司辨而授之以國服爲之息

賒貸利息始於此

司門掌授管鍵以啓閉國門幾出入不物者正

其貨賄

此門禁之始也

司關掌國貨之節以聯門市司貨賄之出入者掌其治禁與其征屨

始有關禁

縣正掌其縣之政令徵比以頒田里以分職事掌其治訟趨其稼事而賞罰之若將用野民師田行役移執事則帥而至治其政令既役則稽功會事而誅賞

始有縣名後縣令兆于此矣

遺人之職凡國野之道十里有廬三十里有宿宿有路室路室有委五十里有市市有候館

按今二十里有舖舖有歇馬亭即路室之遺事也六十里有驛驛有廩給即候館之遺事也

舍人掌平宮中之政分其財守以法掌其出入始有舍人之名

職方氏掌天下之圖辨其邦國都鄙四夷八蠻

七閩九貉五戎六狄之人民與其財用九穀六畜之數要周知其利害

職方官名始於此

上方氏掌土圭之法以致日景相宅建邦國都鄙

始見相宅之法即後之形家者流也

中春教振旅師帥執提旅師執鞶公司馬執鐻此馬上鼓也古者馬以駕車至是已有單騎矣

戎車有五倅

倅副也所謂副車也秦平天下以諸侯所乘之車曰副車

有士師則載虎皮乘輿豹尾

古軍中建之自晉惟乘輿得建

車有翠織雉羽為扇以翳風塵

雉扇周已有之

條狼氏執鞭趨辟之

鳴鞭周制也

大喪共銘旌建廡車之旌

銘旌始見於此

冢人掌公墓之地辨其兆域墓大夫掌邦墓之地域令國民族葬而掌其禁令

族葬分昭穆古制也

太祝辨六號一曰神號二曰鬼號三曰示號四曰牲號五曰壘號六曰幣號

神號自周已有之

庶氏掌除毒蟲

毒蟲之害其來久矣

小行人達天下之六節山國用虎節土國人節澤國龍節以金為之道路旌節門關符節都鄙管節皆以竹為之

持節始見於此

鬻熊作書題曰鬻子

始有子名

玉藻曰天子佩白玉而玄組綬公侯山玄玉而朱組綬

按組綬起於周蓋貫佩玉而相承受者也戰國時解去綬以朱紺相連結于綖轉相綬今所謂帶綬蓋起于七國而名自三代也職金掌錫石丹青之令

即後之金部也

倉人主藏九穀

即後之倉部也

司險掌溝塗

即水部之職也魏尚書始有水部郎

司服掌王之衣服辨其名物與其用事

即後之尚衣

周天子六軍其將皆命卿

按在國稱大夫在軍稱將軍將軍之稱古有之

月令曰出土牛以示農耕之早晚

土牛周制也

司烜仲春以木鐸修火禁于國中

謂季春將出火令寒食此寒食之始也言介

子推者妾也

凡邦之大事共墳燭庭燎

樹于門外曰墳燭門內曰庭燎所以照衆為明者始見言庭燎

校人掌頒良馬而養乘之馬三乘曰阜三阜為繫六繫為廐又曰天子十二閑邦國六閑

稱廐稱阜稱閑始此

檀弓云季武子曰合葬非古也自周公以來未之有改也

合葬疑始於周

黨正以禮屬民而飲酒于序以正齒位

鄉飲酒之禮至周始見

禮記曰投壺之禮主人奉矢司射奉中便人執壺

投壺始於周見之

凡民有罪役諸司空

此徒之始也

大胥掌學士之版以待致諸子春入學舍菜合

舞

釋菜之禮始見於此
前此無可考

師氏以三德教國子
教三行凡國之貴遊子弟
學焉

國子公卿大夫子弟
師氏教之而世子亦齒
焉後卿大夫子弟送學
讀書援古爲法也

成王十五而冠筮日
筮賓冠委貌於阼三加
彌尊裸享樂于廟
周公冠成王命史雍頌

此天子冠禮于周始見之

俘來苾輿乃命寧子
以秬鬯二卣

賜酒之始也

周公位冢宰正百官
群叔流言乃囚蔡叔于郭
鄰

囚親藩始見此

以車七乘降霍叔于庶人

親藩降庶人始此

彛微盧烝三亳阪尹

尹亦周官名也

賜越裳氏駢車

賞賜外國之始

宮人掌王之六寢之修路寢以視事小寢以時
宴息

後稱內寢始此

立東宮西宮

西宮公宮也東宮太子所居

命太保召公至洛卜宅宅成命周公分正東都

按兩都之制始于此

建太社于國中其疆東青土南赤土西白土北
驪土中央黃土

太社之制始見於此

將建諸侯鑿取其方一面之土苞以黃土苴以
白茅以爲土封

土封之制始見於此後因之傳曰受削土於
周室是也

史佚有子而死下殤也墓遠召公謂之曰何以
不棺殮於宮中曰吾敢乎哉召公言於周公周

公曰豈不可史佚行之

下殤用衣棺自史佚始也

立五宮太廟宗宮考宮路寢明堂咸有四阿及玷重元重廊重常復格藻稅移旅盈卷常畫內階元陞堤塘山廡應門庫臺元間又以黑石為門限

按四下曰阿外向室曰玷重元累棟也重廊累屋也常累係也復格三檣也藻稅梁上柱也承屋曰移旅春藻井之節也宮廟陞臺修

飾之制詳見於此

制大夫七十致仕

後因之唐令五品以上上表六品以下申奏年雖少形貌衰老者亦聽致仕

周公作洛陽城百步有一樓櫓

城上樓櫓始見於此

周辛甲為太史命百官作官箴

官箴始於周

易曰樽酒簋飯用缶納約

玉亦三代時樂也

季冬令民出五種計耦耕事修耒耜具田器
耦耕不用牛而用人三代事也

職內掌邦之移用均人掌牛馬車輦力政

此陸運也三代轉輸之法至周始見

歲遣軒輜使者求異代方言還奏籍之藏于秘
室

郭璞所謂不出戶庭坐照四表不勞疇咨物
來能名者也

周公卜成洛邑因流水以汎酒

流觴始此

王不懌乃同召太保奭芮伯彤伯畢公衛侯毛
公師氏虎臣百尹御事曰敬保元子釗弘濟于
艱難無以釗冒貢于非幾

接受顧命始此

命作冊度傳顧命

冊書始此

鷄林子曰三代之法莫詳于周然非盡始

於周也或緣夏商之舊而損益之耳孔子
於夏商有文獻不足之歎孟子於周制猶
有諸侯去籍之嗟使列國其載秦復藏之
不知其詳又何如也或云自周公而下則
其說長蓋有不得不然者然則與其野也
寧僂

周穆王

穆王因尹軌真人置草樓觀召幽逸人居之謂
之道士

始稱道士

列子記周穆王時有偃師者爲木人能
與盛姬觀之舞終木人瞬目以手招王左右王
怒欲殺偃師偃師懼壞之皆丹墨膠漆所爲也
此蓋傀儡之始乎

穆天子傳曰天子東遊黃澤使宮樂作辭曰皇
之陀其馬歆沙皇人威儀皇之澤其馬歆玉皇
人壽穀

此辭之始也

穆天子傳曰天子觴西王母于瑤池之上王母
為白雲謠

有章曲謂之歌無章曲謂之謠

王問杜冲靈宅棲元為修觀學道

此道觀所由始也

墨辟疑赦其罰百鍰劓辟疑赦其罰惟倍剕辟
疑赦其罰倍差宮辟疑赦其罰六百鍰大辟疑
赦其罰千鍰

罰金始此

王命伯冏作太僕正作冏命

此其命庶官之始乎

周孝王

惡來之後有非子者好馬善息養之王命主馬
汧渭之間馬大蕃息王封為附庸之君邑于秦
按秦之先始于此

周夷王

楚熊渠曰我蠻夷也乃立長子康為句亶王紅
為鄂王

此諸侯號王之始也

始下堂而見諸侯

天子之失禮也自夷王始

周厲王

王虐召公告曰民不堪命矣王怒得衛巫使監
謗者以告則殺之

殺謗言自厲王始

周宣王

列子云紀渚子為周宣養鬪雞

此戲當始于周也

衛世子共伯蚤死其妻守義父母欲奪而嫁之
誓而弗許作伯舟詩以絕之

節婦見于經傳自共姜始

立先妣之廟祀姜嫄

特祀也此又一始

殺大夫杜伯不幸左孺爭之曰君順友逆則違
友以從君友順君逆則違君以從友因死之
為友死自左孺始見于書

周幽王

王以褒姒之譖廢申后及太子宜臼

廢后太子始此

以褒姒為后其子伯服為太子

復立后立太子始此

王欲殺太子宜臼求之於申申侯弗予王伐之

申侯與鄆人召西夷大戎伐王殺王于驪山下

按借夷兵始此

欲悅褒姒舉烽煙戲諸侯

烽燧古亦有之或非始於此也

周平王

鄭伯克段于鄆寘其母姜氏于城穎

· 幽寘其母此又一大變也後有遷父皇于別

宮者皆原于此

宋穆公疾召大司馬孔父屬立宣公之子與彘

使公子馮出居于鄭

不立子而立弟始見于此公羊氏曰君子大

居其宋之禍宣公為之也

宋公齊侯衛侯盟于瓦屋

諸侯之參盟于是始

衛宣公殺其二子伋壽

父烝子婦始見于此此古今一大變也

周莊王

秦夷三父族

按族誅始

葬桓王

二傳曰改葬也改葬始見于此

秦武公伐邽冀戎初縣之

此縣之始始皇郡縣有所祖也

宋萬弑其君閔及其大夫仇牧宋人立公子御

說萬奔陳宋人醢之

醢刑始見于此

周僖王

齊侯宋人陳人蔡人邾人會于北杏

以諸侯而主天下會盟之政自北杏始其後

宋襄晉文楚莊秦穆交主夏盟跡此而為之

也

秦武公葬雍平陽初以人從死

以人從葬始見于此至穆公以三良殉而從者百七十人可歎也已

楚人修好于諸侯使人入獻天子天子賜胙曰

鎮尔南方

無侵中國

書賜胙始于此

魯侯逆姜氏丁齊以入使宗婦覲用幣

女贄用幣始見于此

周襄王

秦歸晉君彝吾彝吾獻其河西地使太子圉為質於秦

質子始見於此

晉太子申生卒晉人謚為恭

太子謚始於此冠禮云天子之元子士也士無謚是知太子無謚

王出居鄭使告難于諸侯臧文仲曰天子蒙塵于外敢不奔問官守

天子蒙塵始見于此

周定王

鄭人討幽公之亂斲子家之棺而逐其族

斲棺之刑始見于此

晉侯使趙同來獻俘

書獻俘始此

魯宣公初稅畝

古穀出不過籍今公田十取其一餘畝復十

收其一所謂二猶不足也

桓公七年二月乙亥焚咸邱

公羊曰樵之也樵之者以火攻也後遂祖之以為奇悲矣悲矣

魯成公作邱甲

邱甲邱自為甲也大司馬之制上地家可用者三人中地二家五人下地家二人皆勝兵也必曰邱之甸也而後備一卒出長轂一乘

則是從征少而休多也作邠甲從征多而休少矣

孟莊子作鋸鑿

鋸鑿始行

晉敗齊師自徐關入見保者曰免之齊師敗矣
辟女子女子曰君免乎曰免
甄司徒免乎曰免
曰苟吾君與吾父免可若何齊侯以爲有禮與
之石窳

此婦人得封之始也

齊桓公用庭燎禮天子百燎桓公以諸侯僭之
庭燎之百自桓公始也

管仲遇盜取二人焉上以爲公臣管仲死桓公
使爲之服

宦於大夫者之爲服也自管仲始也有君命
焉爾也

齊桓公亟舉兵作僞主以行及反藏之祖廟
廟有二主自桓公始也

齊桓公始霸用管仲爲政謹正盥筴

按鹽政始此自是山海爲官矣至漢有桑弘羊孔僅唐有劉晏任法愈精官無遺利計一歲征輸所入而鹽醴當天下大半之賦文學之士往往以是罪之噫使無鹽利而天下之民搜括盡矣然則寧利國乎寧利商乎寧病農乎寧病末乎吾謂管仲有功萬世

魯昭公娶吳爲同姓不敢告天子天子亦不命之

夫人之不命於天子自昭公始也

魯莊公及宋戰縣賁父死之公誅之

士之有誅自此始

禮非祭男女不交爵陽侯因殺繆侯而竊其夫人

大饗廢夫人之禮自二侯始

周景王

鑄大錢文曰寶

錢有文其製始此

王穆后崩

婦人有謚自景王穆后始

周靈王

單子晉公魯侯衛侯鄭伯莒子邾子齊世子光
同盟于雞澤陳侯使袁僑如會諸侯之大夫及
袁僑盟

諸侯在而大夫盟於是始晉悼公爲之也

三桓饗君以享禮

大夫饗君非禮也由三桓始也

魏絳陳和戎有五利晉侯乃使魏絳盟諸戎

按和戎始此

周敬王

孔子觀明堂見四門牖有周公相成王抱之負
斧扆南面以朝諸侯之圖

圖繪功臣古已有之

魯昭公有慈母而愛之死爲之練冠

練冠而喪慈母自昭公始也

衛靈公死卜葬沙邱握數仞得石柳洗視之有

銘

後世以石銘墓或援此也

魯哀公用田賦

自是歛民錢以田爲率矣不言井者城郭里巷亦有井織悉賦之矣

季扎葬孔子題其墓曰嗚呼延陵季子之墓

或云題墓始此

魯三家立桓公廟

按禮諸侯不敢祖天子大夫不敢祖諸侯公廟設於私家非禮也自三桓始也

魯子問宗子去在他國庶子無爵而居者可以祭乎孔子曰祭哉請問其祭如之何曰向墓爲壇以時祭若宗子死告於墓而後祭於家

庶子攝祭之禮著於此

季康子朝服以縞

此古禮之一變自康子始也

周元王

蜀聘于秦

蜀始通道秦賂之也

齊黔婁先生終身不仕死而其妻謚之曰康
庶人之有謚自黔婁始

莒人滅鄆

以異姓爲後始此家立異姓爲後曰亡國立
異姓爲後曰滅

周貞定王

秦伐義渠虜其王韓魏兵伐伊洛陰夷遺脫者
皆西走踰汧瀧

按自此中國無夷寇

周威烈王

智伯攻襄子決汾水灌晉城不浸者三版

此水攻之始也其去仁義之兵遠矣

趙文子燕射秦肆夏

大夫之奏肆夏自趙文子始也

司馬穰苴請莊賈爲監軍

監軍始此後若有監軍何與古異

晉獻公初作二軍公將上軍

將軍之名起于戰國時周末又置前後左右

將軍

西門豹引漳水溉鄴以富魏之河內
水利興於此

趙襄子漆智伯之頭爲飲器

虐用人首始此

魏文侯使李悝興水利

溝澮法廢此水利所由興也

李悝既爲魏文侯作盡地力之教又曰糴甚貴傷民甚賤傷農民傷則離散農傷則國貧故甚

貴與甚賤其傷一也是故善平糴者必謹視歲
有上中下熟上熟則糴三而舍一中熟則糴二
下熟則糴一使民適足價平則止小饑則發小
熟之所斂中饑則發中熟之所斂大饑則發大
熟之所斂而糴之故雖遇饑饉水旱糴不貴而
民不散取有餘而補不足也行之魏國國以富
強

平糴之法始見于此

秦初租禾

損益不可知古制廢矣天生秦將變古法也
秦初令人帶劍

佩玉三代也佩劍秦也可以觀政

西周公封其少子班於鞏以奉王是爲東周
此分東西周之始也

齊烹阿大夫封即墨大夫

始有鼎鑊之刑

晉河岸崩壅龍門至于底柱

春秋後河患始於此

越王思范蠡鑄金爲像

金人始于勾踐

衛侯預賜北宮喜謚曰貞子賜杵朱鉏謚曰成
子

生而有謚自衛侯始也

魏文侯師李悝撰次諸國法著法經六篇

秦漢取以爲律以內有雜律一篇

齊自淳于髡以下皆命曰列大夫爲門第康莊
之衢高門大屋尊寵之

賜宅第始見于此

范蠡去越自稱鴟夷子

此別號之始也甘茂號樗里子又有號寒泉子者別號古有之

周顯王

秦商鞅築冀闕宮室於咸陽徙都之并諸小鄉集聚為一縣縣置令丞

按縣始有令有丞至今不變祖龍郡縣有所本也凶人作法亦能垂久如此

秦封公孫鞅為商君

始有封君者

秦廢井田開阡陌

按井田至是始廢而上世畫野制祿之法不可復見其為罪可勝誅哉

秦始為伏祠

伏祠始於秦德公蓋四時代謝皆以相生惟秋以金代火金畏火至庚日必伏庚者金也秦殺商君車裂以殉

又有車裂之刑

周赧王

七國爭雄臣下璽始稱曰印

此印之始也

燕樂毅破齊聞畫邑王觸賢使人請之不往自經而死

按死節始此

齊威宣燕昭使人入海求蓬萊方丈瀛洲

三神山之名起于齊燕之時

趙王以趙括為將擊秦括敗兵降秦白起挾詐而坑之四十萬人

按殺降始見于此自此坑一開而儒者亦不免焉杜郵之劍來何暮也

騶子論著始終五德之運

後五勝之說原于此

武靈王服胡服騎射

以單騎戰始此

趙武靈王好胡服制短鞞以黃皮為之後漸以

長鞫軍戎通服之

此靴之始也

趙武靈王立子何為王自號為主父

主父即後之太上皇張本也

楚屈原作離騷二十五篇

賦之始也

秦賜白起劔死于杜郵

古有賜死之制示不加刑也

楚懷王使柱國昭陽攻齊

柱國楚寵官也

楚懷王與秦戰虜其大將軍屈丐

大將軍始見於此春秋時又有上將軍之名

燕太子與荆軻據案而食

始言案

秦惠文十四年更為元年

此改元之始也

秦莊襄王以所養母華陽夫人為華陽太后

稱太后始此

是時天下冠帶之國七而三國邊於夷狄秦滅
義渠始於隴西北地上郡築長城以拒夷趙武
靈王北破林夷樓煩築長城自代並陰山下至
高闕為塞

按長城紫塞始於此然則築城備夷其來遠
矣不知何以守之恐非倚城為安也

秦大饑應侯請曰五苑之草著蔬菜橡果棗栗
足以活之

秦時已有苑

秦有口賦

賦以口何出也後因之


秦雄諸侯加其武將首為絳帟以表貴賤其後
作頽題

此幘之始也

作渭水橫橋號為石柱橋

石橋秦所造也

古今原始第五卷終



國家圖書館, NATIONAL CENTRAL LIBRARY, TAIWAN, R.O.C.

古今原始第六卷

秦始皇

桐城趙戩昂卿著

秦使相國呂不韋遷東周君於陽人聚滅周內
史勝虜韓王安滅韓王翦虜趙王遷滅趙王賁
殺魏王假滅魏王翦虜楚王負芻滅楚王賁虜
燕王喜滅燕誘齊王餓死之滅齊

自古得天下者臣之而已未有滅人之國者
兼并天下始於秦秦知六國之亡也而不知

嬴之亡也實先於六國天道遠哉

秦并諸侯大赦天下

即位大赦從此始由漢以來或建儲改元立
后皆有赦遂為常制

始稱皇帝

嗚呼合帝王之號而稱之自秦始皇此世道大
變之一初也

稱后曰皇后以太子之正嫡稱妃

后與妃始有別矣後漢太子有妃有良娣有

孺子妻妾凡三等

分天下為三十六郡郡置一守一丞兩尉以典
之

嗚呼此萬世郡縣之始古列爵以公侯伯子
男分土以百里七十里五十里世及相承秦
始易國以為郡縣易公侯伯子男以為守尉
後事君者無世祿治民者無恒政又世道一
大變也

立監察御史掌監諸郡

按侍御史監察之官從此起矣後或爲殿中御史或爲監察御史云

始徙豪富於咸陽

後世徙民實京師始此

始製受命璽

按璽以立信古者尊卑共之至秦乃獨專之天子璽之文曰受命于天既壽永昌自是厥後有天下者得是璽也遂以爲真有受命之符無是璽也乃至目之爲白板天子一何愚且惑哉

始以命爲制令爲詔自稱曰朕

自是稱制稱詔稱朕萬世不變秦法也

始除謚法

始皇以古謚法是使子議父使臣議君故除之曰自我始世世以數相承計二世三世至于萬世豈知一再傳而失之乎

以貂蟬賜侍中

貂蟬用於秦或曰始於趙武靈王

追尊其考莊襄王爲太上皇

按稱太上皇始此。

秦焚燒先典乃廢古文更用八體一曰大篆周宣王史籀所作也二曰小篆李斯趙高胡毋敬所作也大小篆並簡冊所用也三曰刻符施於符傳也四曰摹印施於印璽也五曰蟲書爲虫鳥之形施於幡信也六曰署書門題所用也七曰殳書銘於戈戟也八曰隸書程邈所定行公府也

始有諸體書

初置郎中令其屬官有三署主官中郎將左中郎將右中郎將署中有郎中侍郎無員多至千人分隸三署主執戟侍宮殿出則充車騎

此郎中侍郎中郎將官名之始後因草不一煬帝於尚書六曹置六侍郎增品以貳尚書之職其諸曹侍郎直曰郎

代少府遣吏四人在殿中主發書號尚書

此尚書之名所由立也漢因之以尚書爲中

臺謂者爲外臺御史爲憲臺謂之三臺梁陳
後魏北齊隋則曰尚書省

置僕射

古者重武故官曹之長王領其屬而習於射
事隨所領之事以爲號若尚書則曰尚書僕
射漢因之本置一人至獻帝分置左右後無
恒置

祠鄒嶧山始刻石爲頌

後世刻石頌功始于此

始東行郡縣上泰山陽至顛立石頌德從陰道
下禪於梁父

按封禪雖見於前然皆空言此則見之行事
後漢之光武唐之高宗宋之真宗皆效尤之

收秦半之賦鹽鐵二十倍于古

鹽鐵從此大爲天下利矣

東遊海上方士徐市等請童男女入海求三神
山不死藥

按方士始見于此嗚呼天下豈有不死之人不死之藥哉始皇既平六國志欲大遂惟求久壽於是信方士之言以求長生惑也甚已東遊海上祠名山大川及八神將

八神一曰天二曰地三曰兵四曰陰五曰陽六曰月七曰日八曰四時神將之祠起于此或曰自古有之

置謁者

卽通事之職也魏始置通事舍人

行半兩錢

古人錢字作泉自是始稱錢而後之八銖四銖皆原于此

以周青旦爲博士僕射

博士亦秦官也

立治粟內史掌穀貨

治粟內史秦官也

立少府掌山海池澤之稅以給共養少府亦秦官也

王次仲制八分書

八分書亦始於秦

始作前殿上可以坐萬人下可以建五丈旗
作殿始此

用李斯言以諸生是古非今請史官非秦記皆
燒之所存者醫藥卜筮種樹諸書

按先王典謨禮樂至是燼滅若又一天下也
當時蒼頡作書鬼夜哭鬼神先知其悲也在
是歟

置奉常典禮

漢改爲太常

置中庶子詹事

詹事官名始於此少詹事則唐所加也

使黔首自實田

富者從此田連阡陌矣

置都水長丞

都水之名始于此

置將作少府掌治宮室

將作秦官也

伐匈奴

書伐夷始此因識伐夷非不得已者也開邊之師從此始矣

初開南越地爲郡

此南越屬中國之始按南越地自古不通中國始皇發逋亡人贅壻賈人爲兵畧取南越陸梁地置桂林南海象三郡徙民五十萬人與越雜處五領之地遂合至今風俗移易與內地同而又資其物產始皇開拓之功此其最著也

置黃門侍郎

按禁門曰黃闥中人主之故號黃門今然則黃門郎給事黃闥之內入侍禁中故號曰黃門侍郎又有給事黃門之職漢因之

置散騎騎從傍乘輿車後獻可替否又置中常侍得出入禁中常侍左右

散騎常侍官名始于此無常員

始置閩中郡

此閩地入中國之始閩王無諸亦勾踐之後沙門室利房等至帝囚之夜有金人破戶以出按列子曰西極之國有化人來穆王事之作中天之臺信此則周秦已有佛矣

置衛尉掌門衛屯兵

衛尉秦官也漢因之

置諫大夫屬郎中令掌論議

諫大夫官名始此漢因之光武始增議字

置御史大夫掌副丞相置御史中丞掌二大夫

應劭曰侍御之率故曰大夫

令百姓納粟一千石拜爵一級

後納粟拜爵始此

秦欲伐匈奴運糧使天下飛芻輓粟起于黃腫瑯琊負海之郡轉輸北河率三十鍾而致一石按飛輓始于秦蓋由海道以入河也恐海運秦已有之

收匈奴河南地爲縣

始皇遣蒙恬斥逐匈奴收其河南地以為四十縣南郡越北邑夷至是中國之地益大嗚呼變夷為華是又世變之一初也
出長子扶蘇監軍于邊

按監軍始此

秦置大駕屬車八十一乘法駕半之左右分行其車皆皂蓋赤裏木輜輜戈矛弩箠尚書御中
所載最後一乘懸豹尾豹尾以前為省中

鹵簿起于秦

秦馳道之麗道廣五十步三丈而植厚築其外
隱以金椎植以青松

馳道始于秦

陳勝以上蔡人房君蔡賜為上柱國

上柱國秦以前尊官也

作極廟

生而自為廟始此後之顧成德陽皆此類也
樂錄琵琶本出於絃鞞百姓苦長城之役絃鞞而鼓之

或云漢公主嫁烏孫匈奴遂遠無以樂之迺
馬上作琵琶

蒙恬造箏

箏秦聲也

蒙恬造筆

牛亨曰以枯木爲管以鹿羊爲柱以兔毫爲
被此筆之始也

秦始皇於驪山下鑿三泉藏奇器珍怪令匠作
機弩有穿近者輒射之上具文下具地理工

匠爲機者皆閉墓中

按厚葬始此嗚呼秦之法巧且備矣將以永
藏爲萬世計耳僅再期而楚人發之何機
之不足恃也以後帝王之墓無有不發者實

自始皇厚葬始

秦始皇起寢殿于墓側

此墓祭之始也

令後宮無子者皆從死

按宮人殉葬始此遂爲萬世厲階何秦人之

多不始也

秦二世皇帝

宦者趙高丞相李斯立少子胡亥為太子

嗚呼此萬世宦者擅立儲君之始

發問存成

後世發民戍邊始此

秦以宦者趙高為中丞相

嗚呼此後世用宦者輔相之始觀二世之所

以用高所以謀秦及其所以自為謀萬世

之下可以鑒矣

秦斬李斯夷三族

前有族誅未聞及三族者此一厲階也

宦者趙高弑其主胡亥立子嬰

嗚呼此萬世宦者弑逆之始

楚義帝以宋義為冠軍

後冠軍侯其義起于此

項籍屠咸陽殺子嬰掘始皇冢大掠

屠咸陽冢始于此

漢拜韋信爲大將軍信曰一人關除秦苛法
秋毫無所取無不欲大王王秦者今舉兵而東
三秦可傳檄而定也

始稱檄檄自戰國時始有即古文告之辭

二月甲午漢王築壇即位于汜山之陽

即位壇始於漢

鷄林子曰余讀史至於秦紀次焉曰士
三代之後信不幸哉夫三代以上一宇宙
也三代以後又一宇宙也秦實開之何則

自秦廢井田無復見古人畫野分疆之制
廢封建無復見古人大國小國之制自焚
書無復見古人文字自更法無復見古
典禮深可歎也夫秦法本亂政也而後之
人尊尚之百世不易何哉豈非混沌一鑿
不可以復返耶大抵世世相承沿襲耳目
而古法既廢考究莫詳故耳然有聖人出
則何如救偏補弊其所損益可知也

古今原治第六卷終

古今原始第七卷上

漢太祖高皇帝

更王后曰皇后王太子曰皇太子尊母曰昭靈夫人

按即位后子皆加皇號自此始今母止尊以夫人父仍稱太公何也

張良至褒中說漢王燒絕棧道

棧即閣也即今之閣道

桐城趙猷



入關問秦上帝祠何帝也曰四帝有青白黃赤
帝之祠高祖曰吾聞天有五帝乃立黑帝祠命
曰北時

祠五帝始此

畝蕭何收巴蜀租給軍食

收田租始見于此

漢王屯滎陽築甬道屬河以取敖倉粟

甬道始于漢

初爲筭賦

古之治民者有田則有稅有身則有役蓋稅
出財役出力漢始立筭賦之法民年十五而
筭出口賦夫以一人之身既役其力又稅其
財苟給一時之用遂貽無窮之害矣

封項籍族屬四人爲列侯賜姓劉氏

按賜國姓始此漢既賜項又賜婁敬後世又
賜匈奴而劉淵者既冒其姓又并天下而冒
之

詔爲列侯食邑者賜大第室吏二千石受小第

室

孟康曰有甲乙次第故曰第後稱甲第始此
燕王臧荼反帝自將擊虜之

書人君自將始此

命天下縣邑城

按郡邑立城自漢始

剖符封功臣曹參等爲通侯又與功臣作誓丹
書鐵契金匱石室藏之宗廟

按賜券始此古者爵有公侯伯子男五等既
列爵必分土使君之自秦漢以來始封以郡
邑之名惟奉朝請而無國漢爵止於侯而無
公伯子男此又與古異者也

分封宗室爲王

古封爲諸侯今封爲王後因之

尊父太公爲太上皇

秦以追尊今則用之於生存之日後世遂祖
之以爲極尊之稱也

未央宮成高祖大朝諸侯群臣置酒未央殿前

奉玉卮起爲太上皇壽

上壽始見於此詩曰爲此春酒以介眉壽或古有之

以陳平爲護軍中尉統諸將

護軍始此

漢置州之佐吏有別駕治中主簿功曹書佐簿曹史典等官皆州自辟除通爲百石

按別駕治中主簿功曹書佐史典皆起於漢徵魯諸生起朝儀轉士叔孫通采古禮雜秦儀

上之

按朝儀更定於此

制王侯及郡守長吏于所部其指令皆稱教

稱教始此

制禮儀有章表奏駁四品

此漢制也

冬十月朔行朝歲首禮

此後世元旦朝賀之始

是日行朝賀禮畢置法酒群臣侍坐殿上以尊

畢次起上壽觴九行御史執法舉不如儀者

按此後世錫宴之始行有制

命蕭何次律令

此後世律令之始

帝召田橫至尸鄉自刎奉首從者挽至宮不敢
哭故爲歌以寄哀者

按此挽歌之始也或曰其來久矣昔魯哀公
會吳伐齊其將公孫更命歌虞殯以示必死
或非始于田橫今不可考

太子門大夫庶子洗馬皆屬二傅太子家令丞
率更令丞僕中盾衛率等官並屬詹事

太子宫僚至漢初備

定命令稱勅

曰戒勅令勅是也至唐顯慶中云不經鳳閣
鸞臺不得稱勅勅名遂定後因之

漢儀宮城門擊刀斗周廬擊木柝

刀斗自漢始用

皇女封縣公主儀服同列侯其尊崇者號長公

主儀服同藩王女曰公主姊妹曰長公主
縣公主長公主始于漢

詔讞疑獄

書讞獄始此

冬始與匈奴結和親以長公主妻單于
此和親之始

令縣常以春三月及時臘祠社稷以羊豕

郡縣祭社稷始此

令郡國縣立靈星祠

龍星左角曰天田則農祥也晨見而祭靈星
祠始此

令民里社各自以財祠

里社始此

以叔孫通爲太子太傅

太子有師保二傅殷周已有之恐不以太子
爲名至此始以名官後曰之又有太師太保
之稱

輿駕有象車鼓吹十三人中道

象車漢鹵簿最在前者

賜蕭相贊拜不名履劍上殿

書贊拜不名履劍上殿始此

置大長秋中長秋諸宦官屬焉

長秋之名所由起也

徙齊諸田楚昭屈景燕趙韓魏後及豪傑名家
居閔中

徙民實京師始此

有更賦

更賦有三品有卒更有踐更有過更或云因
秦法行之後遂改易有謫乃戍邊一歲耳

詔郡國求遺賢

此古今第一詔也旨哉

太上皇崩令諸侯王國皆立廟

按立廟郡國自此始

朝以十月車服黃屋左纁

黃屋左纁始于漢

樂布為燕相燕齊間為立社號曰樂公社

配食縣社始此

復沛民

帝自將破英布還至沛謂沛父兄曰遊子悲

故鄉吾雖都關中千秋萬歲後吾菟兔猶思

沛且朕自沛公以誅暴逆遂有天下其以沛

為朕湯沐邑復其民世世無有所與後世創

業之君復其鄉邑者蓋本乎此

以周昌為趙王如意相

為諸侯王立相始此

帝以太牢祠孔子于曲阜

萬世祀先師之始

五月葬長陵

稱陵始此

漢以來帝王陵寢有石麟辟邪兕虎之屬人臣墓有石人羊虎柱之屬皆表墳壠如生前儀衛用石人羊虎疑起于漢

孝惠帝

尊皇后曰皇太后

書尊母為太后始此

令民買爵贖罪

書贖罪始此按舜典金作贖刑非利之也惠帝令民有罪得買爵三十級以免死罪則是富者有罪非徒免死又因而得爵嗚呼賞罰濫矣

賜民爵戶一級

普賜天下民爵始于此自後凡初改元率以為例

令女子年十五以上至三十不嫁五筭

漢筭人百二十錢賈與奴婢倍筭今五筭罪

之也

舉孝弟力田

孝弟力田上之人特設科以誘之世道可知
已此一變端也

除挾書律

至是而書始出矣幸哉

立原廟

按原者再也先既立廟今又再立故以原名
先王之祀有時享有禘祫奉之有常立原廟
褻矣

春出遊離宮叔孫生曰可取櫻桃獻宗廟上許
之

廟中獻諸果自此始

冬十月始置左右丞相以王陵為右丞相陳平
為左丞相

名始于商書而與丞並稱未有也

以周勃為太尉

太尉之名始此

太后呂氏立所名帝子為皇帝

此後世立假子之始

太后呂氏自臨朝稱制

此母氏臨朝之始古今一大變也曰不幸子
幼則如之何曰有制焉君薨百官總己以聽
于冢宰

太后追尊其父為宣王兄澤為悼武王

嗚呼此漢以來尊崇外戚之始

太后以嬖臣審食其為左丞相監宮中

嗚呼此寵任嬖倖之始

魯元公主薨賜謚為魯元太后

公主謚太后始見于此

立公主子張偃為魯王

公主子封王始見于此

以宦者張卿為大謁者受宣詔命

用宦官之始

初令戌卒歲更

按戌卒歲更自此始

漢文帝

太尉勃上天子璽代王謝曰至代即議之
諸侯王即始見于漢

賜民酺

酺祭名周禮族長因祭酺而與長幼獻酬故
為酺古有酒禁漢法三人無故群飲酒罰金
四兩文帝即位首賜天下會聚飲食凡五日
意在悅民也後因之

立先馬秩六百石職如謁者太子當直者前導
先或作洗洗馬始於漢

令四方毋來獻

書卻貢獻始此

脩代來功封宋昌為壯武侯

此藩王入繼封其臣僚之始

十一月晦日有食之詔求言

此因災異求言之始

舉賢良方正能直言極諫者

後世策士求言之始也

吳王濞為劉氏祭酒

始有祭酒之名至晉始置國子祭酒
顏陰侯騎賈山應詔上書

此應詔上書之始

詔勸農

後世勸農始此

賜天下今年田租之半

賜民租始此

令列侯太夫人毋得擅徽稱

如淳云列侯子復為列侯毋稱太夫人漢制
也今夫不在則封號稱太

濟北王興居及尋自殺

藩王反始此

募民徙塞下

此募民徙邊之始

除盜鑄錢令使得自鑄

後世弛私錢禁始此唐玄宗欲倣而行之劉
秩言其不可利源無制則爭且亂矣

律吏五日一休沐

休沐始於漢

出宮人令嫁

此放宮人之始

錯為太子家令

家令漢官或云秦官屬詹事

冬十二月河決酸棗始興卒塞河

河始為世大患

除肉刑

三代以前所謂肉刑者墨劓剕宮大辟五者

至漢時僅有三焉黥劓斬趾而已文帝感淳

于公少女緹縈之言始下詔除之遂以髡鉗

代黥笞三百代劓笞五百代斬趾自是天下

犯法者始免斷肢體刻肌膚之慘矣

令祝致敬毋有所祈

秦時有秘祝移過于下文帝禁之自後不祈

始此

冬匈奴寇邊帝親勞軍勒兵

此後世人君親勞軍之始

募民能輸粟及轉粟於邊者拜爵

輸邊之議始此

始用薄昭為車騎將軍

車騎將軍之名起于文帝

始親策賢良文學士

此後世人主親策士之始

作顧成廟

身存而自為廟也顧成者取尚書顧命之意

詔更元

人君即位之一年是謂之元元者首也始也
國無二王故年無二元自三代以來未之改
也文帝信新垣平候日再中之說於是乎詔
以十七年為元年是失春秋正始之意矣後
世有一君而二元三元者有之甚乃至於六
七元焉此一妄端也

命博士諸士刺六經作玉制

始崇六經

始短喪

三年之喪自天子達於庶人三代共之文帝以一己之見輕變先王之制景帝苟徇亂今變爲以日易月後因踵以爲常雖有賢孝之君痛欲復古然旋復旋廢至今未能如禮嗚呼文帝作之景帝述之其罪均矣

漢景帝

尊皇太后薄氏曰太皇太后

此稱太皇太后之始

冬十月尊高皇帝爲太祖孝文皇帝爲太宗

追尊祖宗廟號始見于此一世爲太祖再世

爲太宗遂爲後世法

始三十稅一

寬賦至此極矣恐非法也

令男子二十始傅

按傳著也言著名籍以給公家徭役也漢制
民年二十二始傅五十六乃免今制令二十
始傅

置太農令掌穀貨

即秦理粟內史之職也武帝更名曰大司農
作陽陵邑

此後世豫作壽陵之始

封匈奴降者徐盧等爲列侯

後世封降夷爲侯始此文帝時雖有弓高襄
城兩侯乃韓王信子係非匈奴也

改磔爲弃市

弃市始此

楚王邛等重逆無道燒宗廟帝素服避正殿

避殿始于此

夏旱禁酤酒

漢興有酒酤禁三人以上無故群飲罰金四
兩雖非古法然猶有周官萍氏所掌幾酒之
餘意文帝禁民毋爲酒醪以靡穀景帝因旱
又禁無所利之至武帝時爲榷酤之法始用
是以罔利矣此亦揀荒之一端也

脩賣爵令得輸粟縣官除罪及徒復作

贖徒始此

匈奴入雁門武泉上郡取苑馬

漢太僕牧帥諸苑三十六所分布北邊西邊以卽為苑監官奴婢三萬人養馬三十萬匹按苑馬始于漢

更減笞法定箠令

帝初減笞法然其數猶多或笞未畢而人已死矣至是又下詔減三百為二百二百為一百因是定箠令箠長五尺其本大一寸竹也

末薄半寸皆平其節當笞者笞臀毋得更人一罪乃更也自是笞者得全云

更衛尉為中大夫

按衛尉秦官也漢因之今始更名

改奉常為太常

太常官名始此

更名郡守為太守

稱太守始此

改廷尉為大理

大理名官始此後或稱廷尉或稱大理至梁
加卿字曰廷尉卿

孝武皇帝

建元元年

年之有號起于此

以竇嬰為丞相

後世寵任母黨此為之兆

以後宮夫人異父弟衛青為太中大夫

此私任後宮親屬之始

親策董仲舒凡三問

臨軒策士始此

帝始為微行

微行始此

始置五經博士

置五經博士始見于此嗚呼五經自秦火之
後為世大禁漢興稍復出然皆私相傳習至
是官始置五經博士然後天下之人公相授
受以為世業武帝有功儒教豈小補哉

為博士官置弟子五十人復其身

此太學生入仕之始自武帝立五經博士弟子置員設科射策訖于元始百有餘年業者盛一經說至百萬餘言大師衆至千餘人蓋利祿之路始開也

南越遣子嬰齊入宿衛

此外國遣子入衛之始

初令郡國舉孝廉秀才

孝廉秀才起於漢

定三歲一郊

三歲一郊始此

始親祀竈

禮竈者老婦之祀也今天子親之矣

始用霍去病為驃騎將軍令秩祿與大將軍等

驃騎將軍起於武帝

立太乙祠

自是五帝之上復有太乙尊神舍園邱之位而開八通之鬼道舍冬至之月而用春秋之

二時果何所據耶然祀以昏時及明而止至今正月望日夜遊觀燈是其遺事

河徙頓邱始通淮泗

河水入泗由泗入淮始此

以衛長公主妻欒大曰大主將相以下皆遺獻之

此武帝姑也大主之號始此

通西南夷置犍為郡

始闢地於西南

武帝登嵩聞山呼萬歲者三遂為臣祝君故事

山呼自此始

虞初撰周說九百四十三篇

小說家始於虞初

初筭商車

古人關市征歛惡其逐末專利而抑之初非利其貨也武帝始筭商車而取賈人之緡錢非但稅其物乃計其載物之器而稅之矣

帝以象牙簾賜李夫人

牙之用至是益褻矣

帝寵竇太主所私董偃稱曰主人翁後卒與太主會葬於霸陵

公主貴人多踰禮制自董偃始

元朔元年

三改年號始此

始置蒼海郡

始闢地於東

李夫人之亡少翁言能致其魂上念夫人無已

使致之少翁夜爲方帷張燈燭帝坐宅帳自帷

中望見之彷彿夫人也

此後招魂之所自也

徵吏民明世務習先聖之術者縣次續食

後舉子傳食之始

鄭當時請引渭穿渠徑易漕度渠下民田可溉兼損漕省卒

始講漕法

臨菑人主父偃嚴安無終人徐樂皆以上書拜

為郎中

後上書人得官始此

始立朔方郡募民徙之

始闢地於河朔

以公孫弘為丞相封平津侯

丞相封侯自弘始

元狩元年

四改年號始此

遣謁者巡行天下

後世遣使巡行之始

遣張騫使西域

遣使通西域之始

立樂府

按樂府始此

作昆明池

演水戰始此

通滇國

此雲南通中國之始

初置八校尉

始稱校尉

匈奴渾邪王降置五屬國以處其衆

此匈奴來降之始

始造皮幣

按武帝時錢濫而物貴遠方用幣煩費不省
有司議以白鹿皮方尺緣以藻績爲皮幣直
四十萬王侯宗室朝覲聘享必以皮幣薦璧

然後得行此盖用皮爲幣雖與楮鈔不同然
不用金銀銅錫爲幣而用他物代之則權輿
于此也

武帝之文始以集著

文集起於漢武帝今田父野老亦皆有集
始置鹽鐵官

後之有天下者鹽鐵置官始於武帝
初等緡錢

此漢以來征榷居貨之始按武帝於元光五

年既筭其行者之車至是又用公卿言凡居貨者各隱度其財物之多少於商賈末作率計有緡錢二千者出一筭於手力所作而賣者率計有緡錢四千者出一筭嗚呼出諸途者既征其齎載之具藏諸家者又筭其儲積之物取利至此哉

置媿好視上卿比列侯始有媿好之號

河南人卜式請輸錢縣官以助邊上賢之拜式爲郎中又擢爲齊太傅以風百姓

按小民輸粟得官始此

募人入奴婢終身以爲郎

此以奴婢易官之始也

筭民舟車

元光五年止筭商車至是又併筭民車且及船焉凡民不爲吏不爲三老騎士苟有輕車皆出一筭商賈則倍之船五大以上出一筭匿而能告者以半畀之遂使告緡者遍天下

則凡民有蓄積者皆為有司所隱度矣嗚呼
取民至此民何以為生子

以下式為中郎賜爵左庶長

書賜爵始此然所賜者庶長也至宣帝以後
則所賜者皆侯矣

策
廟立子閔為齊王旦為燕王胥為廣陵王作誥

此用策封之始也書廟立亦前所未見

邛仲造笛長尺四寸七孔

笛出於孝武時

下大農令顏異于獄論以腹誹罪殺之

腹誹之誅古所無也

元鼎元年

五改年號始此

始置大司馬以冠將軍之號寵衛青霍去病

古司馬夏官也今武帝立此以寵武臣之執
國柄者宰相之權因此廢矣

西域始通中國

此西域通中國之始

置水衡都尉掌上林苑

上林苑起於漢後因之

始禁郡國鑄錢

至是官鑄錢

更大行人爲大鴻臚

周禮大行人掌賓客及諸侯朝覲事即其任也秦初置典客漢因之景帝名大行人武帝改之至梁則曰鴻臚卿後因之

秋九月嘗酎列侯百有六人坐獻助祭金不如令奪爵

酎金奪爵罪輕而法重非爲金也以封爵過多故耳

置酒泉武威郡

按酒泉今肅州武威今涼州也二郡乃渾邪王故地

封周後姬嘉爲周子南君

錄前代後始見于此

更郎中令名曰光祿勳

光祿勳官名始此至梁除勳字加卿字曰光祿卿後因之北齊兼掌肴膳隋則全掌肴膳不復掌宮殿門戶及侍衛事矣

光祿勳有南北司主事諸郎之中察茂才高第者爲之

主事官名始於漢

平西南夷置牂牁越雋沈黎文山武都郡

此西南夷置郡之始

置張掖燉煌郡

按張掖燉煌立郡始此

元封元年

按六改年號始此

始置均輸平準

先是桑弘羊爲治粟都尉領大農盡管天下鹽鐵乃置大農部丞數十人分主郡國令遠方各以其物如異時商賈所轉販者爲賦而相灌輸置平準于京師都受天下委輸貴即

賣之賤即買之欲使富商大賈無所牟大利而萬物不得騰踊嗚呼堂堂大朝乃與商賈競刀錐之利乎

築單于邸于長安單于遣子來質

始有蠻夷邸即後之四夷館也

公孫卿言仙人好樓居乃令長安中作蜚廉桂觀甘泉作益壽延壽

樓觀始盛於此

築受降城

史凡數見此其一也

甘泉房中產芝

書芝始此

遣將擊朝鮮

書征高麗始此

輿駕祀甘泉汾陰罽罕左右及節十六後有御馬三

按儀馬之設自漢始見

大宛以蒲陶爲酒馬嗜苜蓿漢使其實來天

子始種苜蓿蒲陶肥饒地

蒲陶苜蓿始至中國

初通安息發使隨漢使來觀漢廣大以大鳥卵及黎軒善眩人獻于漢

眩人善變幻惑人即今之吞火吞刀植瓜種樹屠人截馬自縛自解之術也眩戲始於此起建章左鳳闕

始有鳳闕之稱

始置益用郡

此郡縣雲南之始

改秦中尉更名曰執金吾

金吾之名始於此

初作角觝戲魚龍曼延之屬

此後世戲樂之始

始制樂浪臨屯玄菟真蕃郡

此郡縣高句麗之始按文帝時陳武等議伐朝鮮謂南越朝鮮自全秦時內屬為臣子則朝鮮在秦時固已屬中國矣漢初方擁兵阻

險自國其地至是武帝因其殺遼東都尉遣
荀彘楊僕等討之朝鮮人殺其王右渠以降
始置此四郡

初置刺史

冀幽并兗徐青揚荆豫益涼州及朔方交趾
凡十三郡後世監司之設肇端于此

太初元年

七改年號矣

漢異姓婦人以恩澤封者曰君比長公主

婦人始有封君之號

初置京兆尹

京兆尹官名始此即周之內史也

尊王太后母臧兒爲平原郡君

此封郡君之始

又封太后微時金王孫家所生姊號修成縣君

此封縣君之始

爲太子立博望苑使通賓客

此太子賓客所由始也

始用宦者主中書

用宦者典事始此中書之名因武帝遊宴後
庭始以宦者典書尚書謂之中書首以司馬
遷爲之此即周官內史之任也

天漢元年

按年號已八改矣

初權酒酤

古有禁恐民之沉酤喪德糜穀耳無所利之
也武帝始爲征權之禁謂之權者禁民酤釀
官有開置獨專其利如渡水之權焉是古人
之禁酒惟恐民之飲後之禁酒惟恐民之不
飲也爲法之弊一至是哉

作沈命法

捕盜也曰盜起不發覺發覺而捕不滿品者
主者皆死至是上下相匿以文辭避法矣

太始元年

九改元矣

始令列侯之妻稱夫人列侯死子復爲列侯乃

稱太夫人子不得爲列侯則不得稱

始有夫人太夫人之稱

行幸甘泉宮饗外國客

宴外國使臣始於此

征和元年

十改年號

令封君以下至三百石以上吏以差出牝馬天下亭亭有畜牝馬歲課息

始有種馬

詔行代田以趙過爲搜粟校尉

代田之名始見於此

莊熊羆引洛水至商顏下岸善崩乃鑿井井下相通行水

井渠之生自此始

以江充爲使治巫蠱獄

巫蠱之名始見於此

後元元年

至是十一改矣古今罕見

孝昭皇帝

追尊李夫人爲孝武皇后

此後世尊夫人爲皇后之始

追尊帝生母趙氏爲皇太后

追尊生母爲皇后始此

遣使祀鳳凰

書祀鳳凰始此

遣使賑貸貧民種食

賜種食始此

封后父上官安爲桑樂侯

后父封侯起于此

罷榷酤官猶令民自占租

前榷酤官自釀以賣也至是以賢良文學言

罷榷酤官猶聽民自釀而賣官定其價每升

四錢隱度其所賣之多寡以定其稅此即胡

寅所謂使民自爲之而量取其利也邪後世

稅民酒始於此

初置金城郡



今河蘭等八州之地

徵有行義者韓福等至長安

書徵士始此

霍光廢其君歸昌邑

此後世人臣廢立之始嗚呼國家之事孰有大於立君也哉人臣之罪孰有次於廢君也哉霍光此舉以一時利害論之雖若忠於漢室以萬世綱常論之實得罪於名教原其所失不在於廢之之時而在於立之之始也人

臣舉事稍不詳審卒爲亂階霍光不得辭其責矣然則伊尹放太甲非歟曰孟子自言有伊尹之志則可無伊尹之志則篡也可者僅可而有所未盡之辭

孝宣皇帝

追謚帝太父故太子據曰戾太子大母曰戾夫人父曰悼考母曰悼后置園邑

後世自外入繼正統追謚其本生祖父母父母始此

遣使問吏民

遣使問吏民僅見於此

大司馬大將軍博陸侯霍光卒賜以天子葬具
賜大臣以非所當用之禮始此亦名器之不
慎也

帝始五日一聽事

漢朝無定日又不日日臨朝至此始五日一
聽事

耿壽昌白增海租

後魚裸始此蕭望之言縣官常自漁海魚不
出後與民魚乃出天地之意可見矣

丞相韋賢致仕

丞相致任自賢始

齋居決事

稱齋居始見於此

賜外祖母號爲博平君

推恩外祖母始此

詔自今子匿父母妻匿夫孫匿大父母勿治

律有所謂親屬相為容隱者本諸此
帝更名詢

天子更名之始也

張賀為掖庭令宣帝以皇曾孫收養掖庭恩甚
密及即位追封恩德侯

此追錄掖庭舊恩之始也

追尊悼考為皇考立寢廟

後世外蕃入繼正統為其本生父母立廟始
此

衛侯馮奉世矯發諸國兵破沙車

矯制發兵始此

錄阿保功封丙吉等為列侯

錄養保功始見于此

求高祖功臣子孫失侯者復其家

書錄功臣後始此

蕭望之以射策甲科為郎

自是有甲乙科

丙吉居相位掾史有罪臧不稱職終無所案驗

後人代告因以為故事

公府不案吏自丙吉始

詔王褒等之太子宮侍太子朝夕誦讀

按宮僚始於此

西羗反募飲飛射士魯竒應募宜受上賞

召募之始

初置屯衛

屯衛之立起于此

遣後將軍趙充國擊先零叛羗屯田湟中

書屯田始此

年八十以上非誣告殺傷人勿坐

年老收贖義起于此

春二月甘露降京師

書甘露始此

遣光祿大夫義渠安國行邊兵

後遣大臣行邊皆原于此

諫大夫王吉謝病歸

人臣託病去位始見于此

以宦者弘恭為中書令石顯為僕射

宦者之設三代以前本以給役武帝遊宴後庭始命以典事然所用者乃腐刑之司馬遷彼固知道義識古今者也然遷不世有後世遂襲以為故事以國家樞機之重委任昵近其不至蔽聰明竊威柄也幾希先儒謂宣帝開三大讞終以亡國用恭顯其一也愚竊以為宣帝非但用之以亡漢後世因之以亡其國者實帝為之

鄭吉破車師降日逐威震西域遂并護車師以西北道故號都護

都護之置自吉始

冠太子以正月冠諸王遣使行事

太子行冠禮始見于此

置金城屬國以處降羗

立屬國始見于此

司隸校尉蓋寬饒奏封事犯時忌被殺

以犯忌殺言者又開一讞也

地震詔舉郡國文學高第各一人

因災異舉士之始

以故許后季父延壽為大司馬車騎將軍

自是以後將軍司馬之任專以任外戚終漢
之世

匈奴呼韓邪單于稱臣遣弟入侍

匈奴稱臣入侍始見于此

戴德以朋友有同道之恩加麻三月

朋友之服始於大戴

初置常平倉賜耿壽昌爵關內侯

築倉儲穀始此

畫功臣十一人於麒麟閣

後世圖功臣像始此

詔諸儒講五經同異於石渠閣帝稱制臨決

書講經始此

于定國決獄平郡中為之立生祠號曰于公祠

生祠始見于此此民所自立者後違道要之

甚有在位而自立者可笑也已

帝召太子至遲問故曰太子出龍樓門不敢絕
馳道西至城門得絕廼度因著令太子得絕馳
道

天子得絕馳道始於此

孝元帝

作初陵不置邑徙民

此可為萬世法也

常玄成議毀主瘞於園

魏議應埋太廟兩階間後議祧主藏於石室

禘祫廼祭

貢禹議古無口錢起武帝征四夷重賦於民產
子三歲則出口錢故民重困至於生子輕殺甚
可悲痛宜令男七歲去齒乃出口錢年二十乃
筭天子行其議

產子七歲廼出口錢自此始

孝成帝

帝專委任王鳳策免大司馬車騎將軍許嘉
此策免大臣之始

置尚書員五人

自武帝用司馬遷為中書令宣帝因以授恭顯國家樞機遂屬之宦官元帝時蕭望之言武帝始用宦者非古制宜更用士人元帝不聽至是王鳳欲專內外之政始罷中書謁者奪其所掌尚書之事而增置尚書員始以士人為之按尚書之名起於秦武帝初置四人至是成帝增一人為五五人者常侍曹二千石曹民曹主客曹三公曹也後世尚書分曹

始於此

帝立成佯狂讓封其兄

讓廢始見於此

令郡二千石賜告不得歸家

漢律二千石有賜告有予告予告者法所當得賜告者病三月當免天子優賜其告使得印授官屬歸家理疾今郡二千石賜告不得歸家自馮野王始也

詔光祿大夫劉向校中秘書

命儒臣校書始見於此
遣使求遺書

自秦人焚書之後書籍散亡多矣漢興始收
之開獻書路置寫書官設藏書府稍稍復集
今又譴謂者陳農求遺書於天下美哉

班游為右曹中郎將與劉向校秘書每進讀群
書上器其能賜以秘書之副

此賜書所由始

定陶王康來朝遣還國

人君未有繼嗣留親王之繼次者奉藩京師
以待皇嗣之生然後遣之國此萬世根本之
慮今遣王之國奸臣之計也

封婕妤趙氏父臨為成陽侯

婕妤父封侯前此未有也自茲始

立從子定陶王欣為皇太子

書立兄弟之子為嗣始此

以大司馬大司空並丞相為三公

按三公之官虞夏商已有之漢因秦以丞相

御史大夫太尉為三公至是改御史大夫為
大司空並太司馬丞相為三公哀帝時又罷
丞相置大司徒並大司馬大司空為三公嗚
呼太尉兵官也御史大夫法官也司徒司馬
司空六卿也乃以當論道經邦燮理陰陽之
任名不正矣

罷刺史置州牧

此州牧所由始也

師丹上書請限民名田

始有限田之議此善政也惜不果行

於大行前拜孔光為丞相

樞前拜相始此

令博士弟子父母死予寧三年

後世士子丁父母憂始此

孝哀皇帝

皇太后傅氏崩合葬於孝先陵

此後世以妾母合葬大君之始

漢成都侯王商以特進領城門兵置幕府得舉

吏如將軍

特進起於漢位在三公下

下司隸鮑宣獄抵以罪太學諸生守闕上書救之

此後世太學生上書之始

博士弟子秦景始傳浮屠經

此佛書入中國之始

李尋有五經六緯之言

識緯起于哀平之世

孝平皇帝

春正月復南北郊始定合祀天地配以高祖高后

嗚呼祀天而配以祖考禮也莽欲諂元后而並以高后配享后可諂也上帝其可諂乎其失禮甚矣後女后有親祀南郊者皆萌于此蓋以可合祀則亦可以祀矣

劉歆移太常孔稚圭因有北山移文

後世文移始於此

始追謚孔子為褒成宣尼公

謚先師始於此

莽以崔篆母師氏通經學百家之言賜號義成夫人

夫人封號始於莽

莽諷吏民上書頌德前後四十八萬七千餘人莽自加九錫

此後世權臣受九錫之始按韓詩外傳曰諸侯有德天子一錫車馬再錫衣服三錫虎賁

四錫樂器五錫納陛六錫朱戶七錫弓矢八錫鈇鉞九錫秬鬯

莽發故太后傳丁二塚取其璽綬

後世官府發人塚始此

謝翺承莽意奏丹書有文曰告安漢公莽為皇帝

符命之說始於此

郡國縣鄉皆置學官

學官之設始於此

起辟雍靈臺

始建辟雍

古今原始第七卷下

桐城趙鈇鼎卿著

世祖光武皇帝

以識用王梁為太司空

人君以識用人僅見於此

安定人盧芳詐稱漢宗室匈奴迎立以為漢帝

外國立中國人為君始見於此

初起太學

武帝時雖置博士弟子而史不明言其為太

學後世立太學其名始見於此
帝視太學

此後世人君視學之始

立親廟洛陽祀父南頓君以上至春陵節侯五
官中郎將張純太僕朱浮議除之

四親廟始此

徵處士嚴光至京師帝臨所館視之

按親臨處士僅見於此

詔許盜相斬除罪

後世著為令而自首者且貸焉

太子疆廢為東海王

後以母廢太子始此

征伐四方置督軍御史

御史監軍起於此

改常侍曹為吏部曹主選舉

是謂吏部尚書之始

南郡獻銅鼓有銘

銅鼓來自駝越

鮮卑寇遼東

鮮卑始見於此

夏四月改元

前此改號俱在歲首歲中改者始此

賜莎車王賢西域都護印綬

賜外國印始此

九真徼外蠻夷張游率種人內屬

九真內屬之始

交趾牧率七郡太守遣使奉貢

交趾入貢之始

賜莎車王謚

蠻夷有謚始於此

東夷倭奴國入貢

此倭奴貢中國之始

宣布圖讖于天下

書圖讖始此

顯宗孝明皇帝

春正月帝朝原陵

此後世上陵之始

臨辟廱行大射禮

後世行大射禮始見於此

令郡國行鄉飲酒禮於學

天下郡國行鄉飲於學始此

皇太后陰氏崩上其謚曰光烈

后有謚始於此婦人從夫禮也今日光仍用

帝謚後世用四字二字始去其主之謚而專

稱之夫亦甚矣

召張酺數侍講於御前

始有侍講而未嘗名官

遣使者以中牢祠蕭何霍光

人君遣使祠其故臣始見於此

帝奉皇太后如章陵

後世帝王奉太后出幸始見此

荊州刺史郭賀有殊政賜以三公服

後世旌部使者善政始見於此

西域浮屠法始入中國

此佛法入中國之始

西域十二月三十日是中國正月望日謂之火神變帝令燒燭表佛法天明

此放燈之始也亦云漢武祭五時通夜設燎永平摩騰首譯四十二章經

後魏晉南北朝宋皆有翻經館實始於漢

鷄林子曰吾嘗謂三代以上一宇宙也三代以下又一宇宙也秦寔開之今則自明帝以下又一宇宙矣何也夫人必有偶自

是中國始有無偶者首必有髮自是中國始有髡髮者人必有家自是中國始有出家者家必有業自是中國始有不業者書必同文自是中國始有異言者有父則有子至是有不父之子有君則有臣至是有不君之臣教至孔子而止至是有可並孔子之教者尊至上帝而止至是乃有大于上帝之神者紺殿銖衣徧滿宇宙豈非又一大變哉今之儒者廼陰尊其教陽覆其

名則尤為可歎實明帝首亂之也

詔司隸刺史歲考所部長吏殿最

此後世部使者考察屬官之始

至魯幸孔子宅

幸孔宅見於此

幸洛陽獄理出囚千餘人

幸獄僅見於此

時反支日不受章奏帝驚曰民廢農桑遠近詣
闕拘以禁忌豈為政之意

反支日不受章奏漢忌也

匈奴遣子入學

外夷遣子入學始見於此

北單于求合市許之

書合市始此合市交通異其不復入寇非安
攘至計也

幸南陽召校官弟子作雅樂奏鹿鳴帝自御埴
箎和之以娛嘉賓

書歌鹿鳴始見于此

始置中官員數中常侍四人小黃門十人

用官者有員數始此其數止於十四人後有職名者數千焉可慨也矣

哀牢夷內附

今金齒地也

修汴渠隄

書修隄始此

帝謙貶自抑不立寢廟歲主于光烈皇后更衣別室

不立寢廟自明帝始也

孝章帝

令班固賈逵傅毅作連珠

始受詔作連珠楊雄亦有連珠或不始於此

章帝東巡守使使者奉一太牢祠帝堯於濟陰

祀先代帝王始此

太學生孔僖上書自訟以為蘭臺令史

太學生因言事得用始見于此

臨鄭均宅賜均以尚書祿

幸大臣家始此

詔定律母以十一月十二月報囚

冬至後不決囚始此

漢興有草書不知作者姓名至章帝時有杜伯度崔瑗崔實皆稱工

自蒼頡科斗一變為史籀大篆再變為李斯小篆四變為程邈隸書至草書為五變矣

孝和皇帝

宦者鄭眾與誅竇憲謀以為大長秋

此東漢宦者預政之始

始封宦者鄭眾為侯

宦者封侯自此始

孝殤皇帝

太后以兄鄧騭為車騎將軍儀同三司

儀同之名見於此

孝安皇帝

太后率大臣命婦謁宗廟

時安帝年二十猶不親祀而太后專之以命

婦陪亦創見也

災異策免三公

三公以災異免始于太尉徐防司空尹勅仲長統曰光武愷數世之失權忽強臣之竊命矯枉過正雖置三公事歸臺閣三公之職備員而已政有不治猶加譴責而權移外戚之家寵被近習之孺親其黨類用其私人內充京師外布列郡顛倒賢愚貿易遷舉怨氣並作陰陽失和此戚宦之臣所致然也反策讓

三公至於死免昔文帝之鄧通可謂寵受而猶展申屠嘉之志今近世戚宦請託不行立能陷人於不測之禍惡可得而彈正哉

幸衛尉馮石府留飲十日

始見幸府抑何留連之久哉

初聽大臣二千石刺史行三年喪

三年之喪天下之通喪也漢自文帝遺詔短喪以日易月景帝遵之其後公卿大臣二千石刺史有三年喪者皆不得終制至是司徒

劉愷以為非所以師表百姓宣美風俗始詔聽之

封乳母王聖為野王君

封乳母為君始見於此

孝順帝

初令三公尚書入奏事

三公尚書得入奏事始此

初聽中官得以養子襲爵

此後世宦者養子襲爵之始古者以閹人給

事內庭以其無男女之欲子孫之累故也今

既宮之而又使之得以養子襲爵何君專用

士人哉

尚書令左雄議改察舉之法限年四十以上儒者試經學文吏試章奏

限年之法始于此

武陵太守上書以蠻夷率服可比漢人增租賦其冬遂叛

漢初改黔中郡為武陵歲令大人輸布一疋

小口二丈是謂實布今乃增租賦也
賜宦者孫程謚

宦官亦有謚矣

蔡倫典尚方作帛用故麻名麻帛用木皮名縠
帛用故魚網名網帛

帛始于倫視竹簡縑帛儉矣後有天闕剡藤
之嘆可愧也已

詔舉武猛任將帥者
後世武舉兆於此

孝質皇帝

詔郡國舉明經詣太學受業者歲滿課試拜官
有差

太學生課試拜官始此自是游學增盛至三
萬餘生黨禍兆矣

孝桓皇帝

論定策功益封梁冀萬三千戶又封其子弟皆
為列侯

以定策功論封始見于此

初置秘書監官掌圖書秘記

秘書官名始於此即中書之任也後或者或設或曰蘭臺或曰麟臺皆此官也

以宦者單超為車騎將軍

前用授勲戚之用事者今又授宦者廼以宦者盡得文武之權噫

減百官俸

減俸始此

賣閔內侯以下官

鬻爵之濫至此極矣

初歛田畝稅錢

此後世歛稅之始

帝親祠老子於濯龍宮用郊天樂

後世躋老子於上帝其端肇於此

宦者使牢脩上書訟司隸校尉李膺養太學游士共為部黨下膺於獄逮捕其黨二百餘人遂策免太尉陳蕃

按朋黨之名始見於此而黨錮之禍流毒後

世矣

孝靈帝

立選用三互法

三五謂婚姻之家及兩州人不得交互為官
置鴻都門學以處諸生之能為尺牘辭賦及工
書鳥篆者

按辭賦書篆之官肇端於此矣

作列肆于後宮帝自着商賈服從之宴飲

自是有宮中之肆矣

好私穡每郡國貢獻先輸中署名為導行費

即今之輸納常例也流毒不遠哉

刻石鏤金載五經文于太學講堂

石經始于靈帝永光年間

造萬金堂以為私藏

宮中私藏始於此

遣使就拜張溫為太尉

三公在外拜自溫始

帝協

郭汜樊稠並自開府如三公

開府之名見於此

董卓呼三臺尚書以下自詣啓事然後得行

此啓事之始也

袁紹戰罷幅巾渡河

漢末王公名士以帽巾為雅貴賤皆服之


詔遣僕射皇甫鄴和催汜催不從命

此後世人主解和臣下之始

初封曹操為費亭侯

亭侯之制自此始

古今原始第七卷下終



國家圖書館, NATIONAL CENTRAL LIBRARY, TAIWAN, R.O.C.

入
女

古今原始第八卷

三國

曹操募民屯田許下州郡並置田官

募民屯田始見此

以伏完為輔國將軍

輔國將軍起于獻帝

曹操以其子丕為五官中郎將而丞相副

丞目刻前此未有也

桐城趙氏



國家圖書館, NATIONAL CENTRAL LIBRARY, TAIWAN, R.O.C.



益州三馬張魯據漢：所惑衆

此張道陵之孫所謂五斗米賊也今世世崇尚其教而封其子孫鬼道能惑人甚矣

丹陽郡吏殺太守孫翊妻徐氏討殺之

按女子有志節始見於此

劉備三顧諸葛亮于隆中

親見處士僅見於此

漢獻帝以執金吾營劭為尚書丞僕射

僕射分置左右蓋始於此

曹操因匈奴來朝留於鄴分五部首居汾晉間尋又徙武都氏於扶風天水

曹丕始立法自今宦者官不過諸署令作策藏之石室

損宦官權僅見於此此可世世行也延行不久何

曹丕逼帝禪位遂篡立國號魏

此後世權奸逼君禪國之始

魏武蓋初始遣大將軍之而袁紹分沮授所
統諸軍為三都督

都督之名起于此

魏王丕禁錮宗室不許朝覲通往來

禁絕宗藩始見于此

詔亮以右將軍行丞相事

行丞相事之名始見于此

鍾繇為行書法非草非真離方道負入真者謂
之真行帶草謂之草行

書法至此凡六變矣蔡伯喈為八分書則七

變矣

魏初制封王之庶子為卿公嗣王之庶子為卿
侯公之庶子為亭伯

分封以漸降級始於魏然虛封不食租也

魏何晏大將軍何進孫以主壻拜駙馬都尉

此稱駙馬都尉之始也後因之初駙馬都尉
漢武置也掌御馬監兩漢多宗室及外戚與
諸公子孫任之至是為心公主者專矣

魏置諸軍都督事

始稱都督

魏始置著作郎

東漢皆以他官假著作之名今始專官隸中書省

魏置律博士

後世非五經置博士始此

魏置度支尚書

度支始於此

魏主叡徙長安鍾虞索駝銅人承露盤于洛陽銅人重不可致自鑄銅人二曰翁仲列坐于司馬門外

後稱翁仲始此

魏制後嗣有由諸侯入奉大統者不得顧私親此後之繼統之說也

魏主叡自制為烈祖廟不毀

生前豫自尊顯古所未有也

魏光祿勳高堂隆疾篤口占上疏陳戒

後口占原于此

九月皇女亡應丞侍郎范甯奏按禮喪服傳有死宮中者三月不舉祭不別長幼之與貴賤也於是使三公行事

以喪廢祭始見于此

魏司馬懿殺王凌及楚王曹彪遂置諸王公於鄴

後世禁錮諸王始見于此

晉置通事郎次黃門郎

通事官名始此晉改通事郎為中書侍郎僕射曹馥沒於寇亂嫡孫胤不得葬屍招魂殯葬

招魂之葬始見于此

十一月長至晉行賀禮

按長至之禮不見於紀傳惟晉禮志云魏晉冬至日受方國及百僚稱賀因小會其儀並於獻歲之旦志兼言魏晉不知其在何時也

吳孫休即位戶部尚書讀奏
始有戶部名

晉置鮮卑降者于雍

鮮卑五胡之一也

晉胡烈討鮮卑秃髮樹機能

北南涼之先

晉選良家女備六宮禁天下嫁娶

書選女入宮始此

吳孫權使康僧求舍利既得即為造塔

此中國造塔之始也

晉初立國子學置祭酒

此國子祭酒之始

晉有尚書都令史八人秩二百石

此都事令史之始也

晉以匈奴劉淵為左部帥

匈奴晉五胡之一也

作樂辭

舞與歌相應歌主聲舞主形自六代之舞至

於漢魏並不著辭舞之有辭自普始
晉武帝

慕容涉歸冠昌黎

前燕始見於此鮮卑不獨慕容氏如拓跋禿
髮乞伏之類皆鮮卑也按昔人有言晉之中
大率中原半為胡居劉淵匈奴也而居晉陽
石勒羯也而居上黨姚氏羗也而居扶風符
氏氏也而居臨渭慕容鮮卑也而居昌黎種
族日繁其居處飲食皆日趨于華惟其桀暴
貪悍樂鬪喜亂之志態則無時而可變也是
以劉淵一倡而并雍之胡乘四起自長淮之
北無復晉土而為戰爭之場者幾二百年嗚
呼後之人思為國家遠慮者尚為子孫豫杜
絕之晉之事可鑒也已

除祭酒曹志等名

除名始此

陸機為浚儀令去官百姓思之圖像配食縣社

留像始此

晉武帝立皇子廟祭用大夫禮

立太子廟始此

晉惠帝

成都王穎擊敗趙王倫兵帥師濟河左衛將軍
王輿等迎帝復位

書廢帝復位始此

晉右將軍王遐司馬劉曇父名遐求解職事詔
不許曇解可使換官

父諱與府主同名議避始見于此

以張軌為涼州刺史

前涼始于此

巴氏李特據廣漢進攻成都

李氏據成都始于此

鮮卑宇文部圍棘城

宇文周之先兆于此

司馬顥表穎為太弟

始有太弟之名

劉淵自稱漢王

此北狄稱王之始

羯胡石勒陷鄴

後趙起于此

晉江統議授官與本名同及官位犯祖諱宜改

避官位始見于此

晉博士孔晁上書犯帝諱後自上又觸諱而引詩書不諱臨文不諱有司奏以慢論帝持原之上書避諱始見于此

冬十月匈奴劉淵僭號于蒲子國稱帝

氏苻蒲洪自稱略陽公

符秦基于此

夏六月劉聰兵陷洛陽弑太子詮掘諸陵焚宮廟劉曜烝羊后晉主熾遷於平陽劉聰稱熾為光祿大夫平阿公

羗酋姚弋仲弋自稱扶風

後秦基于此

晉元帝

尊所生母荀氏為建安郡君

妾無並主母之禮自漢文尊薄太后後世遂襲之以為常典胡氏謂晉元此舉可謂約情合義而能以道事親者矣

孫文上言支子不應祭刁協云諸侯奪宗聖庶奪嫡况天子子宜加議罪

奪宗之議見此

晉成帝

初稅田畝三升

田畝三升起科始此

納后群臣畢賀時謂非禮

此賀立后之始也

石虎始聽民為僧

此中國人為僧之始佛法自漢明帝時入中國然漢魏時惟聽西域人立寺都邑至石虎敬事番僧佛圖澄國人化之始造寺廟削髮

出家則是中國之人為僧始于石虎時也

晉明帝

中山王睦上言乞依六蓼之祀臯陶祀都之祀相各立廟詔從之

兄弟俱封各得立禰廟始議於此

聽民劉峻出家又聽洛陽婦女阿潘等為尼

此中國為尼之始

涼州刺史張寔遣兵入援

內援始此

殷浩罷遣太學生徒

以用兵故也學校從此廢矣

魏置仙人博士

仙人博士僅見于此又一始也

石閔改趙稱衛殺石鑿而代之國號魏

再魏始見於此

立佛精舍于內殿

宮中事佛始此

拓跋珪復稱代王尋改稱魏

北朝基于此

慕容垂立于中山復稱燕

是為後燕

晉琅玕王妃敬后前薨而王後纂統追加謚號

改神主

改神主始見於此

柔然社崙自號可汗

此北狄稱可汗之始前此追封耳

晉道安受學於佛圖澄姓帛氏以師莫過於佛

遂以佛為姓

法門稱釋自道安始又道安見習鑿齒稱彌
天釋

晉懷帝蒙塵崩於平陽梓宮未返元帝立廟之
時入主太廟脩祭祀之禮

遷難未葬入廟始見於此

晉華恒議七代制之正也若兄弟旁及禮之變
也宜為神主立室不宜以室限神主今有七室
而神主有十宜當別立

兄弟相繼歲主室始見議于此

晉康帝諱岳與五岳同諱請改議

避山川之諱始見于此

姚興命鳩摩羅什翻譯佛書大營塔寺

中國有梵夾書始盛于此嗚呼先時止有四
十二章之經藏之官寺是後雖有番僧安靜
支懺康會等翻譯未甚傳布至姚興始大集
番僧以華音譯番語厥後偽詐日增遂至通
滿天下而中國虛矯者又剽竊老莊之緒餘

以紛粉飾之遂至膠固不可解散其尤可惡者竊聖經之名名之無忌憚甚也

後趙置戲馬觀觀上安詔書用五色紙啣于木鳳口而後頒之

今大禮御樓肆宥自石季龍始也

晉制角巾以葛為之形如恰而橫著之尊卑共服

葛巾始於東晉

晉令天下所在土斷

土斷欲流移附籍也其法始於晉


漢主臆立三后

立三后始此

古今原始第八卷終



國家圖書館, NATIONAL CENTRAL LIBRARY, TAIWAN, R.O.C.



古今原始第九卷

南北朝

宋武帝

桐城趙弢鼎卿著

春二月宋主裕祀南郊大赦

後世因郊肆赦始此裴子野曰郊祀天地脩
歲事也赦有罪何哉

初置貴妃位比相國

始有貴妃之號

魏立子燾為太子監國

書監國名始此

魏始封其臣為王

王爵之輕自此始

置太子侍講

魏所始立也

魏立天師道場受方士寇謙之符籙

道家之法始盛於此邨先生曰道家者流其

原出於老子漢初其法有三十七家大旨去

健美處冲虛而已無上天官符籙等事東漢

之末張道陵始創其法然惟私相授受於民

間至是嵩山寇謙之脩張魯之法自言嘗遇

老子降命繼道陵為天師賜以雲中音誦科

誡之書此後世齋醮科儀所由起也授以王

文服氣導引之法此後世辟穀脩養所由起

也又言老子玄孫李譜文授以圖籙真經劾

召百神此後世符籙攝召之術所由起也銷鍊

金丹雲英八石玉漿此後世烹鍊丹藥之技

所由起也謙之自言親得李居士筆付以奉
持輔佐北方太平真君出天宮靜輪之法謙
之獻其書於魏人多不信崔浩獨上書神其
事魏主遣使迎其弟子於嵩岳起壇宇於代
都而崇奉顯揚之親備法駕而受符籙焉自
是以來有陶弘景趙歸真杜光庭之徒又從
而推演張大之而其教遂大行於世與儒釋
並立而為三

魏主尊其保母竇氏為保太后

尊保母為后始此

宋立玄史文儒四學

又有四學之制

魏稱太平真君元年

四字紀元始此

魏詔吏民得告守令罪

吏民告言守令始此

魏主詣道壇受符籙作靜輪宮

書人君受符籙始此

魏明帝置淑妃加比三司

始有淑妃之號

魏令公卿子弟皆入太學

按公卿子弟送太學始此

宋行元嘉曆

何承天以前之曆合朔日月食不專在朔望
承天更撰新曆皆取羸縮定其小餘以正朔
望自是日食多在朔日矣

魏誅沙門毀佛書佛像

元魏廼有此舉毀之誠是也不人其人而盡
誅之過也

宋主義隆為其太子劉劭所弑

書子弑父始見于此

魏增置內外候官以伺察百官過失

元魏置候官以伺察百官過失後世寄耳目
於群小雖或因之以得臣民之陰私然小人
假是以中傷正人君子亦多矣吁魏元成其
作俑者歟

宋沙門曇標謀反伏誅

書僧反始此

魏立郡學置博士助教生員

書郡學始此

每征伐尅捷欲天下聞知乃書帛建于漆竿上
名為露布

露布始于魏

宋鄱陽侯孟懷玉母封國夫人

此夫人封國之始也洎隋高涼洗氏以功封

譙國太夫人後皆原此

宋制民歲輸布戶四疋

此非古人里布比也

宋作湘宮寺

書作寺始此

宋始令沙門拜人主

前此有不臣之人可啖也已

魏作大像高四十三尺用銅十萬斤黃金六百
斤

作大像始于此媚佛也

魏罷門房之誅

自今非謀反大逆謀叛罪止及身

魏初禁宰牛馬

宰牛馬有禁始此

魏以孔子二十八世孫秉為崇聖大夫

官先師之後始此

魏禁宗戚士族與非類婚偶

良賤不許為婚兆端於此

契丹入附於魏

契丹之名始見於此

宋西羌未平東海王上錢二十萬助國

諸王獻助始於此

齊制病因診治之法

醫治病因始此

置婉儀為八十一御女

始有婉儀之號

魏始禁同姓為婚

魏詔均田

書均田始此給事中李安世上言田業多為豪戶所占奪雖桑井難復宜更均量使力業相稱又所爭之田宜限年斷事久難明悉歸今主帝善之下詔均天下人田男夫十五以

上受露田四十畝婦人二十畝奴婢受田三十畝

齊太廟加薦褻味別祀于清溪故宅

別室薦褻味始此

魏詔漢魏晉諸陵皆禁樵蘇

禁帝王陵樵蘇僅見于此

魏詔死刑而親老無它子旁親者以聞

後犯罪存留養親寔原于此

魏改姓元氏并改其郡臣從代來者姓

元魏起漢北以九十九姓為部落其所謂姓者皆以土俗類多重復至是改之以從中夏

梁置州望郡宗鄉豪專掌搜薦

此又一始也

魏主廢其后為尼

此廢后為尼之始

魏鑄錢曰太和五銖

後世以年號為錢文始此

魏始設游軍巡察坊巷

後世於坊巷設巡軍察盜賊始此

魏胡太后以其女弟為女侍中

女侍中之名始見于此

胡太后攝行祭事

書后行祭見于此

建隆元年八月大宴廣德殿

此秋宴之始也

魏以軍功多冒濫攷勳籍

稽考勳籍始此

魏太后父胡國珣死追號太上秦公

人臣稱太上僅見此

元魏有司奏驪山有銀礦二石得銀七兩詔置銀官常令採鑄

按採銀之官始置于此

魏以崔亮為吏部尚書立停年格

此後世資格用人之始始夫人矣

宋齊以來多以檮蒲頭戰酒

按骰子之制亦有虞氏六鶴齊飛之變也

魏胡氏遊嵩高

婦人遊山之始

魏初封司空崔林為安陽亭侯

三公封列侯自林始也

魏黃權以車騎將軍開府儀同三司

開府之名起此

魏袁准正論曰同姓不相娶何也曰遠別也曰

今之人外內相婚禮歟曰中外之親近於同姓
同姓且猶不可況中外之親子今以古之不言
因謂之可婚此不知禮者也

中表不可婚議始於此

魏元又殺奚康生以宦者劉騰為司空京兆王
繼為太保崔光為司徒

宦者為三公始見此三公以宦者為之世道
可知矣

魏沃野鎮民破六韓板陸反

元魏之亂始於此

達磨自南天竺泛海至廣州後止嵩山住少林
寺傳惠可

中國談禪始於此

梁祖即位羅紹威取魏良材為五鳳樓

按五鳳樓始此

後魏於尚書諸司置主事令史

尚書諸司置主事始於魏隋去令史但曰主
事

梁始鑄鐵錢

以鐵為幣始見於此

魏杜洛周反于上谷高歡等從之

北齊起於此

梁象四時立十二卿

按古者天子諸侯皆名執政大臣曰正卿自周以來始有九卿之號其官無卿字至梁始加卿字後因之魏又各加少卿焉

北齊有督攝萬機之印一鈕以木為之長尺二寸廣二寸五分背上有為臯鈕腹下隱起篆文曰督攝萬機四字唯以甲縫

按條印蓋原於此

金城刺史院有高齋梁昭明太子於此齋造文選

梁時始有齋名

梁主蕭衍捨身於同泰寺

人主捨身初見於此

魏預徵六年租調

後世預徵民租始此

梁沈約屬辭比事往往成編為證古類事

此類事書所由起也後人倣之有白孔六帖以漸益廣

梁陳時凡國之政事並由中書省有中書舍人五人領主書十人書吏二百人分掌二十一局事

中書之官舊曰矣謂之省者自魏晉梁陳時始立

音韻之學自沈約為四聲及天竺梵學入中國為反切字其學漸密

音韻始於沈約切字始於西域

魏爾朱榮以宇文泰為統軍

宇文周兆於此

魏宇文泰以蘇綽為行臺左丞始制文案程式及計帳戶籍之法

始有文案程式

宇文泰廢魏主后為尼立柔然女為后

中國主用外國女為后始此

梁廣州亂參軍陳霸先討平之

陳起於此

梁得佛舍利大赦其境內

舍利子何以能致赦也

梁以中書舍人專掌中書詔誥

中書舍人專掌詔誥始於此

魏始光二年立道場神麈四年諸州悉立

道場法會為誕日也自此為崇福奉祝之始

唐代宗時始誦仁王經周廣順二年勅臣寮

遇聖節底寺觀起置道場皆是率釀宋後中

書門下與百官樞密院與諸司使副馬步軍

都指揮使各共設齋遂為故事

魏遣使如突厥

突厥始見於此

魏初作府兵

府兵之制始此不始於唐也

魏始作九命九秩之典

後世以九牧品始此

魏於尚書置祠部曹

祠曹之始也

魏主幽其太后胡氏于別宮

幽母后始見于此

陳制春夏不斷死刑

春夏禁刑始此

周制十二丁兵

周始改八丁兵為十二丁兵率歲一月役

陳以孔奐為太子詹事

太子詹事之名始此

齊以盧叔虎為太子庶子

太子庶子之名始此

齊置文林館以侍郎李德林領之惟同判館事

共撰修德殿御覽

置館修書始此

周宇文護令百官執笏

古者笏以記遺忘而已執以為禮始此

周始用士人為縣令

縣令以士人為之始此

周主初製紗幘服之

此後世幘頭之始嗚呼自有此制以來二代古制遂不可復

周初作乞寒胡戲

即後潑寒胡戲也

周主贊立五后

始見五后

隋文帝楊堅定服色始服黃

後世人君服黃始此

初置軍器監

後改為局本此

隋初行新律

後世以笞杖徒流死定罪始此死刑二絞斬流刑三自二千里至三千里徒刑五自一年至三年杖刑五自六十至百笞刑五自十至五十又請減贖官當之科以優士大夫除訊

囚酷法考掠不得過二百行杖者不得易人
枷杖大小咸有程式自是法制始定凡前代
所以梟輶鞭法盡去之矣唐得天下制律一
本乎此後代因之遂為百世通行之法

隋令民有枉屈縣不為理者聽以次經州郡省
若仍不理聽詣闕伸訴

小民伸訴自下達上始於此

以沙門常琮為翻經館學士

僧始官

齊立昭儀穆氏為右后

立右后始此

命尚書六曹每曹置一員外郎

員外郎始於隋文帝

又設六曹二十四司

始有分司

隋賦錢造佛圖經像

此又一賦也始見於此

隋命左右僕射分判六部

六部之名始見於隋

隋以倉廩尚虛議為水旱之備詔于蒲陝等十三州募運米丁又各置倉轉相灌注漕關東及汾晉之粟以給京師

沿河置倉議始於此

隋初作義倉

義倉始於此

隋晉王廣班師俘陳叔寶至京師獻于太廟論功行賞

滅國獻俘始見于此

隋用蘇威議以五百家為里置里長一人後之里長本於此

隋頒曆於突厥

頒曆外國始此

隋開揚州山陽瀆

山陽開瀆見於此

高涼女子洗氏世為南越首領以功間為高梁郡夫人後冊譙國太夫人

夫人封郡封國之始能為夫討賊者古今一見

置九品品各有從自太師始至四品以下每品分為上下凡三十階

始有正有從後因之

又置視正二品至九品品各有從自行臺尚書始謂之視流內

視流內自此始唐因之

置勳品九品自錄事及五省令史始謂之視流

外

流外自此始

隋制民年五十免役收庸

年老收庸不用其力

西域大食人始至中國

此中國有回回人之始其國在玉門關外萬里國俗惟祀天不為像設至是始有航海至廣州者始即其地創寺禮拜然猶未盛也至金元以後始蔓延於中國所至輒相親而守

所謂教門者九篤云

封功臣為國公

始有國公之封

初置工商不得仕進

仕進禁工商始此

隋詔諸司論屬官罪聽律外決杖

唐世簿尉不免箠楚則自此始

詔死罪三奏然後行刑

三奏之制始於此

置行宮十二所

書行宮始此

國子監置司業監丞

取樂正司業之意始有此二名

隋煬帝開通濟渠引汴水開邦溝置離宮造龍

舟

造龍舟始此始開邦溝

隋煬帝始設進士科

後世進士之科始此

詔牛洪等衣冠皆有等三四品通着紫五品朱
六品以下綠官吏青庶人白商皂

服色之分或始於此也

遣兵擊琉球

琉球之名始見於此

復徵天下兵集涿郡始募民為驍果

募民兵始見於此

唐公李淵起兵太原遣使稱臣於突厥請兵

中國稱臣於外國始此

置德妃賢妃

始有德妃賢妃之號

置順儀順容為九嬪

始有順儀順容之號

古今原始第九卷終

月
女



國家圖書館, NATIONAL CENTRAL LIBRARY, TAIWAN, R.O.C.

古今原始第十卷

唐高祖

唐定租庸調法

有田則有租有身則有庸有戶則有調每丁
租二石絹二疋綿三兩自茲以外不得橫歛
給各官隨身佩魚三品以上其飾金五品以上
其飾銀卽古帶袋

蓋以鯉為李也武后改佩龜取玄武之意

桐城趙鈇



初行開通元寶錢

後世錢文用寶字始此此錢輕重大小至為行中至今用之不廢

詔諸州明經秀才俊士進士縣考試州長重復考隨方入貢

選士自縣達州自州達京唐始行之

初設太醫局醫博士一人療民疾醫始有學

以楊恭仁檢校梁州諸軍事

檢校之名始於此

改大總管府為大都督府

都督府名見於此

初定口分世業法

按口分世業法始見於此

初令州縣里閭各祀社稷

按州縣各里祀社稷始此

太宗皇帝

置弘文館聚書籍選文學之士虞世南等更日

宿直

按學士宿直始此

以御史大夫杜淹參預朝政

以他官預政始此

罷周公祠始以孔子為先聖顏回為先師

此後世學校專祀孔子之始前此所謂先聖者周公也先師者孔子也後世惟以顏子配享

制諫官隨宰相入閣議事

此一美政也後莫能繼而行之何哉

制御史法冠

即獬廌冠也

制五品以上陪祭朝饗拜表之服亦曰朝服又省服五品以上公事朔望謁見東宮之服亦曰公服

始有朝服公服之別

唐制凡選有文武文選吏部主之武選兵部主之皆為三銓尚書侍郎分主之

文選武選分於唐

帝從四夷請稱天可汗

中國之主稱夷狄之號僅見乎此

詔定常服差等

三品以上服紫四品五品服緋六品七品服
綠八品服青與隋稍異

太宗御崇政殿試進士按名一一呼之面賜及
第唱名

唱名賜第自是為始

李靖罷為特進三日至中書平章政事

平章政事之名始此

詔僧道拜父母

前此有無父無母之子

吐蕃遣使入貢

此吐蕃通中國之始

正觀十八年五月五日太宗謂長孫無忌楊師
道曰五日舊俗必用服玩相賀今朕各遺卿飛
白扇二枚庶動清風以增美德

端午賜扇自太宗始也

定十道府兵之制

初分天下為十道後世分道而治本於此以宰相監脩國史

后代因之為國史總裁

制史館修撰掌修國史

按修撰之名始於此又有曰北門修撰集賢修撰右文殿修撰皆史官也

制文武官一品及國公母妻為國夫人三品以

上母妻為郡夫人四品母妻為郡君五品母妻為縣君散官同職事若勳官四品有封母妻為鄉君其母邑號皆太各視夫子之品其不因夫子加邑號者稱某品夫人郡君云

邑號起於唐

南平公主適王敬直始行婦禮

古者王姬下嫁於諸侯車服不繫其夫下王后一等猶執婦道以成肅雝之德不敢挾貴以驕其夫秦以後天子之女方為貴之稱曰

主易其嫁娶之名曰尚夫屈於妻舅姑下於婦其原始於秦人尊君卑臣至唐太宗女適王珪子始與其妻坐受公主執筭盟饋是後公主始行婦禮是雖珪之知禮亦由太宗盛德有以容之也太宗女又有襄城公主者適蕭瑀子帝欲為起第主辭曰婦事舅姑如子事父母定省朝夕所以養也而容別居據何理也其天資識趣高矣然則制當如何而可曰品職儀衛略如藩王之制親族姻婭一遵

家人之禮

詔內職有闕選良家有才行者充選良家論才行始此

詔禮部引試分差官廊下巡察勿容私相教授此巡綽所由始也

制要目輿大駕先五輅行

要目輿始於唐

頌氏族志

氏族有志始此後改為姓氏錄

吐蕃寇松州遣侯君集擊之

唐吐蕃之禍始於此

制烏紗帽

紗帽唐制也

以幘頭起於隋採古制為翼善冠

翼善冠始於此

帝視國子監命祭酒孔穎達講孝經增築學舍
增廣生員

視學講經始此後遂有增廣生員之名

以楊師道為中書令劉洎黃門侍郎參知政事
參知政事之名始此

命呂才刊定宅葬祿命等書

宅葬祿命書其來久矣

魏鄭公等嫂叔服云或有長年之嫂育童孩之
叔劬勞鞠養情若所生分饑共寒契闊偕老其
在生也同於骨肉及其死則推而遠之求之本
源深所未善且事嫂見稱載籍非一鄭仲嘉則
恩禮甚篤顏弘都則竭誠致感馬援見之必冠

孔伋哭之為位嫂叔無服請從小功

叔嫂服始於魏徵之議

起復于志寧為太子詹事

書起復始見於此奪喪處職非禮也

以長孫無忌兼太子太師房玄齡兼太傅蕭瑀
為太保李世勣為詹事瑀世勣同中書門下三
品

同三品之名始此

改太子中舍人為中允

中允官名所由始也

宴蠻夷酋長於玄武門奏七德九功之舞

宴外國始此

封公侯無國土其加實封者則食其所分之戶
戶給縑帛每賜爵遞加一級

魏以前封侯不食邑謂之虛封唐因之始加
實封

制取士之科由學館者曰生徒由州縣者曰鄉
貢

鄉貢之名起于唐

制太子見三師儀

太子見師其儀與古合否

房玄齡等上高祖今上實錄

書實錄始此

制大功不得聯職

今兄弟子姪不得同省而官亦是此意

祭戰亡子弟

恤陣亡始此

詔邊州別置經略使

此使名所自起也后招討使都統使皆原於

此

制諸司相質問曰關開

移關始於唐

以勅勒諸部為州府其酋長為都督刺史

范祖禹曰先王御外國不以利誘不以威脇
故不勞民不費財至於後世之君或欲殄滅
之或欲招來之二者皆非也何則彼外國亦

人類也

改官名犯先帝諱者

避諱始此

始以左邱明等二十二人從祀孔子

此後世以先儒從祀孔子廟庭之始左邱明
卜子夏公羊高穀梁赤伏勝高堂生戴聖毛
萇孔安劉向鄭衆杜子春馬融盧植鄭元服
虔何休王肅王弼杜預范甯賈逵也

面紇吐迷度為其下所殺詔立其子婆閏

回紇始見於此

高宗皇帝

始置員外同正官

員外之名始此

梁建方大破虔月朱邪於牢山

朱邪之名始見此

置太公廟以張良配享仍簡取古名將准十哲

武臣廟始此

命弘文學士一人日待制武德殿西門

待制起於此

詔衡山公主俟三年喪畢成婚

公主終喪成婚善制也

帝命百官四夷朝后于肅義門

后初立百官朝始此為武后也唐室之既兆
于此矣

勅京官五品五日一參太極殿視事仍朔望臨
朝

此五日起居之始也

命內外命婦入謁

後世命婦朝后亦自此始

初令皇后決百司奏事

武后預政之漸古云牡雞司晨惟家之索豈不驗哉

帝與后同幸李勣許圜師第

帝后同幸人臣之家創見於此今鄉人自好者猶不肯為而謂帝王為之乎

帝與武氏同聽政

帝后同聽政異事也子少國疑母后聽政人猶非之况儼然同臨臣下豈不覷然人面哉以李敬元郝處俊同三品

始以同三品入銜

以制勅用白紙多為虫蛀今後尚書省頒下諸州諸縣並用黃紙

勅用黃紙自高宗始

分高麗地為州縣立安東都護府

郡縣高麗始此

風海總管蘇海政矯詔殺興昔亡可汗

自是十姓皆附吐蕃而唐世吐蕃之禍始此
定銓注法以身言書判取人

以身言書判取人始此

凡選者先簡僕射乃上門下省給事中讀之黃
門侍郎省之侍中審之然後上聞主者受旨而
奉行各給以符而印其上謂之告身其文曰尚
書吏部告身之印自出身之人至于公卿皆然
武官則授于兵部

告身之法始于唐

武后始請父在為母服齊衰三年

後世為母服三年始此是時雖請未行至端
拱中始行遂為制

春正月百官四夷朝武氏於光順門

元旦百官朝后始見此

春正月宴百官及命婦於麟德殿

命婦同宴見於此

高宗停南北中尚梨園作坊減少府雜匠

梨園作坊始於唐

武后置銅匱受密奏

投匱始於此

武后以僧懷義為新平道大總管討突厥
以僧統兵僅見於此

武后使舉人王山輝等並授試官

初試舉人官後稱試職援此

詔皇太子監國以裴炎劉景先郭正一兼東宮
平章事

東宮有平章僅見於此

詔左右監門衛掌譴間禁衛及門籍文武官九
品以上每月送籍於引駕仗及監門衛衛以帳
報內門凡朝參奉事待詔官出入者閱其數凡
籍月一易之

此門禁之始

立孫重照為皇太孫

太子在而立太孫者始見於此

中宗皇帝

許諫官御史風聞言事

後世臺諫風聞言事始此

武后賜群臣高頭巾子呼為武家諸王樣

此巾子之始也

武后置內供奉

玄宗有翰林供奉此名供奉官之始也

武后策賢良詔李景謏名考覆令舉貢發解
皆用其事曰彌封

彌封之制始於武后

武后覆試崔沔

覆試起于墨後或間行之

常陟每書陟字自號五雲體俗滯相緣以為常
後不取名各出機巧

花押之巧始於常陟古人破真從草以難於
模倣非盡去其名也

始試士於洛城殿

此後世進士殿試之始按策問賢良非試之
也後世出題試士於殿寔因於此

聖從姚璩請命宰相撰時政記月送史館

撰時政記見此

始設武舉

武舉見此

武后勅天下僧尼隸祠庫

此祠部轄僧之始

又置檢校試攝知判等官

知某官判某官自此始

置修文館學士以李嶠等二十八為之命女官

上官氏第其文

以學士名官始此

以薛訥為幽州經略節度大使

節度之名自此始

安樂公主下嫁武崇訓光艷動天下侯王柄臣皆出其門嘗作詔箱其前請帝署可帝笑從之與太平公主皆開府而主府官屬尤濫皆出屠敗納貨售官降墨勅斜封授之故號斜封官

始用斜封墨勅授官而公主開府前未有也

南郊以皇后為亞獻以宰相女為齊娘

皇后郊祀僅見于此

上與帝后觀燈市里

自出觀燈始于此

召王公近臣入閣守歲

又一始也

睿宗

帝以公主為女道士資天皇天后之福

始見公主為女道士

玄宗

置十道按察使

按察使之名始此

先天二年正月望夜胡人婆陀請燃百千燈因
弛門禁帝御延熹安福門縱觀

此天子御樓觀燈之始也

始封女華婉代國主

國主之稱始于此

置左右教坊典倡優雜伎

教坊之設始此

召馬懷素褚無量更日侍讀

侍讀尚未名官

初置翰林院

翰林院之置始此

張說改政事堂號中書門下列五房于後一曰
吏房二曰樞機三曰兵房四曰戶房五曰刑禮
房分以曹官

今去樞機加工房改刑禮為二

制增太廟為九室

增廟室從此始

以鄧王嗣真等遙頌大都護

諸王遙頌外鎮始此

召新除縣令試治民策

試縣令以策見於此

令諸州貢舉省試下第願入學者聽

此下第舉人入學之始

始改顏回等從祀孔子者為坐像

古者祀神以尸其後代之以主未有像設也
自佛氏入中國始鑄金為像後又為土木之
偶焉祀先師亦以塑像不知始何時考史開
元八年改顏子第十哲為坐像則前此固有
為塑像者矣但先聖坐而諸賢皆立至是乃
改立為坐耳然非但有像也至二十七年又
內出袞冕之服以衣之

張說薨輟朝罷元會

輟朝始此

勅諸州貢舉皆于本貫不得于所在附貫

貢舉重鄉貫自明皇始也

始詔孔子門弟子從祀

前此孔子弟子惟列像廟堂不預饗祀至是
因李元瓘言始得列享於左邱明等二十二
人之上

詔李衢林寶撰玉牒一百一十卷

玉牒始此

考功員外郎為舉人抵訶玄宗以員外郎望輕

遂移貢舉於禮部以侍郎主之
禮部知貢舉自茲始

安南亂遣宦者楊思最討平之

唐世中人預國政自玄宗任高力士始中人
預軍政自玄宗用楊思最始

始募兵充宿衛曰禁兵

禁兵始於此而冗兵之費傳蠹後世矣

帝好羯鼓稱為八音之領袖

本夷羯之樂始盛行于唐

置麗正書院聚文學士脩書侍講

侍講始名官

以宦者楊思最為輔國大將軍

內臣為將軍稱大始此

詔祀兩師與雷師同壇

此後世祀雷之始

秋八月以帝生日為千秋節賜百官宴

後世以人君始生之日為節而表賀之始此

文宗於誕日禁屠后世循用之

置太公廟以張良配選古名將以備十哲
太公之配始見于此其兆也

作十王宅以居皇子又置百孫院于宮側

造王宅于宮中始此又置維城庫于禁內給
諸王月俸

命黃幡綽撰拍板

拍板始于明皇或云北齊已有之

制戶籍三歲一定分為九等

三年一編造人戶始此

始祀九宮貴神

又開一始也

蕭嵩為相以天子升降不當令人見奏請凡朔
望臨朝備羽扇於殿下將出所司承旨索扇扇
合上坐坐定去扇上將退又索扇如初

此羽扇之始也

命畢建六人宣撫十道

宣撫之官起於此

勅令王妻為妃文武官國公妻為夫人

妃與夫人自此定矣

加母黨服

母黨有服見此

置元學博士習老子莊子文子列子曰道舉士官秩蔭第同國子舉送課試如明經

又有元學之設

令匠作大將姜師度戶部侍郎強循俱攝御史中丞與諸道按察司檢責海內鹽鐵之課以御史理鹽政始於唐

立明經問義進士試經法

進士試經義見此

募丁壯長充邊軍

募民充伍始此

御五鳳樓酺宴

五鳳樓前宴唐制也

學士專掌內命凡拜免將相號令征伐皆用白麻

按宣麻始此

立童子科十歲以下能通一經及孝經論語誦
文十通予官

此又一科也

置集賢殿書院

初有書院

行和雜法

書和雜始此

唐故事公卿皆搢笏于帶而後乘馬張九齡獨
常使人持之因設笏囊

笏囊自張九齡始也

始置學士院改翰林供奉為學士

翰林學士始見於此

以王璵為祠祭使用楮為錢以祭

後世用紙錢代帛始此

追謚孔子為文宣王贈弟子為公侯伯

按自漢追謚孔子為褒城侯宣尼公後世因
謂孔子宣公又謂之為宣尼至是又加之與
宣為謚

制僧尼令祠部給諫

此後世度僧給諫之始

賜安祿山爵東平郡王又鐵券

唐將師封王自此始

追削李林甫官爵剖其棺

死者追論剖棺始此

加聖祖及諸帝后號諡

加謚始此後因之凡十數字

群臣請加尊號凡十二字

自後加尊號者倣此

始封東鎮沂山為東安公南鎮會稽山為永興

公西鎮吳山為成德公中鎮霍山為應聖公北

鎮醫巫閭山為廣寧公

五嶽始封公後加為王

封河為靈源公濟為清源公江為廣源公淮為

長源公

四瀆始封

封東海為廣德公南海廣利公西海廣潤公北

海廣澤公

四海始有封

詔祀歷代忠臣義士孝婦烈女德行彌高者所
在置祠宇量事致祭

按後世祭忠義孝烈始此

始試詩賦并雜文貼經為三場

三場試始於此也

肅宗

置防禦團練使

此團練使之始也

制以官爵賞功

是時府庫無蓄積朝廷專以官爵賞功諸將
出征皆給空名告身聽臨事注名有至開府
特進異姓王者諸軍但以職任相統攝不復
計官爵高下及是復以官爵收散卒由是官
爵輕而貨重大將軍告身一通總易一凡
應募入軍者一切衣金紫名器之濫至是極
焉

歲遺回紇絹二萬疋

此歲帛之始

置左右神武軍

神武軍名見此

命郭子儀等九節度討安慶緒以宦官魚朝恩為觀軍容使

觀軍容之名自此始范氏曰夙沙衛殿齊師殖綽郭最曰子殿國師齊之辱也以諸侯之師闖入殿之猶以為辱况天子之師使宦者為之主是辱天下之眾也

平盧節度使王元志卒遣宦者察軍中所欲立者裨將李懷玉殺元志子推裨將侯希逸為節度副使從之

節度使由軍士廢立唐之亂自此始矣夫爵賞廢置人主之權今不出於上而出於下雖欲不亂得乎古者治軍必本於禮今士卒得以陵偏裨偏裨得以陵將帥則將帥陵天子自然之勢也噫

襄州軍亂殺節度使

唐世將吏夷師阻兵始此

以苗晉卿行侍中

行官始此

宦者李輔國矯帝詔遷上皇于西內

真德秀曰玄宗始壞太宗之法以重中人而已之幽鬱徂謝乃出於中人之手此可以為人君避奸者之戒

置道場于三殿飾宮人以為神帝命大臣膜拜

又一異事也

制除五品以上官令舉一人自代

授官舉人自代始此

始服喪二十七日

自漢文遺詔以月易日景帝遵之為三十六日至唐太宗遺詔亦然至是始有二十七日之制遂為後世常制

代宗

號宦者李輔國為尚父而不名以為司空兼中

書令尋進爵博陸王

宦者封王始于此

以劉宴為度支轉運鹽鐵等使

後度支鹽運使名見此

兵馬使梁崇義據襄陽以為留後

書留後始此唐已有兵馬使矣但職有重輕
稅青苗錢給百官俸

青苗之名始見於此

追謚齊王愍為承天皇帝

謚王為皇帝僅見於此

始置內樞密使以宦者參掌其事

後世樞密之名兆於此以宦官董廷秀參掌
其事專主樞密文書如漢之中書謁者令也
中有處分則令樞密宣付中書門下施行未
有司屬亦不典武事

詔寬滯聽詣三司使及撾登聞鼓

登聞鼓見此

德宗

詔稅夏輸無過六月秋輸無過十一月置兩稅
便以總之其租庸調雜徭悉省皆總於度支兩
稅外取一錢者以枉法論

始行兩稅法

初稅商漆竹木錢

自是有漆竹木之權

初行稅間禁除陌錢法

房屋有稅始此

帝以寒食多與上巳同時欲以二月名節自我

爲古李泌請廢正月晦以二月節為中和節因
賜大臣戚里尺謂之裁度民間以書囊盛百穀
瓜果相問遺號獻生子問里釀宜春酒以祭勾
芒祈豐年百官進農書以示務本帝悅廼著令
與上巳九日為三令節

二月一日為中和節本於德宗

始賜有功將士以功臣名號

此後世賜功臣名號之始所謂奉天定難功
臣是也

因國用不給借富商錢約罷兵乃償之

借貸始此當時搜督甚峻民有自經死者可勝嘆哉

減江淮運米令京兆邊鎮和糴

按邊鎮和糴始此

鹽鐵使張滂請稅茶

自此茶利遂與鹽並

詔宰相迭秉筆以處政事

此豈足以分權乎

以宦者為宮市使

按史謂宮中市外間物名為市竇奪之也

始令史官撰日曆

日曆之名始見於此胡寅曰古者史官世掌其職大臣不與天子不觀故得直筆取信於後世其次如真觀制史官日隨事記之猶為近古自李義府許敬宗不許史官聞仗後事姚璿建令宰相撰時政記今常執誼又奏令史官撰日曆蓋欲迷眩千古以蓋其誣上行

私之心也夫天下公是公非不為言語文字
可以變移黑白欲垂名竹帛者其道在自脩
憲宗

以宦者劉光琦知樞密院

樞密有院始此代宗初置樞密使以宦官參
掌其事至是始以光琦知樞密院其後又以
梁守謙為使然皆內臣也至於唐末以樞密
使與宰相奏事聽進止五季因以為二府則
又以處勲舊之臣宋興因之委以兵柄與中
書省並焉

帝曰諸女嫁不時而選尚皆由中人厚為財謝
乃得遣吉甫奏自古尚主必謹擇其人江右悉
取名士獨近世不然帝乃下詔皆封縣主令有
司取門閥者配焉

取門閥僅見於此選尚必厚賂中人自古記
之矣

沙陀來降以其酋長執宜為陰山兵馬使
此五季唐之始

封恩王等女為縣主

書縣主僅見此

吐蕃請互市從之

與吐蕃交市始此

詔丞相出入加執金吾騎士張弦露刃以衛

以武元衡裴度被刺故也

以方士柳泌為台州刺史求天台靈草

以方士臨民此其始也

自淮西用兵以來度支鹽鐵使及四方爭進奏

謂之助軍賊平又進賀禮助賞

百官獻助見此

詔諸道支郡兵馬並令刺史領之

范祖禹曰後世郡縣古之諸侯也委之以土地人民而不與之兵是以匹夫而守一州也天下有變則城郭不守而朝廷無藩籬之固何以異於無郡縣乎是故為法者必關盛衰使一縣之衆必由於令一郡之衆必由於守守之權歸於按察按察之權歸於天子則天

下如網網之相維臂指之相使矣唐自中葉
郡置鎮兵主將有擅兵之勢而刺史無專城
之任是以郡縣愈弱藩鎮愈強橫海一帥制
之得宜而數世順命况天下處之皆得其道
何危亂之有哉

穆宗

段文昌言禮部侍郎錢徽等知貢舉不公令覆
試貶徽等外任

以選舉不公覆試見此而唐末黨禍於斯兆
矣

尊貴妃郭氏為皇太后

妃郭曖之女也憲宗以妃宗門疆盛恐立為
后後宮莫得進幸因縱慾不立后古今惟見
此耳亦一始也

帝餌金石藥有疾

金石藥作崇人間矣

敬宗

益鐵使王播進羨餘絹百萬足

進羨餘始此

文宗

開成二年誕日始禁屠宰

聖節禁屠之始

帝好聽外議諫官言事多不著名

匿名諫書始見於此亂政也

出水車樣令京兆尹造給鄭白渠溉田

水車始見於此

武宗皇帝

以左僕射王起同平章事充出南西道節度使

相臣除使相始於此

內侍監仇士良致仕

宦官致仕始見於此

春三月帝疾篤宦馬元贇立光王怡為皇太叔

稱皇太叔始此前見太弟今又見太叔

宣宗

定太廟為九代十一室

此又一制也

吏部尚書李景讓上言穆宗乃陛下兄敬宗文宗武宗乃兄之子陛下拜兄可拜姪可乎宜遷四主出廟還代宗以下入廟詔百官議不決而止

按議雖不行此亦古今所未有事也

懿宗皇帝

分嶺南五管為東西二道

後分東西道始此東道治廣州西治邕州

桂州戍卒久不代龐勛等反還陷宿徐州執觀

察使崔彥會遣康承訓發諸道兵討之勛陷滁和州

唐末之亂始此易云喪牛於易有國者知戒西北之虜而不知患生於其所無備漢亡於董卓而兵兆於冀州唐亡於黃巢而禍基於桂林易之意深矣

二月朔上歷拜十六陵

上陵始見於此

僖宗

李國昌及其子克用皆為官軍所敗亡走
達靼

達靼之名始見於此

宥州刺史拓拔思恭會鄜延節度使李孝昌同
盟討賊

拓拔思恭西夏之先也

以劉謙為封州刺史
南漢之基兆於此

以左右神策太將軍為郿指揮使

指揮使始於僖宗

以李克用為河東節度使

後唐之基成於此

以朱全忠為宜武節度使

梁之基成於此

以宗女妻南詔

以宗室女妻南蠻始見於此

遣王建戍三原通渭壁州刺史

通渭領州自此始

以錢璆為杭州刺史

吳越之基始於此

利州刺史王建罷閬州而據之

王蜀之基兆於此

宣州觀察使秦彥入揚州廬州刺史楊行密引兵攻之

楊吳之基始於此

昭宗

武安軍亂殺劉建鋒推馬殷為留後

馬楚之基始於此

貢院奏舉人試前五日納紙用中書省印付貢院院司印鑰在內往來不便請祇用當司印試卷用司印始於此

冬十一月有事於南郊宦官始服劍佩

衣服可以觀治

以王潮為福建觀察使

此閩王之基

湯復恭二月興至太極殿

唐肩輿始見於此

昭宣帝

劉仁恭始文民面為軍

後軍人刺面始此

以朱全忠為三司都制置使

三司之名始於此

詔佛像以鉛錫土木為之

塑像用土木見於此

古今原始第十卷終

古今原始第十一卷

五季

梁朱晃即全忠以高季昌為荆南節度使

荆南高氏始於此

吳越築捍海塘廣杭州城

錢唐自是始富庶

契丹始用中國人韓延徽為相

桐城趙鈇



楚鑄鉛鐵錢

以鉛為錢始見於此

唐豫借河南夏秋稅

即後之提編之說也

唐嗣源以張延朗為三司使

三司有使其名自此始

唐以石敬瑭為河東節度使敬瑭以部將劉知遠為押牙

後漢之基起於此

唐以五服制度附於令

自馬縞始也

唐初令百官常朝外五日一入內殿起居轉對奏事

轉對美政廼始得行于唐嗣源

唐收麩稅

麩稅始於明宗

唐初聽民鑄田器計畝稅錢

稅田器始

唐刊刻九經

經籍有刻本始此

唐徵諸郡丁口鹽錢

後世徵戶口食鹽鈔始此

晉籍鄉兵

鄉兵始籍於此

周立評訟法必自下而上毋得挾私客訴

越訴始有禁

周武帝封衛元嵩蜀國公

道士受封之始

周制稅牛皮法

牛皮之稅自此始

周制給漕運斗耗

漕運有耗始此

周作欽天曆

後欽天監曆始于此

周刺面發配

前此雖有刺面之制起於此

周制舉主連

嗚呼保任天下之至難也夫中人之性最易移易安能有常故連坐之法似美而實弊似美故其初激昂實弊故其終廢格

周以律令文古敕格煩雜命刑官刪為刑統始有刑統後咸祖而用之

周汴渠成江淮舟楫始通

汴水通江淮始此

周導汴水入蔡水

汴蔡始通

周世宗發引之日金銀錢寶皆寓以形而楮錢大如盞口其印文黃曰泉臺上寶白曰冥寶

據此則金銀楮錠亦始於五代也

古今原始第十卷



國家圖書館, NATIONAL CENTRAL LIBRARY, TAIWAN, R.O.C.

古今原始第十二卷

桐城趙戩鼎卿著

宋太祖皇帝

宋以周故相范質王溥魏仁浦同平章事吳廷
作為樞密使始廢宰相坐論禮

宰相坐論之禮始廢

初殿試貢士賜進士第

進士第始此後遂為例

初以文臣知州事



知州之名始於此

初置諸州通判

通判官始於此

初以常參官知縣事

知縣之名始見此三者皆以革藩鎮之弊也

先時郵傳率役平民太祖盡易之詔諸州府以軍卒代百姓充遞運脚力

遞運以兵卒自此始

詔州縣徵科置簿籍

徵科始有簿籍後曰冊

宋置折中倉聽商人輸粟京師優其直給江淮鹽

按此後世召商中鹽之始

制州郡俸祿無有定准多隨土所出有父母祖父母年登七十者結見錢郡縣田祿以芒種爲斷

芒種以前去官一年俸祿令歸前人以後者歸後人宋制也

置權貨務

務名始此

始令婦為舅姑服三年

婦為舅姑服始此

置同修撰編修官檢討官

按編修檢討專以修史始於宋蓋專以修經
武要略為職屬之樞密院與今不同

韃靼入貢於宋

此蒙古通中國之始

始制州郡盛暑恤獄

暑月恤刑始此

賜屢試不第舉人出身

特奏名科始此

立報水旱期式

報水旱有期始此

初置市舶司於廣州

廣州市舶司始此

始放進士榜

故榜始此

始禁道士不得畜妻孥

前此道士皆有妻室至是始與僧同禁
封交州丁璉為交趾郡王

此交人封王之始

初詔諸道轉運使糾察官吏

諸道糾察始此

太宗皇帝

賜江州白鹿洞九經

白鹿洞經書其來久矣

以石熙載簽書樞密院事

簽書之名始此

興國二年進士賜宴

賜宴自呂蒙正始

始以侯陟王明同判三司

判三司名始此

作秘閣分三館書籍置其中

秘閣始見於此

乃女
詔致仕官給半俸

厚致政始見於此

始分進士為三甲

進士分甲次自王世則榜始

賜新及第進士綠袍靴笏仍賜宴瓊林院

此開宴賜袍笏之始也

進士中第賜名於桂籍堂

此題名之始或云唐人題名慈恩寺進士自題也

淳化幸太學賜群臣坐時侍講李奭執經講堯典一篇未畢講說命三篇賜奭帛三十疋

幸學講書始見于此

宴群臣于後苑賞花釣魚命群臣賦詩

賞花賜宴自此始

分天下州軍為十五路置轉運使

京東京西河北河東陝西江東江西浙東浙西淮南荆湖福劍南東劍南西廣南凡十五路各置轉運使

遣使募兵於諸州

州郡募兵始此

太平興國三年三月大宴大明殿

春宴自茲始也

采太子中允武允成踏犁式給宋毫人戶

其式不用牛而用人亦足便民又一制也

詔群臣迎養父母

迎養始此

以子襄王元侃為開封尹

宋制也

真宗

以楊徽之夏侯嶠並為翰林侍讀學士祭酒邢
昺為侍講學士

此侍讀學士侍講學士之始

初給外任官職田

又一制也

以張齊賢為涇原諸路經略使

大臣行邊之始

始置閣藏先朝文籍設待制學士

自是每帝崩後皆置閣以藏御書此其始
始與契丹歲幣

此宋人納幣外國之始嗚呼國家取民賦稅
以養兵將以禦寇今以賂寇烏用養兵為哉
王欽若進泰山天書帝受之群臣上尊號

真宗澶淵既盟常以為愧欽若以天書解之
不過借以誇耀後遂信之以為真一國君臣
如狂然吁可恠也他日史臣脩遼史見契丹

故俗而後推求宋史之微宋自太宗幽州之
敗惡言兵矣契丹其主稱天其后稱地一歲
祭天不知其幾獵而手接飛鴈鴉自投地皆
稱為天賜祭告而誇耀之意者宋之諸臣因
知契丹之習又見其君有厭兵之意遂進神
道設教之言欲假是以動契丹之聽聞庶幾
足以潛銷其窺覲之志歟然不思修本以制
敵又效尤焉計亦末矣

頒釋奠先聖儀并祭器于天下

先師始有祭器

上玉皇聖祖號寶冊

玉皇神祖始有號

冊上聖祖母懿元天大聖后

聖母始有號

上玉皇大天帝號

玉皇始有號

詔醴泉所立觀祥源又加真武號真武靈應真君

始加真武號

制謹奉上真元皇帝聖號太上老君混元上德皇帝

老子始有號

詔江州馬當上水府廣祐寧江王宜封福善安江王大平州采石中水府濟遠定江王封順聖平江王潤州金山下水府虛肅鎮江王封昭信泰江王

封水府見於此

勅叔梁紇宜追封齊國公顏氏追封魯國大夫
人

孔子父母始封

勅开官氏追封鄆國夫人

孔子妻始封

上封者言郊立天地神位不嚴宜重造詔王欽
若詳閱修製十一月一日版位成貯以漆匣昇
床覆以黃縑帕壇上四位以朱漆金字第一神
位黑漆金字第二黑漆黃字第三已下黑漆朱

字天地祖宗為一匣餘十二陛為一匣

版位用匣始見於此

加五嶽神以帝號

五嶽稱帝始此

以占城稻種給於民

此中國有旱禾之始

以應天府為南京

始有南京之稱

始賜信州道士張正隨號真靜先生

漢張道陵之後世守其法前此未有賜以號也賜以號始於是是後凡嗣世者皆賜以先生號然無階品至夷元乃封為真人給以銀印視三品始有階品矣

始給諸州學田

學田始見於此

始開經筵

經筵始此

南郊禮畢大宴於廣德殿自後凡大禮畢皆設

宴如此例

飲福宴蓋自此始也

仁宗

初置益州交子務

此交會之始按周禮小宰聽稱責以傳別特民間私相稱貸以為符驗公家未嘗為之漢皮幣惟王侯朝饗用以薦璧民間未用唐憲宗始為飛錢之法委錢京師以輕裝趨四方合券取之以通商賈之厚齎者其法執券以

取錢而非即以券為錢也宋真宗時張詠鎮
蜀患鐵錢重不便貿易設質劑之法一交一
緡以三年為一界而換之富民十六戶主之
後富民哀不能償所負爭訟不息轉運使薛
田請官為置務至是蜀守臣寇瑛置益州交
子務以權其出入始屬之官而有禁焉自是
以後始以楮代銅交子代錢限年以為界而
交易之

皇太后劉氏崩謚曰莊獻明肅

舊制后皆二謚加四謚始此

知制誥葉清臣啓軍中傳信牌

此信牌所由始

以大名府為北京

始有北京之名

始置武學

武學始於此

始詔進士預殿試者不黜落

殿試不黜落此其始也

英宗皇帝

詔禮部三歲一貢舉

此後世三年一開科之始

神宗

行均輸青苗保馬免役方田諸役號為新法

用安石言變法宋自此多事矣

增置宮觀官

安石為此以處先朝舊臣與己異者一時公卿安於祠祿不知何故

詔鬻僧道度牒

以度牒徵財自此始

始以策試進士葉祖洽以附會新法擢首選

科目以文取士本此三代帝王之法既為上人所重而天下靡然趨之而世道亦由之升

降宋自太宗重甲科之選擢居選首者躡取

華要往往多為名臣自治平更三歲之制繼

以王安石變一代之法倡一家之言一時士

子咸希其意葉祖洽首迎合安石意得為首

選自是士風大壞得人亦不如前矣
詔百官坐罪免杖黥著為令

從蘇頌所請也自是刑不上大夫

立保甲法

始有保甲

行募役法

始有募役募役行於南則便行於北則不便
未可全非也

王安石議除去聲律對偶之文使學者專意經
術士各占易詩書周禮禮記兼論語孟子中書
試義者須通經有文采乃為中格不但帖經墨
義而已

此後世經義之始

王安石廢春秋儀禮

後世不用儀禮取士始此

王安石行新法既鬻坊場河渡又并祠廟鬻之
令人承買

後承買官地寺田始此

立太學生三舍法

有上舍中舍下舍之別

詔宗室非袒免親者許應舉

宗室應舉始行於宋

始置濬河司

河道有官始此

初策武舉士

策試武舉始此

李杞入蜀經營買馬于秦鳳熙河以茶博馬

後以茶易虜馬始此唐回紇以馬易茶西北

虜之嗜茶有自來矣宋人始置茶馬司

詔求水居船戶五戶至十戶為一甲以輸賦役

此水居戶賦役法也

割北邊地七百里於契丹

北地限於契丹可慨也

哲宗

置春秋博士

始復春秋博士

分經詩賦為兩科

始分科取士

備六禮聘孟氏立為皇后

聘用六禮僅見於此

傅克俞言監司以今蠶麥並熟催完積年逋欠
百姓必不以一熟之力了積年之欠且令帶納
一料候秋成更令帶納

後帶徵舊欠始此

陳瓘上書論國是

按國是之說始於孫叔敖其言曰夏桀商紂
不定是而以合其取舍者為是不合其取舍
者為非叔敖之意亦不欲專以其私取舍者
為是非而以衆人之所夷同取舍者為是非
此國是之說所由起也王安石始有是其是
而盡非天下之人以為國是蓋借叔敖之言
以文其奸耳自後京卞輩祖述其說以箱天
下之口行一己之私孟子曰是非之心人皆
有之衆人以為是則是衆人以為非則非合

天下之人之言咸以為是者是則所謂國是也政不必立為一定之名以必天下人之同已也

詔進士專習經義

從此廢詞賦矣

徽宗

立八行取士科

八行取士見此

令州縣立黨人碑

又一世變也

詔改留守節察判官為承直郎書記支使防團判官為儒林郎留守節察推官軍監判官為文林郎防團推官為從事郎令錄為通仕郎知令錄為登仕郎判司簿尉為將仕郎後改通仕為從政登仕為修職將仕為迪功

今之官階皆本於此

詔以孔伋從祀孔子廟

此子思從祀之始

令宦者童貫制衣御器于蘇杭州

內官監製御器始見於此

禁史學

史學有禁

置道階凡二十六級

道者有階始此

上昊天上帝徽號

莫尊於天天神之最尊者上帝也謂之昊天

上帝可謂極至而無以加矣天之不可名

帝之尊無以對恐徒褻之耳

大理入貢封以王

此大理入貢中國之始

始給道士俸

道士有俸始此

道士冊帝為教主道君皇帝

徽宗一日諷道士曰朕乃上帝元子為太霄

帝君憫中華被夷狄之教遂懇上帝願為人

主令天下歸於正道卿可冊朕為教主道君

皇帝嗚呼封冊之制惟天子得以行之道士
何人敢以此而加之君上妄亦甚矣

科免夫錢

不用夫而但出錢徧索天下所得總二十萬
緡結怨四海矣且為厲階

始遣武義大夫馬政浮海通女真夾攻遼

通夷好自此始

詔更寺院為宮觀僧為德士

又有德士之名亦一異也

初收經制錢

先是命陳遵經制江淮七路錢于杭州以供
餽餉遵議比較酒務及度出納錢糧取其贏
號經制錢為東南七郡之害

封宦者童貫為廣陽郡王

宦者真封王始見於此

欽宗

詔出內帑及括借士民金帛遣康王構少宰張
邦昌往女真軍為質

中國質於外國始此

金初稅牛具

每牛三頭為一具每具稅粟五斗

立沿河江淮帥府

稱帥府始此從李綱之請也

高宗

女真禁繼父繼母之男女無相嫁娶

初置見錢關子

時命張浚屯婺州有司請椿辦合用錢而路不通舟錢重難致乃造關子付婺州召商入中以給軍食商人執關子于權貨務請錢願得茶鹽香貨鈔引者聽於是州縣以關子充糴本未免抑配而權貨務又止以日輸三分之一饋之人皆嗟怨

始收諸路月椿錢

又一稅也

初制節度使以下象牙牌第其官資書之于牌
御書押字刻金填之仍合同製造一畝禁中一
降付都督府相臣主其事緩急臨敵果有建立
奇勲之人先給賜以為執守

牙牌宋有之但加之武臣非朝參懸帶者

和議成以何鑄簽書樞密院事奉表稱臣于金

詔臨安府置養濟院

養濟院始此

始定都臨安

是為南宋

夏四月女真遣使以衮冕來冊帝為大宋皇帝

女真製交鈔

元以來鈔製始此金史交鈔之製外為闌作
花紋其銜書貫例外書禁條闌不備書經由
行換之法及其印章花押元承其舊至今沿

用之中雖小異而其大槩實相同也宋之交會猶與錢相為輕重而有稱提之法此後則錢自錢鈔自鈔各自與物相為輕重矣初行會子

會子其製不可考

以黃庭堅所書戒石銘于州縣曰爾俸爾祿民膏民脂下民易虐上天難欺頒戒石銘于州縣自此始

孝宗

安南始稱國

按周必大云安南初封交趾郡王後進南平王奏章文移止稱安南道孝宗時始封以王稱國蓋宰相曾懷之失也夫安南在秦為象郡在漢為九真日南象三郡魏晉至唐皆與南海桂林同為嶺南郡縣五代始失之然猶受宋之官爵自是遂以國稱而天下以高麗真臘視之不復知其為中國郡縣矣

金以女真字譯經史

監察御史陳賈請禁道學

嗚呼道學廼亦有禁乎

以朱熹提舉浙東常平茶鹽下熹社倉法於諸路

社倉之法始於此

寧宗

蒙古竒渥溫鐵木真起於幹難河稱成吉思可汗

是為元太祖此夷元之始

遣使如蒙古

始與蒙古通好

度宗皇帝

始以顏回曾參孔伋孟軻並配孔子升顓孫師於十哲列邵雍司馬光於從祀

十哲從祀始此

賈似道以國計困於造楮富民困於和糶命侍御史陳堯道右正言曹孝慶上疏言將官戶田

產逾限之數抽三分之一回買以充公田但得
一千萬畝之田則每歲可收六七百萬石之米
其餘軍餉沛然有餘帝從之至有無田歸拜抑
買自經者

又有買民田以充公田之議

西域又進萬年曆於蒙古

此回回曆法之始

蒙古號其國曰元

自古國號皆以地名以義起者始見於此

蒙古制江南人為十等

廼列儒於娼之下丐之上可笑也已此又古
今一大變也

古今原始第十二卷終



國家圖書館, NATIONAL CENTRAL LIBRARY, TAIWAN, R.O.C.

方
寸

古今原始第十三卷

元世祖

始窮河源

自有河以來皆言其源出崑崙而以張騫之言為信至是始知其源出于星宿海也招討使都實受命行四閱月始抵其地既還圖其形勢來上言河出吐蕃朵甘思西鄙有泉百餘泓方可七八十里沮洳散渙不可逼視登

桐城趙鈇鼎卿書

高望之如列星然名火敷腦兒火敷腦兒華
言星宿海也群流奔轆近五七里匯為二巨
澤名阿刺腦兒自西而東連屬成川號赤賓
河又合亦里赤忽蘭也里木三河其流寢大
始名黃河又岐為八九股行二十日至大雪
山名騰乞里塔即崑崙也由崑崙南至闊即
及闊提二地始相屬又經哈刺別里赤兒之
地合細黃河及乞兒馬赤二水北行復折而
西流過崑崙北又轉而東北行約二十餘日
至積石始入中國云約自河發源至中國計
及萬里然其間溪澗流絡莫知紀極崑崙之
西人跡簡少而山皆草石至積石方林木茂
暢世言河九折蓋彼地有二折焉
徵方外士邱處机至京師為立其教賜金印章
曰神仙符命

此全真之所由始其學本於老而其說猶禪
學也佛老之外又有此一學

詔省院臺司之事皆先啓太子而後奏聞

太子參決朝政元制也

元史食貨志元都于燕去江南極遠而百司庶府之繁衛士編民之衆無不仰給于江南自伯顏獻海運之言而江南之糧分為春夏二運至于京師者歲至三百餘萬石民無輓輸之勞國有儲蓄之富

按海運之法自秦已有之而唐人亦轉東吳粳稻以給幽燕然以給邊方之用而已用之以足國用始于元焉

開運通河

會通河之始

制加孔子號曰大成

元仁宗

勅自今宦者勿得授文階

文階不以予開官始此

元文宗

加封顏回為宛國復聖公魯參邾國宗聖公孔
伋沂國述聖公孟軻鄒國亞聖公

顏魯思孟封公始此

元順帝

江浙行省左丞孛羅帖木兒為方國珍所執遣
官招降方國珍授以官

按先正有言元之失天下招安之說誤之也
雖然豈但元哉宋人有詩云仕途捷徑無過

賊將相奇謀只是招則其來遠矣

始改計月錢祿

先是宋郡國田祿以芒種為斷此前去官者
一年秩祿皆入後人此後去官者一年秩祿
皆入前人自元末始改計月錢祿後因之

唐宋人無有書進士於官銜之上者獨元末楊
維禎書李黼榜進士至刻之印章蓋黼死節之
臣欲自附之耳後皆因之

書進士於官銜之上自楊廉夫始也

古今

古今原始第十三卷終



國家圖書館, NATIONAL CENTRAL LIBRARY, TAIWAN, R.O.C.

古今原始第十四卷

大明

太祖高皇帝

詔改大平路為太平府

從此不復稱路矣

殿新成命博士熊鼎類編古人行事可為鑒戒者書于殿壁又命侍臣書大學衍義于兩廡壁間曰前代宮室多施繪畫今書此以備朝夕觀

桐城趙戩



覽豈不愈于丹青乎

以嘉言善事列書殿壁代丹青古今僅見也
命百官禮儀俱尚左改李善長為左相國
尚左始此

以李善長為太子少師兼詹事馮勝兼副詹事
楊憲傅獻兼府丞徐達兼太子少傅常遇春兼
太子少保鄧愈湯和兼太子諭德章溢兼太子
贊善大夫劉基兼太子率更令
以大臣兼東宮始此

上諭善長等曰朕於東宮不別設府僚而以卿
等兼之者蓋軍旅未息朕若有事於外必留
太子監國若設府僚卿等在內事當啓聞太
子或有聽斷不明而與卿等意見不合卿等
必謂府僚導之嫌疑由是而生朕所以特置
賓客諭德等官以輔成太子德性且妙選名
儒為之賓友

聖祖此見真超越千古

定衛所官軍及定將帥將兵之法其法自京師

達於郡縣皆立衛所大率以五千六百人為一衛一千一百二十人為一所一百一十二人為百戶所每百戶所設總旗二名小旗十名管領鈐束通以指揮使等官領之大小相聯以成隊伍有事征伐則詔總兵官佩將印領之既旋則上所佩將印於朝官軍各回本衛大將單身還第敕皆出於朝廷不敢有所擅調自是征伐率以為常

此佩印充總兵之始也

詔衣冠悉復唐制

詔開科取士定科舉格初場各經義四書一道
二場論一道詔誥表箋內科一道三場策一道
中式者後十日以騎射書算律試之

立三場試格始此後有增損

以濠州為中立府定為中都先是議建都汴梁
上意不欲群臣多言臨濠帝鄉可建都者乃詔
改為中立府取中天下而立定四海之民之義

號曰中都後以議止改中立府為鳳陽府雖不
建都猶設中都留守司

稱中都始此

令天下郡縣設義塚禁止浙西等處或火葬水葬
凡民貧無地以葬者所在官司擇近城寬閑地
立為義塚敢有徇習元人焚棄屍骸者坐以重
罪命刑部著之律

立漏澤園始此

詔嶽鎮海瀆諸神前代加以封號非宜今並改

正以山水本名稱其神郡縣城隍神號一體改正止稱某府某縣城隍之神

按嶽鎮海瀆城隍去封號始此

詔戶部籍天下戶口置戶帖書各戶之鄉貫丁口名歲以字號編為勘合用半印鈐記籍藏於部帖給於民令有司點閱比對

戶帖始此

詔徵江南諸郡民凡稱大家者悉赴闕造之於庭親訓諭之凡天地陰陽性命仁義古今治亂盛衰紀綱法度風俗政治得失之故諄諄累數千百言又恐其遺忘而不能詳刻而為書以摹本外賜之名曰教民榜

榜諭始於此

置六科給事中掌叅駁糾劾之事

分給事中為六科始於此

詔天下鄉貢舉人罷會試開文華堂於禁中命選舉人年少質美者肄業其中儒臣宋濂桂彥良分教之光祿日給酒饌又選成均之秀入武

英堂俾練習政事

教士禁中僅見於此

禁四六文辭

國初凡在外司府州衛等衙門所進表箋皆令學官為之以聲音字樣犯忌諱被誅者多後令翰林撰為定式如

聖節冬至正旦賀表之類臨時惟書謄以進而已

制子為父母庶子為其母皆斬衰三年嫡子眾子為庶母皆齊衰杖期五服亦稍有升降編輯成書使內外遵守

庶子為其母斬衰今制也可謂能體孝子之心矣

定外官朝覲以三年為期及還任各賜勅一道以申戒飭

朝覲官頒

勅自此始因以辰戌丑未為期

定服色花樣公侯駙馬伯麒麟白澤文官一品

二品仙鶴錦雞三四孔雀雲鴈五白鷗六七鷺
鷺鸕鷀八九黃鸝鶴鶉練鵲風憲官用獬豸武
官一二獅子三四虎豹五熊羆六七彪八九品
犀牛海馬

服制之章定於此

改各行中書省為承宣布政使司

布政使司之設始於此

定文官應封贈祖父母父母父母妻室者照依資格
一品贈三代二品三品贈二代四品至七品一

代照見授職事

始定回品受封例

定諸子應封父母嫡母在生母不得封如已亡
則皆封若生母未封贈不得先封其妻

後又有告乞移封者

恩亦浩蕩矣

定公侯

誥用玉軸一品官同伯用犀軸二品官同三品
四品用抹金軸五品以下用角軸

詰軸之等始定

置通政使司掌出納諸司文書敷奏封駁之事以曾秉正為通政使

通政使之設始於此

制內侍不許讀書識字

按內侍不許讀書識字始於此後

宣廟始以翰林官教之於內侍監

朝參文武百官給牙牌懸帶出入以防姦偽

朝臣懸帶牙牌始於此

南番彭亨國及百花國各遣使奉金葉表文來朝貢

二國前代皆未嘗通中國者

定致仕官處鄉黨之禮惟於族內序尊卑如家人禮其於外祖及妻家亦序尊卑若筵宴則設別席不許坐於無官者之下如與異姓致仕官會則序爵爵同則序齒其與異姓無官者相見不須答禮庶民以官禮謁見敢有凌侮者論如律

致仕官居鄉之禮始於此

革中書省罷丞相等官不設陞六部為正二品
衙門分理天下庶務改大都督府分設左右前
後中五軍都督府

以丞相胡惟庸謀逆之故也

創編賦役黃冊以一百一十戶為一里推丁糧
多者十人為里長餘百戶分為十甲歲役里長
一人管攝一里之事城中曰坊近城曰廂鄉都
曰里十年一週每里編為一冊冊首總為一圖
鰥寡孤獨不任役者則帶管於一百一十戶之
外而列於圖後名曰畸零冊成一本進戶部各
布政司及府州縣各存一本十年攢造一次遂
為定制

十年一造黃冊始定於此

頒五經四書於北方學校

五經之外有四書始定於此

置錦衣衛及鎮撫司先是置儀鑾司至是改為
衛所隸有大漢將軍力士校尉人等專掌直駕

侍衛巡捕等事若有重白下本衛鎮撫司推鞠
始立錦衣衛及鎮撫司

令各衙門用半印勘合行移

先是各布政司因循舊弊用空印紙於各部
查得錢糧軍需有差錯改正却將空印紙填
寫咨呈補卷事發大行考較將各官多論死
謫發遂議用半印勘合出納關防其勘合之
制今在京五府六部都察院衙門各置簿籍
二扇合空紙之半照各地方編寫字號押印

完畢外號底簿發諸都布按司直隸府州衛
所收掌內號底簿并勘合紙本衙門收貯凡
行移在外事務發勘合科填寫號紙下各地
方比照硃墨字號相同將開去事件奉行完
報如號紙盡絕照字號編接如前各該司府
州衛候年終將發去勘合底簿拆粘具本奏
繳仍具青冊一本送原發衙門以憑稽查比
較遂為定制

制除官開寫年籍從軍印色赴

內府清理明白寫黃仍為內外貼黃正黃關防
走號合同請寶鈐記正黃送銅櫃收貯內外黃
各置文簿附貼亦於

內府收掌遇有陞調罷替貼揭續附

按貼黃武職最重吏弊莫甚於此

定戶部為十二部各清理一布政司戶口錢糧
仍帶管直隸府州分為民度金倉四科

戶部十二部定於此後改為清吏司增雲貴
去北平矣

上幸太學還

太后聞太學諸生有携挈妻孥者無所仰給勸
月以糧給其家遂為永制

諸生月糧始於此

選高僧分侍諸生

此又一夷制也

刑部掌天下刑名其屬古有四部曰憲部比部
司門部都官部洪武二十三年因天下庶務浩
繁改為十二部曰浙江上刑福建山東北平四

川山西胡廣廣東廣西北南陝西各令清理一
布政司刑名等事其雲南布政司隸陝西部仍
量其繁簡帶管直隸府州并在京衙門後改為
清吏司永樂間革北平清吏司增雲南貴州交
趾三清吏司宣德間革交趾清吏司浙江部帶
管

刑部始定為十三年

置殿閣學士以禮部尚書劉仲質為華蓋殿大
學士翰林院學士宋訥為文淵閣大學士檢討
吳伯宗為武英殿大學士典籍吳沉為東閣大
學士

始設殿閣學士

上以海外諸國進貢信使往來真偽難辯遂命
禮部置勘合文簿發諸國俾往來俱有憑信稽
考以杜姦詐之弊但遇入貢咨文具於所經各
布政司比對勘合相同然後發遣於是暹羅占
城琉球等五十九國俱給勘合文冊

給諸夷國勘合始也

勅內官毋預外事凡諸事與內官監文移往來

與內官監文移往來有禁始此

改御史臺為都察院

始稱都察院定官制

議取各處工匠驗其丁力以三年為限更番赴京輸作名曰輸班匠免其家徭役著為令

始有輸班匠

遣國子監生武淳等往各處隨其稅糧多寡定為幾區區設糧長四人使集糧長者民躬履田畝以量度之圖其田之方圓次其事悉書主名及田之四至編彙為冊其法甚備謂之魚鱗圖冊

魚鱗圖冊始此草貼脚詭寄之弊也

御制大誥三編成頒示天下先是戶部侍郎郭桓等犯贓事覺連坐者衆因此作大誥頒示天下令一切官民諸色人等戶有此一本若犯笞杖徒流罪名每減一等無者每加一等

大誥減等始於此今未沿皆有減等而無加等矣

廷試進士賜任亨泰等及第出身有差上命有司建狀元坊以旌之

旨建坊自此始

置詹事府秩正三品以兵部尚書致仕唐鐸為詹事

始立詹事府古有詹事官未專稱府也

詔以兀良哈之地置朵顏泰寧福餘三衛兀良哈古山戎也歷代為渾莫奚為奚契丹時大軍征夷朵顏元帥等各差人來朝願為外藩以其地置三衛自全寧抵喜峰近宣府曰朵顏自錦義歷廣寧至遼河曰泰寧自黃泥窪踰瀋陽鐵嶺至開原曰福餘以兵酋為指揮等官各統所部自是每歲朝貢

朵顏三衛之設始於此

上以學校為國儲才而士子巾服無異吏胥宜有以甄別之命工部製式以進必求典雅凡三

易其制始定由是士子大冠綽有古風焉

定生員巾服之制始此

上微行至神樂觀見一道士於窓下結網巾問曰此何物耶對曰此網巾也用以裹之頭上則萬髮皆齊矣明日朝罷召結網巾道士為道官取網巾十三頂頒示十三布政司使人無貴賤皆首裹網巾遂為定制

此歷代所未有也

頒大成樂器于天下令有司如式製造以祀孔子

孔廟始有大成樂器

令更定武職比試罷職例凡內外指揮千百戶子孫未及二十歲者罷職至年二十乃比試初試不中罷職者惟食半俸二年後再比中者食全俸仍不中者降充軍

國初比試之嚴如此此武職所以多可用者選才間右以浦江鄭沂為禮部尚書鄭幹為監察御史

洪武中多選用稅口人材湖州富民嚴震直授布政司叅議累官至尚書蘇州富民沈萬三有孫曰玠擢戶部員外郎玠受官辭祿上器重之他如邗顯湯行之屬皆大戶此亦立賢無方之意也

命禮部會同翰林院考國子監六堂師弟子甄別高下送吏部以次擢用

太學生始以次擢用

詔天下郡縣夏稅秋糧自洪武二十八年以前拖欠未納者許折輕齋隨地方出產聽從民便以免轉運每金一兩折米二十石銀一兩折米四石鈔三貫五百又折米一石絹每一疋折米一石二斗綿布每一疋折米一石夏布每一疋折米七斗淨綿花每一斤折米二斗

輕齋之議始見於此

成祖文皇帝

定官俸米鈔兼支例今在京文武官俸一品二品四分支米六分支鈔三品四品米鈔中半兼

支五品六品六分米四分鈔七品八品八分米二分鈔每新鈔二錠折米一石九品雜職及吏典旗軍並全支米從戶部尚書夏原吉等之議也

按此官俸折鈔之始累朝以來又有折布折絹折鹽折贓罰庫衣服胡椒蘇木事例正統以後則有二分支米八分支鈔或三分支米七分鈔雜九品雜職無不皆然者矣

以北平為北京設北京留守行後軍都督府及北京行部以郭資雜僉並為行部尚書所屬分置吏戶禮兵刑工六曹清吏司

六曹始稱清吏司又有行在六部之稱

改北平府為順天府

始立順天府

戶部尚書郁新等言淮河至黃河多淺灘跌坡餽運艱阻請自淮安舟船可載三百石以上者運入淮河沙河至陳州潁岐口跌坡下復以淺船可載二百石以上者運至跌坡上別以大船

載入黃河至八柳樹等處令河亭車夫運赴衛
河轉輸北京從之

始有淺船

命內臣齊喜提督廣東市舶

內臣提督市舶始此

定新舊武職比試廕襲例令洪武三十二年至
二十五年奉大征討獲功陞職者為新官子孫
年十六出幼穉替免比試三十一年以前者為
舊官子孫年十五出幼穉替俱比試永樂元年

以後獲功者出幼比試與舊官同

有新官子孫舊官子孫比試之別

命學士解縉等選新進士才識英敏者俾就文淵閣進其學於是縉等選修撰曾棨編修周述周孟簡庶吉士楊相劉子欽等凡二十八人以應二十八宿時庶吉士周忱自陳年少願進學上喜增忱為二十九人遂命司禮監給紙筆墨光祿給朝暮膳仍命解縉領其事

庶吉士之設始此把都等來歸

上大喜命把都為右軍都督僉事賜姓名吳允誠倫都兒灰為後軍都督僉事賜姓名柴秉誠其部屬保住為陝西行都司都指揮僉事賜姓名楊効誠餘為指揮千戶鎮撫復賜冠帶罷衣文綺表裏白金鈔錠有差命居涼州仍給與牛羊孳牧衣鞋布鈔令總兵宋晟加意撫恤俟居處既定選其中勇壯數百叅以官軍於塞外偵邏

賜把都帖木兒官爵姓名分處涼州始此

置交趾都指揮使司以都督僉事呂毅掌司事
黃中為副布政司以尚書黃福兼掌之以前工
部侍郎張顯宗為左布政使餘皆選人以充置
十七府五州以統諸州縣置十衛二千戶官軍
以守之

置交趾布政司始此時永樂五年

設四夷館選國子監生教習四方番夷翻譯文
字分為八館曰韃靼曰女直曰西番曰西天曰
回回曰百夷曰高昌曰細甸

始設四夷館

命工部尚書宋禮等發山東丁夫開濬會通河
會通河故元運河也洪武二十四年河決原
武漫過安山湖而會通河遂淤自是南運舟
楫不通而立陸路遞運所往來者悉皆至德
州下河永樂初建北京立運法自海者踵元
人之舊由直沽達京自河運者由江入淮由
淮入黃河至於陽武發山西河南丁夫陸運
至衛輝下河舟運至京是時海運險陸運費

濟寧州同知潘叔正建言舊會通河四百五十餘里其淤塞者三之一浚而通之可免漚運之勞實國家無窮之利遂

命宋禮及刑部侍郎金純都督周長發山東六郡丁夫十餘萬開濬以復故道禮用老人白瑛計築壩于汶上縣之戴村橫亘五里過汶盡出于南旺至分水龍王廟分為二水四分南流以接徐沛六分北流以達臨清又相地勢高下增修水閘以時啓閉便蓄洩自分水

至臨清地降九十尺為閘十有七而達于漳御南至活頭地降百十有六尺為閘二十有一而達于河淮自是河成糧運便利京儲充足

始置貴州布政司及思州等府洪武中止設貴州思南思州諸宣慰司管束土民及設都指揮使司鎮守其地既而思南宣慰使田宗鼎與田用宣慰使田琛數相攻抗拒朝命乃勅鎮遠侯禡成以兵擒之尚書夏原吉等議以思州所

轄二十二長官司分設思州新化黎平石阡四府思南所轄十七長官司分設思南鎮遠銅仁烏羅四府而於貴州設布政使司以總之

貴州布政司設于永樂十一年

北京行太僕卿楊砥言近日馬蕃息而少牧養之人請令民五丁養種馬一匹每馬十匹立群頭一人五十匹立群長一人養馬之家歲免其糧草之半尋令民養種馬者二歲納駒一匹凡種馬倒死孳生不及數皆令倍償

北方養馬之害起於楊砥

勅修武當山宮觀成賜名曰太嶽太和之山

武當山始改名太和山

仁宗昭皇帝

上以文淵閣大學士楊榮金幼孜等輔導積有年勞陞榮為太常寺卿幼孜為戶部右侍郎仍兼前職陞左春坊大學士楊士奇為禮部左侍郎兼華蓋殿大學士前右春坊大學士黃淮為通政使東武英殿大學士俱掌內制不預所陞

職務以前洗馬楊溥為翰林院學士

按

以九卿等官兼殿閣學士掌機密始此

進蹇義少傅加楊士奇少保並兼職如故加楊
榮太子少傅兼謹身殿大學士金幼孜太子少
保兼武英殿大學士

內閣位進三孤始于楊金

賜蹇義楊士奇楊榮金幼孜銀圖書各一其文
曰繩愆糾謬

賜銀圖書始於蹇義楊士奇楊榮金幼孜
大理寺奏決重囚

上曰人命甚重命五府六部通政司六科同三
法司於承天門會審

此府部九卿科道每歲會審之始也

令直隸及近各都司官軍更番於京師操備從
英國公張輔兵部尚書李慶等之請也

上諭之曰古者務農講武皆有定期故兩不偏
廢今宜略倣此意無廢屯種令畢農事而後來

先農事而遣歸庶皆不妨誤

按此外衛官軍更番京操之始也

追贈兵部尚書金忠少師謚忠襄以其子達為翰林檢討達年始十歲令還鄉支俸

幼童廕官始此

加太子少傅大學士楊榮兼工部尚書三俸並支

三俸兼支始于文敏

上諭禮部尚書呂震曰朝臣在外久者今皆令

還鄉展省其得誥勅者足為家鄉之榮然到家有養祭賓客之需往返道途之費計其有官俸祿給日用外有餘資鮮矣自今歸者皆賜鈔一品賜鈔五千貫三品四千貫餘有差於是大學士金幼孜左春坊大學士王英等並乞歸省焉後定為十年始放歸者歸者之制前所未有也

選方面官參贊各邊軍務

上以武臣疎於文墨乃選任方面官於各總兵

官處整理文書商確機密參謀軍務督理邊儲
大同則山東參政沈固宣府則參政劉璉遼東
則參議周願廣西則副使劉紹後滿考陞俸或
轉京職

參贊邊務設官始於此

宣宗章皇帝

定會試分南北卷取士例先是

仁宗與侍臣論科舉之弊士竒對曰科舉須兼
取南北士試卷例緘其姓名請今後於外書南

北二字如一科取百人南取六十北取四十則
南北人才皆入用矣議定未行

上嗣位始大行之後復分南北中卷以百名為
率南北各退五名為中卷北卷則北直隸山東
河南山西陝西中卷則四川廣西雲南貴州及
鳳陽廬州二府徐滁和三州餘皆南卷

會試取士分南北中始行於此

始遣御史分行天下郡縣清理軍伍時天下軍
政既久而弊軍之姦黠者往往匿其籍或誣援

良民充伍所司利其賄輒從之
上知其弊遂命御史四出清理

清軍御史之設始於此

顧佐自為都御史憲度嚴明宿弊清革下至吏
卒慄厲凜然吏有遭撻者据撫佐過謂受卑隸
賂放歸悉具姓名訴通政司以聞上密以示楊
士奇曰爾不舉佐廉乎對曰所訴之事誠有非
誣蓋今朝臣月俸止給米一石薪炭馬芻咸資
於卑不得不遺半歸使備所用卑亦樂得歸耕

實官卑兩便北京師大小臣僚皆然臣亦然自
永樂以來如此

仁宗皇帝因增朝臣之俸

上歎曰朝臣之艱如此因怒訴者

後緣此遂有柴薪卑糧徵銀代役

差監察衙門一員巡視在京倉一員巡視通州
倉一員巡視各處收草一員巡視甲子等庫一
員提督象牛羊奇房錢糧一員巡視光祿寺凡
內外官員人等多支食料及需索騷擾者皆令

執奏

從楊士奇之請至今因之一年一代云

推陞各部郎中員外郎及御史長史等官六員為各部侍郎總督浙江江西湖廣河南山東山西等布政司及南北直隸府州徵收稅糧巡撫地方以監察御史于謙為兵部右侍郎巡撫河南

各省專設巡撫始此皆以侍郎為之

命南京戶部尚書黃福叅贊南京軍務時楊士

奇等言南京根本之地雖有襄城伯李隆守備其老成忠直如尚書黃福宜令叅贊軍務有事同議而後行庶幾無闕從之

南京兵部叅贊機務自此始

英宗睿皇帝

令浙江嘉湖直隸蘇松等府官田准民田起科每畝秋糧四斗一升以上至一石者減作一斗七升二斗一升以上至四斗者減作二斗一斗

一升至二斗減作一斗蘇州府遂減秋糧八十餘萬石他府有差

官田准民田起科從巡撫周忱之言也

令各省設按察司副使或僉事各一員南北直隸監察御史各一員請勅專一提督學校

始設提督學校官

遣行人齋勅旌江西義民魯希恭等復其家旌表義民始見于此

宣宗皇帝實錄成大學士楊士奇楊榮俱進少師楊溥進少保餘進秩有差

廷臣以實錄成進官始此

詔京師各衙門除行在之稱

按永樂初議遷都設六部等衙門各稱行在某部十八年定都于此除行在二字其舊在南京者加南京二字初

仁宗欲回都南京北京各衙門復稱行在至是宮殿完仍定都北京復除行在二字遂為永制

正月宴天下來朝賢能官布政使丁璘等于禮部

宴來朝官始此

命內閣官與各衙門會議大政宣德以前每有大事與群臣面議傳旨施行不待批答

上嗣位幼冲面議遂廢至是始命廷臣內閣會議具本奏決

自是以後皆會議具本請不復面議矣

景皇帝

以邊關事殷天下生員納粟上馬者許入監限一千人止其上選事例與歲貢同

按納粟入監始于此

立京營團操法兵部尚書于謙以京師兵馬分隸五軍神機三千諸營者雖各有總兵然不相統一每遇調遣選摘號令不同兵將不相識或

至誤事乃議揀選諸營馬步官軍一十五萬分
為十營每營各以都督總領每五千用都指揮
一員每千又用都指揮或用指揮一十五員把
總每立百名用指揮三十員分管每隊用管隊
官一員嘗令在營操練統體相維兵將相識出
征就令原管都督等官統領前去號令歸一行
伍不亂

京營團操之法始於此

命左都御史王翱總督兩廣軍務時兩廣寇賊
擾攘兩鎮將官互相觀望不即討捕故命翱總

督之

兩廣總督之設始于此

增定各鄉試取士額數累朝以來漸增取士額
順天應天各一百名浙江福建皆六十名江西
六十五名河南廣東皆五十名湖廣五十五名
山東四川皆四十五名陝西山西皆四十名廣
西三十名雲南二十名正統三年景泰元年開
科皆不拘額數至是以天下人才彌盛始加增
定順天應天各增三十五名浙江江西福建河
南湖廣山東各增三十名廣東四川陝西山西
廣西各增二十五名雲南增十名

始定解額後嘉靖十六年雲貴始分雲四十
名貴三十名

改各處鎮守侍郎為巡撫都御史時議以鎮守
侍郎與巡按御史不相統屬難於行事文移往
來亦多窒礙故也

彭公韶曰我

朝初制歲遣監察御史巡按方隅或大災重患

仍遣廷臣行覲謂之巡撫迄事而止無定員
宣德中以關中江南等處地大而要始命官
更代巡撫不復罷去正統末南方盜起北虜
犯邊於是內省邊隅徧置巡撫官矣
命太監班佑鎮守兩廣

太監鎮守兩廣始此按菽園雜記洪武中內
官僅能識字不知義理永樂中始令吏部聽
選教習入內教書正統初太監王振於內府
開設書堂選翰林檢討正字等官入教於是

內官多聰慧知文義者然其時職專辦內府
衙門不出差者尚少宣德間差出頗多然事
完即回後漸干預外政如邊方鎮守京營掌
兵經理內外倉場提督營造珠池銀礦市舶
織染等事無處無之

吏部奏准聽選監生許給假依限回部聽用
監生回籍候選自此始

兵部觀政進士常熟楊集以書上于謙略曰姦
人黃竑進易儲之說以迎合上意本為脫身計

耳公等國家柱石乃戀宮僚之賞而不思所以善後乎脫二人死杖下而公坐享崇高柰清議何謙以書示王文文曰書生不知法度然有膽氣當進一級處之遂出為安六州知州

進士選知州始此

英宗睿皇帝

調知鎮江府林鷄知蘇州府時學廟像歲久多剝落者或欲因其舊而加以脩飾鷄奮然曰塑

像非古我

太祖於太學易以木主百年夷俗乃革彼未壞猶當毀之幸遇其壞易以木主有何不可或以毀聖賢像為疑鷄曰此土泥耳豈聖賢耶孔子生於佛教未入中國之前烏識所謂泥像哉況古人席地而坐政不如此於是併易從祀諸賢皆為木主

木主奉祀林鷄獨能行之於蘇若先知焉吏部奏准辦事官放回省祭以次取用

辦事官回籍省祭自此始

上大漸乃處分後事命太監牛玉執筆口占使書其一 東宮即位百日成婚其二定 后妃名分其三命勿以殯御殉葬其四言殯歛器服書畢令牛玉曰將去閣下看令為朕潤色玉至閣李賢陳文彭時驚愴捧誦歎曰所言閔大猷非上英明不能及此而止殉一事尤高出古今真盛德事也

至是止殉葬此可謂萬世法也

憲宗純皇帝

以順義縣安樂里板橋村原抄沒太監曹吉祥地一所撥為宮中莊田

皇莊之立始此按普天之下莫非王土何必自為私莊私莊一立而司之者因侵占民地雖屢經科道查勘不能禁止

皇太后壽誕建設齋醮禮部尚書姚夔飲會大

臣收買炷香相率詣寺觀行禮祈福
上香祈福始於此

定在京三品以上官員子孫許一人送監讀書

照例出身有志科舉者聽若大臣果有勲勞於
國出自

特恩錄用其子孫者不在此限

國初因前代任子之制文官一品至七品皆
得廕子一人以世其祿備載於諸司職掌凡
職官子孫廕叙正一品子於正五品叙用從
一品子於從五品叙用二品以下以是為差
後乃漸為限惟三品以上及死王事者乃得
錄廕無復前代之濫矣

始立十二團營京營之制國初止有五軍營中
軍左右掖及左右哨是也永樂初始以龍旗下
三千 騎立三千營後征交趾得

神鎗火箭之法立神機營是為三大營居常則
五軍以肄營陣三千以肄巡哨神機以肄鎗手
如遇

駕親征則火營居中營外分駐五軍步卒居內
騎卒居 其外為神機營又其外有長圍各周
二十里令軍中樵採皆不得出圍外景泰初選

三大營精銳官軍分立十營團操以備警急調
用是為 營天順初罷立八年復置成化初復
罷至是復置抽選二大營精兵分為十二營曰
奮武耀武練武顯武敢勇果勇効勇鼓勇立威
伸威揚威振威每營各有坐營把總等官統之
若遇出征即量調而行三大營所存老弱無凡
名曰老家兒專備營造差撥等用其十二團營
益以北直隸各衛及山東河南江北各都司衛
所精兵共二十五萬寔之分為春秋二班團操

聽征

至是有十二營

定長運法漕運舊例軍民各半互相轉運民運淮安徐州臨清德州水次四倉交收漕運官分派官軍轉運於通州天津二倉往返經年多失農用於是侍郎周忱議將民運糧儲俱於瓜州淮安補給腳價兌與運軍而轉運變為兌運矣至是右都御史滕昭議罷瓜淮氣運令官徑赴江南州縣水次交兌民加過江船費視地遠

近有差兌運又變為長運至今為定制

按前代之漕運以民今之漕運以軍與其勞民以妨農不若勞軍之為愈也但蘇松白糧猶民自運

經理流民開設湖廣鄖陽府及竹溪鄖西二縣陝西商州及商南山陽白河三縣河南桐柏南召伊陽三縣設撫治都御史行臺于鄖陽統治之從都御史原傑之請也

始設鄖陽撫治都御史

置西廠命司設監太監汪直提督官校刺事
又有西廠之設

命太監汪直監督十二團營

始以內臣監督團營

以山西陝西等處饑荒令被災所在三年六年
考滿官員納粟預備賑濟四品納米六十石五
品五十石六品七品四十石八九品三十石雜
職二十石免其赴部給由惟造完須知功蹟牌
冊并通關差人繳部從大學士萬安等之言也

始有考滿官納粟之例

吏部尚書李裕奏朝覲考察天下官員乞創立
才力不及一例行之

舊例考察其沙汰之目曰老疾曰罷軟曰貪
酷曰素行不謹凡四而已至是裕建言謂遲
鈍似軟偏執似酷二者於老疾不謹復無所
屬謂宜創立才力不及名目通前為五凡考
居才力不及者俱照品級調簡僻衙門用

朝廷以其有愛惜人才之意從之自後遂為定

制

孝宗敬皇帝

令州縣選民壯先是天順初令召募民壯鞍馬器械悉從官給本戶有糧與免五石仍免戶丁二丁以資供給如有事故不許勾丁至是令州縣選取年二十以上五十以下精壯之人州縣七八百二者每里僉二名五百里者每里僉三名三百里者每里四名一百里以上者每里五

名春夏秋每月操二次至冬操三歇三遇警調集官給糧

始有民壯之選此寓兵于農庶幾成周遺意第惜行之者惟從事朋合混編隸募項役而已無實用也

復官員給由例

按先是成化甲辰令被災所在考滿官員納米預備饑荒賑濟免其赴部至是王恕等會題言各官廩祿有限而雜職之俸尤微苟非

取於公必至剝於下貪惰之風由茲而起考課之法廢格不行甚非政体今後考滿者俱令給由赴部照例考覈從之而考滿官員自此復給由赴部

命太子太保禮部尚書如濟兼文淵閣大學士入內閣典機務

先是召入閣者皆自侍郎而下未有以尚書入閣者尚書入閣自濟始

令兩淮等鹽運司鹽引俱於運司召商開中納

銀類解戶部太倉以備邊儲

國初以來天下鹽課俱於各邊開中上納本色米豆商人欲求鹽利於近邊轉運本色以待開中故邊方粟豆無甚貴之時至是戶部尚書葉淇淮安人鹽商皆其親識內與淇言商人赴邊納糧價少而有遠涉之虞在運司納銀價多而得易辦之利淇然之內閣徐溥淇同年最厚淇遂奏淮商人引鹽悉輸銀戶部送太倉銀庫收貯分送各邊鹽銀積至一

百萬餘兩人以為利而不知其壞舊法也商人赴邊開中之法既廢近邊米豆無人買運價遂騰湧邊儲自此整理愈難矣

命孔彥繩為翰林世襲五經博士主衢州孔子廟祀彥繩宋衍聖公孔友端嫡派裔孫也友端從宋高宗南渡留居衢州遂以衢州為闕里子孫仍世襲衍聖爵號入元始廢遺祭田五項至是用守王言授以是職以便奉祀

衢州亦有闕里論嫡派當誰重也

陞平涼府開城縣為固原州開設總制府總陝西二邊

成化以前套虜未熾平涼固原之間猶為內地得以休息所備靖虜一面耳自火篩入掠之後遂為虜衝於是始改立州治而以固靖甘蘭四衛隸之設總制叅將遊擊等官屹然一巨鎮矣

武宗毅皇帝

整理陝西糧儲戶部侍郎馮清奏改西安延綏
慶陽等府糧草皆徵折色銀兩解邊

按九邊圖論謂自是邊用益窘遂有米珠草
桂之謠法不可輕變也如此

古今原始第十四卷終



國家圖書館, NATIONAL CENTRAL LIBRARY, TAIWAN, R.O.C.